

Siunnersuummut nassuiaatit Nalinginnaasumik nassuiaatit

1. Aallarniut

Siunnersuutip matuma siunertaraa namminersortuni suliffeqarnermi erninermut atatillugu sulinnigiffeqarnermut aningaasaateqarfimmik (kinguliini inatsimmilu erninermut aningaasaateqarfimmik taagorneqartumik), kiisalu pisortani suliffeqarnermi pisortat erninermut atatillugu sulinnigiffeqarnermut aningaasartuutit nalingiissaarisarnermut aaqqissuussinerannik eqqussinissaq.

Siunnersuutip siunertaraattaq naartunermi, erninermi meeravissartaarnermilu sulinnigiffeqartarneq pillugu malittarisassat atuuttut nutarterneqarnissaat ullutsinnullu naleqqussarneqarnissaat, ilaatigut angajoqqaatut sulinnigiffeqartarnerup sivitsorneqarnissaanik UKA2018/106-imi Inatsisartut aalajangernerata timitalerneqarneratigut.

Namminersortunut erninermut aningaasaateqarfik

Erninermut aningaasaateqarfeqalernissaq Naalakkersuisunit suliffeqarnermilu illuatungeriinit qangali kissaataasimavoq. 2016-imi Sulinermik Inuusutissarsiuteqartut Kattuffiata, SIK, Kalaallit Nunaanni sulisitsisut kattuffiatu, GE, akornanni isumaqatigiissutit nutarterneqarnerannut atatillugu illuatungeriit isumaqatigiissummut tapiliussamik atsiogatigiippit erninermut aningaasaateqarfimmik pilersitsinissamik kissaateqarlutik Naalakkersuisunut saaffiginnissuteqarniarlutik.

Taamaattumik Naalakkersuisut piffissami 2017-2019-imi suliffeqarnermi illuatungeriit peqatigalugit erninermut aningaasaateqarfimmut ilusissamik suliaqarsimapput. Erninermut aningaasaateqarfimmut ilusissamik suliaqarnermi, allaffissornikkut pisariitsuunissaa sapinngisamillu annikinnerpaamik sulisitsisunut allaffissornikkut artukkiinissaa aallaaviusimapput. Sulinnigiffeqarnermi akissarsianut sulisitsisut aningaasartuutaannik nalingiissaarisarnissaq erninermut aningaasaateqarfiup siunertaraa.

Erninermut aningaasaateqarfiup qularnaassavaa:

- suliffeqarnermi nalingiissitaaneq pitsaanerusoq, arnat kinguaassiorsinnaasutut ukiullit suliffeqarnermi tunulliunneqartaqqunagit,
- ilaqutariit meerartallit sulinnigiffeqarnermi naapertuuttumik pilersorneqarnissaminnut tunngavissaqarnissaat, aamma
- nunatsinni suliffeqarfiit atasinnaanerulernerat, aningaasaqarniarnikkut patajaannerulernerat unammilleqatigiinnerulersinnaanerallu.

Nunani allani ukiuni arlalinni erninermut aningaasaateqarfeqarsimasuni misilittakkat takutippaat erninermut aningaasaateqarfiit arnat kinguaassiorsinnaasutut ukiullit akornanni suliffissaaleqinerunermik ajornartorsiutit qaangerneqarnissaannut, angutit arnallu akornanni assi-

giimmik akissarsiaqarnerup qularnaarneqarnissaanut, suaassutsinullu agguataarlugu suliffeqarfeqarnerup qaangerneqarnissaanut peqataasimasut.

Kiisalu erninermut aningaasaateqarfeqalernikkut siunissami erninermut sulinngiffeqarnermi tamakkiisumik akissarsiaqartitsinissamik neqerooruteqarsinnaalernissaq sulisitsisunut anner-tuumik akikinnerulersussaavoq, tamannalu naatsorsuutigineqarluni siunissaq ungasinnerusoq isigalugu sulisartut tamarmik erninermut atatillugu sulinngiffeqarnerminni tamakkiisumik akissarsiaqarsinnaalernissaannut aqquutissiuiumaartoq.

Maannamut assersuutissaqartarsimavoq suliffinni sulinngiffeqarnermi akissarsiaqarsinnaati-taasutut atugassaqartitaallutik sulisut atorfeqarfigisaanni arnat kinguaassiorsinnaasutut ukiullit tunulliuunneqartarsimanerannik, tassami suliffeqarfiit arnaq tamakkiisumik ilaannakortumil-luunniit tamakkiisumik akissarsiaqartittariaqartarmassuk, sulisitsisunut ataasiakkaanut erni-ner-ut aningaasaateqarfimmit aningaasartuutit ilaannakortumik matussuserneqarnissaannut periarfissaqanngitsumik. Tamanna maanna allanngortinneqassaaq nammaqatigiiffiusumik er-ninermut aningaasaateqarfiliornikkut, akissarsianut aningaasartuutit amerlanerpaartaasa erni-nermut aningaasaateqarfimmit suliffeqarfinnut utertinneqartalernissaannik qularnaarisumik. Taamaaliornikkut suliffeqarnermi naligiissitaaneq annertunerusoq qularnaarneqassaaq.

Assersuutigalugu sulisunit 4-nit 2-t ataatsikkut erninermut atatillugu sulinngiffeqa-lerpata, tamanna suliffeqarfinnut mikinerusunut ikittunik sulisulinnut aningaasatigut ingerlat-sinikkullu pissuanarsinnaavoq qaangeruminaassinnaasoq. Suliffeqarfiit sulisunik pingaaruti-linnik annaasaqartarput suliffeqarfiillu erninermut atatillugu sulinngiffeqarnermi akissarsia-qartitsisussaataitaasut aningaasatigut annertuumik artukkerneqartarlutik, ullumikkut malittari-sassat malillugit suliffeqarfinnut utertitsissutaasinnaanngitsunik. Taartitut sulisussanik atorfi-nitsitsinissamut akissaqartoqannginneranik tamanna isumaqakkajuppoq.

Pisortani sulisunut pisortat erninermut atatillugu naligiissaarisarnermut aqqissuussine-rannik pilersitsineq

Pisortani sulisunut pisortat erninermut atatillugu naligiissaarisarnermut aqqissuussinerannik siunnersuutikkut ilanngullugu pilersitsisoqassaaq.

Aaqqissuussinermi immikkuualuttut nalunaarummi aalajangersarneqassapput, taassumalu Inatsisartut inatsaat nalerarlugu atuutilersinneqarnissaa naatsorsuutigineqarluni. Namminersortunut erninermut aningaasaateqarfimmik pisortallu erninermut atatillugu nali-giissaarisarnermut aqqissuussinerannik ataatsikkut pilersitsinermut ilaatigut tunngaviuvoq inuiaqatigiinni immikkoortuni taakkunani marluusuni sulisut katitigaaneri assigiinngimmata. Pisortani suliffiit qiviaraanni kisitsisitigut takuneqarsinnaavoq taakku namminersortunit arnanik amerlanerusunik atorfeqartitsisut. Taamaalilluni namminersortut pisortani naligiissarinermut akileeqataasussaagaluarput, taamalu aamma siunertaasimasup saniatigut aningaasaatigut artukkerneqartussaagaluarlutik, taamatut aqqissuussinngikkaanni.

Taamaattumik skandinavia pillugu suliassaqarfimmi pisortani aamma namminersortuni erninermut atatillugu aningaasaateqarfinnik aaqqissuussinernik pilersitsisoqarsimavoq.

Pisortani suliffiit eqqarsaatigalugit namminersortunisuulli pisortani suliffeqarfiit ataasiakkaat, pisortani suliffeqarfinni anginerusuni immikkoortortaqarfiit il.il. erninermut atatillugu angajoqqaatullu sulinngiffeqarnermut atatillugu aningaasartuutitut tamakkiisumik ilaannakortumilluunniit taarsiivigineqartarnissaasa qularnaarneqarnissaa pisariaqartinneqarpoq, arnat kinguaassiorsinnaasutut ukiullit tunulliuunneqarnissaannut pissutissaqaqqunagu. Ulluunerani paaqqinnittarfik assersuutigalugu arfineq-pingasunik sulisulik marlunnik sulisoqarpat ukiup aningaasaliissuteqarfiusup ingerlanerani erninermut atatillugu sulinngiffeqartussanik, paaqqinnittarfiup akissarsianut atorsinnaasami 25 pct.-ii tikillugit erninermut atatillugu sulinngiffeqarnermi akissarsianut atortariaqassavai peqatigitillugulu sulisorisat 25 pct.-imik ikileriarlutik. Tamatumunnga paaqqinnittarfik taarsiivigineqanngippat piffissami erninermut atatillugu sulinngiffeqarfiusumi sulisunik nutaanik atorfinitsitsisoqarsinnaasunngorlugu, taava paaqqinnittarfimmik aqutsisut sulisullu nukissaqarpallaaratik imaannaanngitsorujussuarmik inissisimalissapput. Ajournerpaamik pisoqartillugu tamanna uippakajaarneq pissutigalugu napparsimasutut nalunaartariaqalernernik, soraarniuteqarnermik il.il., taamalu ulluunerani paaqqinnittarfimmi nukissatigut inissisimanerup suli ajornerulerneranik kinguneqarsinnaavoq.

Assersuutip ersersippaa erninermut atatillugu sulinngiffeqarnermut aningaasartuutit naligiissarneqartarnissaat utertitsissutillu suliffeqarfinnut ataasiakkaanut toqqaannartunik ingerlatinneqartarnissaat qanoq pingaaruteqartigisoq.

UKA2018/106-imi Inatsisartut aalajangernerata timitalerneqarnera

2018-imi ukiakkut ataatsimiinnermi angajoqqaatut sulinngiffeqartarnerup sapaatit akunnerinik 4-nik sivitsorneqarnissaanik Inatsisartut aalajangiivigisassaattut siunnersuut Inatsisartut akuersissutigaat.

Inatsisartut aalajangernerat siunnersuummi matumani § 13-imi timitalerneqarpoq.

Kiisalu angajoqqaatut sulinngiffeqarsinnaatitaanerup eqaannerusumik aaqqissuunneqarsinnaaneranut angajoqqaat periarfissinneqarsimapput, sulinngiffeqarnerup piffissap ilaani sulinngiffeqarnermut piffissamut sivisunerusumut siaarneqarneratigut, imaluunniit angajoqqaatut sulinngiffeqarnerup sivitsuutaata tamarmi ilaataluunniit kingusinnerusukkut ingerlanneqartussanngorlugu kinguartinneqarneratigut.

Naartunermi, erninermi meeravissartaarnermilu sulinngiffeqartarneq pillugu malittarisassat atuuttut nutarterneqarnerat

Namminersortunut erninermut aningaasaateqarfimmik pisortanilu suliffeqarnermi erninermut atatillugu naligiissaarisarnermut aaqqissuussinernik pilersitsinermut atatillugu Naartunermi, erninermi meeravissartaarnermilu sulinngiffeqartarneq pillugu Inatsisartut inatsisaanni malittarisassat ullumikkut atuuttut naleqqussarneqarnissaat pisariaqarsimavoq.

Tamatuma saniatigut paasinarsisimavoq malittarisassat ullumikkut atuuttut arlalitsigut naleq-
qukkunnaarsimammata, taamaattumillu malittarisassat nutarterneqarnissaat ullutsinnullu na-
leqqussarneqarnissaat pisariaqalersimalluni.

Naalackersuisunut pingaaruteqarpoq ilaqutariit meerartallit meerartaarnermik kingorna pitsaa-
nerpaamik aallartittarnissaat. Taamaattumik siunnersuutikkut piffissami sulinnigiffeqarfiusumi
ilaqutariinnut meerartalinnut atugassarititaasunik pitsanngorsaataasussanik suliniutinik assi-
giinngitsunik eqqussisoqarpoq, taakkununga ilanngullugit:

- arnanut najugaqarfigisamik avataanut erniartortussatut innersuunneqartunut sulinnigis-
sinnaatitaanerup eqqunneqarnera,
- angajoqqaanut sulinnigiffeqarnermi meeqqamik annaasaqartunut sapaatit akunnerini
sisamani sulinnigissinnaatitaanerup eqqunneqarnera,
- angajoqqaat suaassuseqatigiit inatsiseqartitsinikkut inissisimanerisa pitsaanerulersin-
neqarnera, kiisalu
- ilaqutariinnut isertitakitsunut aningaasaqarniarnikkut atugassarititaasut pitsaaneruler-
nerat, annikippallaamik pilersorneqarnissaminnut tunngavissaqalissagaluarpata tapili-
ussanik pisortanit ikiorsiissutisisinnaalersinneqarnerisigut.

Tamatuma saniatigut meeqqanut pitsaanerusussaq suli qitiutinneqarnerulissaaq, sulinnigiffe-
qarnerup meeraq peqatigalugu ingerlanneqarnissaa siunnersuutikkut piumasaaqatigineqarmat.

Ataatsimut isigalugu Inatsisartut inatsisaannik maannamut atuuttumik allanngortitsinerit an-
nertuut pineqarmata Inatsisartut inatsisissaannik nutaarluinnarmik siunnersuuteqartoqarpoq.

2. Siunnersuummi immikkoortut pingaarnertit

2.1 Ullumikkut sulinnigiffeqartarnermut malittarisassat.

Erninermut atatillugu sulinnigiffeqarsinnaatitaaneq, angajoqqaatut sulinnigiffeqarsinnaatitaa-
neq erninernullu atatillugu ullormusiaqarsinnaatitaaneq ullumikkut Naartunermi, erninermi
meeravissiartaarnermilu sulinnigiffeqartarneruq ullormusiaqartarnerlu pillugit Inatsisartut inatsi-
saat nr. 14, 7. december 2009-meersoq tunngavigalugu aalajangersarneqarsimapput.

Ataatsimik erninermi piffissaq erniviusussatut naatsorsuutigineqarpoq sioqqullugu sapaatit
akunnerini 2-ni kiisalu erninerup kingorna sapaatit akunnerini 15-ini arnaq erninermut
atatillugu sulinnigiffeqarsinnaatitaavoq. Marluliinermi imaluunniit amerlanerusunik ataatsik-
kut erninermi erninerup kingorna sapaatit akunnerini 19-ini arnaq erninermut atatillugu sulin-
nigiffeqarsinnaatitaavoq.

Ataataasut sapaatit akunnerini 3-ni erninermut atatillugu sulinnigiffeqarsinnaatitaapput.

Meeqqamik nalusaminnik nunatsinni najugalimmik meeravissiartaartut, meeqqap tiginissaa
sioqqullugu sapaatip akunnerani 1-imi sulinnigissinnaatitaapput. Meeqqamik Kalaallit Nu-

naata avataani najugalimmik meeravissartaartut, meeqqap tigunissaa sioqqullugu sapaatit akunnerini 3-ni sulinngissinnaatitaapput.

Meeqqap 1-ip tiguneqarnerata kingorna angajoqqaat sapaatit akunnerini 15-ini sulinngiffeqarsinnaatitaapput. Angajoqqaat meeqqanik 2-nik amerlanerusunilluunniit tigusaqarunik sapaatit akunnerini 19-ini sulinngiffeqarsinnaatitaapput.

Taamatuttaaq piffissami sulinngiffeqarfiusumi angajoqqaat ataatsikkut sapaatit akunnerini 3-ni sulinngiffeqarsinnaatitaapput.

Tamatuma saniatigut angajoqqaat meeqqamik 1-imik meerartaarnermi tigusinermiluunniit sapaatit akunnerini 17-ini, taamatullu aamma meeqqanik 2-nik amerlanerusunilluunniit meerartaarnermi tigusinermiluunniit sapaatit akunnerini 21-ni, angajoqqaat sulinngiffeqartarfiannik sulinngiffeqarsinnaatitaapput.

Malittarisassat atuuttut piffissami sulinngiffeqarfiusumi erninermut atatillugu sulinngiffeqarnermi ullormusiaqarsinnaanermut aamma tunngapput. Angajoqqaat piffissap sulinngiffiusup aallartinnissaa sioqqullugu sapaatit akunnerini 13-ini kingullerni suliffeqarnermut attuumasuteqarsimasut piffissami sulinngiffeqarfiusumi erninermut atatillugu ullormusiaqarsinnaatitaasinnaapput. Tamatuma saniatigut namminersorlutik inuussutissarsiutillit aamma taakku aapparisaat inooqatigisaalluunniit ikiortaasartut, kiisalu angajoqqaat ilinniagaqartut erninermut atatillugu ullormusiaqarsinnaatitaapput.

Malittarisassani atuuttuni erninermut atatillugu sulinngiffeqarnermi akissarsiat tunniunneqarsimajunnartut tamakkiisumik erninermut atatillugu ullormusianit ilanngaatigineqartarput. Tamanna ima isumaqarpoq sulinngiffeqarnermi akissarsiaqartitsoqartillugu tiguneqartut koruunimiit koruunimut sulinngiffeqartumit ilanngaatigineqartartut. Taamaalillutik sulisitsisut sulinngiffeqarnerup nalaani akissarsiaritinneqartunut taarsiivigineqarneq ajorput. Tamanna pisutissaqalersitsisimavoq akissarsiaqarlutik sulisartunit sulisitsisuniillu isorinnittarnernut, tassami sulisitsisorpassuit kissaatigisaraluarmassuk erninermut atatillugu ullormusiat akissarsianut tapiissutinik taperneqartarsinnaanissaat, sulinngiffeqartut sulinngiffeqarnerminni aningaasatigut eqqorneqannginniassammata.

Oqaatigineqareersutut periarfissaq tamanna malittarisassat atuuttut malillugit periarfissaanngilaq, tassami erninermut atatillugu ullormusiat qaavatigut akissarsianut tapiissutaajunnaartut ilanngaatigineqartarmata, taamaalillunilu sulinngiffeqartoq tamatigut taamaallaat aningaasanik erninermut atatillugu ullormusianut naapertuuttunik tigusaqarsinnaasarluni. Periarfissatut allatut sulisitsisup erninermut atatillugu sulinngiffeqarnermi tamakkiisumik akissarsiaqartisinissani toqqarsinnaavaa ullormusianut tapiissutitaqanngitsumik utertitsivigineqanngitsumillu.

2.2 Erninermut atatillugu sulinngiffeqarnermi akissarsiaqarsinnaatitaaneq kiisalu namminersortuni pisortanilu suliffeqarnermi naligiissaarisarnermut aaqqissuussinernik pilersitsineq

Sulisitsisunit akissarsiaqarlutillu sulisartunit malittarisassat allanngortinneqarnissaat kissaatingeqarpoq, erninermut atatillugu ullormusiaqartitsisarnermut taarsiullugu erninermut atatillugu aningaasarsiaqartitsisarnermik angajoqqaatullu sulinngiffeqartarnermik, akissarsiaqarlutillu sulisartunut erninermut atatillugu ullormusiaqartitsisarnermut taarsiullugu utertitsisarnermut periaatsimik eqqussilluni.

Siunnersuutikkut siunniunneqarpoq namminersortuni suliffeqarnermi erninermut aningaasaateqarfimmik pilersitsisoqassasoq, namminersortuni suliffeqarnermi sulisut sulisitsisullu sulinngiffeqarnermi aningaasarsiaqarsinnaatitaanermit akissarsianullu aningaasartuutinik utertitsivigineqarsinnaanermit ilaatilerlugit. Erninermut aningaasaateqarfimmut tassunga ilaatinneqassapput sulisitsisut tamarmik Sulisoqarnermut akitsuut pillugu Inatsisartut inatsisaat malillugu sulisoqarnermut akitsuummik akiliisussaataasut, namminersortunilu suliffeqarnermi akissarsiaqarlutik sulisartut tamarmik. Erninermut aningaasaateqarfik sulisitsisunut pineqartunut pinngitsoorani peqataaffiusussaavoq.

Peqatigitillugu Namminersorlutik Oqartussani kommuninilu pisortani sulisitsisunut erninermut atatillugu naligiissaarisarnermut aaqqissuussinernik pilersitsisoqassaaq, pisortani sulisitsisut inuussutissarsiutillit sulisitsisullu tamaasa sulinngiffeqarnerminni akissarsiaqarsinnaatitaanermit utertitsivigineqarsinnaanermullu ilaatilerlugit.

2.2.1 Namminersortuni suliffeqartunut erninermut aningaasaateqarfik

Siunnersuutikkut namminersortuni suliffeqartunut erninermut aningaasaateqarfimmik pilersitsisoqassaaq. Namminersortuni suliffeqartunut erninermut aningaasaateqarfik nammaqatigiilluni naligiissaarisarnissamut aningaasaateqarfiuvoq, sulinngiffeqarnerup nalaani akissarsianut aningaasartuutit sulisitsisut tamaasa akornanni naligiinnerusumik agguataarneqarnissaannik qularnaarisumik. Sulisitsisut namminersortut tamarmik sulisoqarnermut akitsuummik akiliinissaminnut pisussaaffeqartut erninermut aningaasaateqarfiup malittarisassaanut ilaatinneqassapput.

Sulinngiffeqarnermi akissarsiaqarneq

Erninermut aningaasaateqarfimmik pilersitsinikkut sulisitsisut pisussaaffilerneqarput siunnersuut manna malillugu sulinngiffeqarnermi akissarsiaqartitsinissamut. Maannamut akissarsiat 80 pct.-ii aallaavittut sulisitsisut tunniuttassavaat, taamaattorli sulisitsisut pisussaaffigissallugu min-nerpaamik akissarsisitsisassallutik nalunaaquttamut ataatsimut ullormusiaritinneqartumut qa-qugumulluunniit atuuttumut naapertuuttumik. Sulisitsisut pisussaaffeqanngillat nalunaaquttap akunneranut akissarsiaqartitsissallutik, utertinneqarsinnaasut amerlanerpaaffigisinnaasaannit, nalunaaquttap akunneranut akissarsiat utertinneqarsinnaasut amerlanerpaaffigisinnaasaannit, amerlanerusunik.

Tamanna isumaqarpoq sulinnigiffeqartup nalunaaquttamut ataatsimut akissarsiai SIK-p Namminersorlutillu Oqartussat akornanni isumaqatigiissut malillugu akissarsiaqarluni sulisartup akissarsiaasa minnerpaaffigisinnaasaannut naapertuuppata, taava sulinnigiffeqarnermi akissarsiat minnerpaamik tassunga naapertuutissasut. Sulinnigiffeqartoq sulinnigiffeqalinninnermi akunnermut 115 kr.-inik amerlanernilluunniit akissarsiaqarsimappat, taava sulinnigiffeqarnermi akissarsiat ikinnerpaamik sulinnigiffeqalernermi akissarsiarineqartut 80 %-erissavaat, taamalu nalunaaquttamut ataatsimut akissarsiat, akissarsiat minnerpaaffigisinnaasaannit erninermullu atatillugu ullormusiaqarnermi tunniuttakkanit (2019-imi januaarip ulluisa aallaqqaataannit atuuttunit) amerlanerussallutik.

Namminersortuni suliffeqarnermi akissarsiaqarlutik sulisartut, apeqqutaatinagu piffissap ilaannaani piffissarluunniit tamaat sulisarnersut, tamarmik erninermut aningaasaateqarfimmut ilaatinneqassapput. Akissarsiaqarlutik sulisartut piffissap ilaannaa sulisartut akissarsiaqarsinnaatitaassapput, nalunaaquttap akunnerinut pineqartup suliffigisaanut naapertuuttunik.

Akissarsiaqarluni sulisartuq piffissami aalajangersimasumi atorfeqanngippat sulinnigiffeqarnermi akissarsiat sapaatit akunnerini kingullerni 13-imi nalunaaquttap akunneri suliffiusut aallaavigalugit naatsorsorneqassapput, taamaattorli piffissat suliffiunngitsut napparsimanermik, inatsit malillugu sulinninnermik, tunisassiassaaleqineq silallu qanoq innera pissutigalugit suliffeqannginnermik, piffissani sivikitsuni pikkorissarnernik aamma akissarsiaqarani ilinni-aqqinnernik pissuteqartut isiginiarneqassanatik. Sapaatit akunnerini pineqartuni 13-imi nalunaaquttap akunneri suliffiusut ikippallaarnerat pissutigalugu erninermut atatillugu akissarsiat ima ikitsigippata pilersorneqarnissamut tunngaviusinnaanatik, taava sulinnigiffeqartoq pisortanit ikiorsiissutit pillugit inatsit malillugu ilassutit ikiorsiissutisisinnaatitaavoq.

Akissarsianut aningaasartuutinik utertitsineq

Sulisitsisut qinnuteqarnikkut sulinnigiffeqarnermi akissarsianut aningaasartuutinut utertitsivigineqarsinnaapput.

Utertinneqarsinnaasut aallaavittut akissarsianut aningaasartuutit 80 procenteraat. Tamatumani pineqanngitsut marluupput:

- 1) Utertinneqartussat nalunaaquttap akunneranut ullormusiaritinneqartunit qaqugukkulluunniit atuuttunit ikinnerusinnaanngillat. Taamaalluni sulisitsisoq ullormusiaritinneqartumut naapertuuttumik akissarsiaqartitsisoq tamakkiisumik utertitsivigineqarsinnaassaaq.
- 2) Aningaasat utertinneqartussat utertinneqarsinnaasut amerlanerpaaffigisinnaasaannit, nalunaaquttap akunneranut akissarsiap utertinneqarsinnaasup qummut killinganit, amerlanerusinnaanngillat. Utertinneqarsinnaasut amerlanerpaaffigisinnaasaat ukiumut tamaasa Aningaasanut inatsimmi aalajangersarneqartassaaq.

Erninermut aningaasaateqarfiup aningaasalersorneqarnera

Erninermut aningaasaateqarfiup utertitsisarnermut aningaasartuutai aningaasalersorneqassapput ilaatigut sulisitsisut akileeqataassutaannit, sulisoqarnermut akitsuut assigalugu taamatullu najoqqutassaqluni sulisitsisunut akilerneqartartussanit, ilaatigullu Namminersorlutik Oqartussanit ukiumoortumik aningaasaliissuteqartarnikkut, namminersortuni sulisunut erninermut atatillugu ullormusianut massakkut aningaasartuutaasartunut naapertuuttunik angajoqqaat sulinnigiffeqartarnerup sapaatit akunnerinik 4-nik sivitsorneqarneranut aningaasartuutit ilanngullugit.

Erninermut aningaasaateqarfiup isertitai aningaasaateqarfiup ingerlataanut atatillugu aningaasartuutit tamanut, utertitsisarnerit, allaffissornikkut aqutsineq il.il. matusissutaasassapput. Aningaasaateqarfimmi sinneqartoorutaajunnartut ukiumut aningaasanut inatsiseqarfiusumut tulliuuttumut nuunneqartassapput. Aningaasaateqarfik, aningaasaateqarfiup ingerlaavartumik ingerlanneqarneranut pisariaqartinneqartut saniatigut, aningaasanik katerseqqusaanngilaq.

Sulisitsisut akileeqataassutaat Akileraartarnermik Aqutsisoqarfimmit (AKA) sulisoqarnermut akitsuut peqatigalugu akileqquneqartassapput ingerlaavartumillu Akileraartarnermik Aqutsisoqarfimmit erninermut aningaasaateqarfimmut nuunneqartassallutik. Akiligassiisarneq, akiliinissamat piffissarititat, akilersitsiniaasarneq il.il. eqqarsaatigalugit malittarisassat, malittarisassat sulisoqarnermut akitsuummumut atuuttut assigissavaat.

Inatsimmi aalajangersakkat 2020-mi januaarip ulluisa aallaqqaataannit atuutilersumik atuutilissapput, imaalilluguli sulisitsisut akileeqataassutaat aatsaat 2020-mi septembarip ulluisa aallaqqaataanniit akileqquneqartalissallutik, taamatullu aamma erninermut aningaasaateqarfiup akissarsiat tunniunneqartarnerat utertinneqartarnerallu pillugit aalajangersakkat aatsaat 2020-mi septembarip ulluisa aallaqqaataanniit atuutilissallutik, taamaalilluni erninermut aningaasaateqarfik allatseqarfimmik pilersitsinissamat, paasititsiniutit atortussanik suliaqarnissamat, qarasaasiatigut atortussanik pisariaqartunik ineriartortitsinissamat il.il. piffissaqarluarnissamat, erninermut aningaasaateqarfiup 2020-mi septembarip ulluisa aallaqqaataanniit tamakkii-sumik timitalerneqannginnerani.

Erninermut aningaasaateqarfiup ingerlanneqarnera

Erninermut aningaasaateqarfik siulersuisunit aqunneqassaaq. Siulersuisut allatseqarfimmik pilersitsissapput erninermut aningaasaateqarfimmik ingerlatsinissamat naapertuuttunik ilisimasalinnik. Erninermut aningaasaateqarfiup aqunneqarnera susasaqartut avataaneersut, assersuutigalugu soraarnerussutisiaqalernissamat aningaasaateqarfik, suleqatigalugu pisinnaavoq.

Siulersuisut katillugit 5-inik ilaasortaqaassapput; siulittaasoq, siulittaasup tullia siulersuisunullu ilaasortat pingasut. Naalakkersuisut ilaasortat 5-it tamaasa toqqartassavaat, taakkunanngalu 3-t suliffeqarnermi illuatungeriit inassuteqarnerisut toqqarneqartassallutik.

Namminersorlutik inuussutissarsiutillit

Inatsisartut inatsisaatigut matumuuna namminersorlutik inuussutissarsiutilinnut erninermut atatillugu naligiissaarisarnermut aqqissuussinermik pinngitsoorani peqataaffigisassamik eqqussisoqassanngilaq. Tamanna ilaatigut Danmarkimi misilittagaalersimasunik pissuteqarpoq, tassami 2014-mi januaarip ulluisa aallaqqaataaniit atuutilersumik erninermut atatillugu aningaasartuutunik naligiissaarisarnermut aqqissuussinermik pinngitsoorani peqataaffiusussamik eqqussisoqar-poq, namminersorlutik inuussutissarsiortunit akileeqataassutinit aningaasalersorneqartumik.

Aqqissuussinerli piffissami sivikitsuinnarmi ingerlavoq 2016-imilu 1. aprili atorunnaarsinneqareerluni. Ulluinnarni ingerlanneqalernerani paasinar-sisimavoq namminersorlutik inuussutissarsiutillit killilissallugit ajornartorujussuusoq, tassami aqqissuussinermut akileeqataassutunik akileeqqusinerup siulliup kingunerisimmamagu inun-nit akileeqataassummut akileeqqusissummik tigusaqarsimasunit saaffiginnissuterpasuumik ti-gusaqartoqarsimam, naak inuit pineqartut oqaatsip nalinginnaasumik paasineqartarneratut namminersorlutik inuussutissarsiuteqartut taaneqarsinnaanngikkaluartut. Tamatumani ilaa-tigut pineqarput soraarnerussutisiallit, nakorsat suliaminnut atatillugu misileraaneranut peqa-taasimasut imaluunniit qinersinernut atatillugu nakkutilliisuusimasut ilinniartullu oqalugiaa-teqarsimasut, taamalu amerlagisassaannngitsunik B-nik isertitaqarsimasut.

Siunnersuummili matumani erninermut aningaasaateqarfik pillugu malittarisassat namminer-sorlutik inuussutissarsiutilinnut atuutilersinneqarsinnaanerannut tunngavissiisoqarpoq, taman-na kissaatigineqassagalarpat.

Namminersorlutik inuussutissarsiutillit siunnersuutikkut matumuuna suli sulinnngiffeqarner-minni erninermut atatillugu ullormusiaqarsinnaatitaapput.

Namminersorlutik inuussutissarsiutillit namminersorlutik inuussutissarsiutitut ingerlatamik saniatigut akissarsianik isertitaqartut sulinnngiffeqarnerminni akissarsiaqarsinnaatitaassapput siunnersuutikkut matumuuna akissarsiaqarlutik sulisartutut allatuulli atugassaqartitaallutik.

2.2.2 Pisortat erninermut atatillugu naligiissaarisarnermut aqqissuussinerat

Pisortat erninermut atatillugu naligiissaarisarnermut aqqissuussinerat, pingaarnerusutigut na-joqqutassat namminersortunut erninermut aningaasaateqarfimmuut atuuttut assigalugit aqqis-suunneqassaaq, tassunga ilanngullugu sulisitsisoq pisussaaffilerneqassalluni sulinnngiffeqar-nermi akissarsiaqartitsinissamut, taamatullu aamma suliffeqarfiit, immik-koortortat il.il. ataasiakkaat aningaasartuutitut utertitsivigineqarnissaminnik qinnuteqarsinnaassasut. Taamaalilluni pingaaruteqarpoq utertitsisarnerup suliffeqarfinnut, immikkoortortaqaarfinnut il.il. ataasiakkaanut tutsinneqartarnissaa, siunertaammami najukkami suliffeqarfik sulinnngiffeqarnermi akissarsianut aningaasartuuteqartoq tassaassasoq utertitsivigineqarnissa-mik pisinnaasoq. Pisortani sulisitsisulli akileeqataasussaataaernermit ilaatinneqassan-ngillat.

Tamatuma saniatigut suliffeqarnermi illuatungeriinnut pisortani suliffeqarnermi atugassarititaasut namminersortuni atugassarititaasut assigissagaat aallaaviusimavoq pingaarutilik.

2.3 Erninermut atatillugu ullormusiaqarsinnaatitaaneq

Erninermut atatillugu ullormusianut malittarisassat atuuttut mikisualuit eqqaassanngikkaanni ingerlateqqinneqarput, taamaattorli inatsit tamakkiisumik timitalerneqarpat erninermut atatillugu ullormusiaqarsinnaasutut pineqartut allanngortinneqassallutik. Siunnersuut suliniutinik ataasiakkaanik imaqarpoq angajoqqaanut erninermut atatillugu ullormusiaqarsinnaasunut pisutsinik pitsanngorsaataasussanik. Taakku immikkoortumi “2.6 Angajoqqaanut aningaasqarniarnikkut atukkatigut pitsanngoriaatit allat” allaaserineqarput.

Ilinniartut namminersorlutillu inuussutissarsiortut maannamutut pingaarnertut erninermut atatillugu ullormusiaqarsinnaatitaanissaat atuutiinnassaaq.

Ilinniartut namminersorlutillu inuussutissarsiutillit ilinniarnermik imaluunniit namminersortutut inuussutissarsiutitut ingerlatamik saniatigut sulisartut erninermut atatillugu ullormusiaqarsinnaallutillu sulinngiffeqarnerminni akissarsiaqarsinnaatitaassapput.

Naatsorsuutigineqarpoq angajoqqaat sulinngiffeqartussat tamarmik 10 %-iisa missaat erninermut atatillugu ullormusiaqarsinnaanermut ilaatinneqarnissaat. Sinneri sulinngiffeqarnermi akissarsiaqartinneqarsinnaatitaanermut ikaarsaariassapput. Piffissamili ikaarsaariarfiusumi amerlanerit erninermut atatillugu ullormusiaqartinneqartarnermut malittarisassanut ilaatinneqassapput, tassami sulinngiffeqarnermi akissarsiaqartinneqarsinnaaneq inatsimmi aalajangersarneqartoq aatsaat 2020-mi 1. septembarimi atuutilissamat.

2.4 UKA2018/106-imi Inatsisartut aalajangernerata timitalerneqarnera

Tamatuma saniatigut sulinngiffeqartarneq sapaatit akunnerinik sisamanik sivitsorneqartussanngorlugu angajoqqaat sulinngiffeqartarnerat pillugu malittarisassat atuuttut allanngortinnissaannik siunnersuusioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuummik (UKA2018) Inatsisartut akuersissuteqarnerat timitalerneqassaaq.

Angajoqqaatut sulinngiffeqartarnerup sivitsorneqarnerata timitalerneqarnerata ilaatut angajoqqaatut sulinngiffeqartarnerup suli sapaatit akunnerinik sisamanik sivitsuutaata ingerlanneqarnissaa eqqarsaatigalugu eqaannerusumik aaqqissuussinissaq siunniunneqarpoq. Taamaalilluni akissarsiaqarluni sulisartup sulisitsisoq isumaqatigiissuteqarfigalugu sapaatit akunnerisa 4-t ilaasaluunniit kingusinnerusukkut ingerlanneqarnissaa toqqarsinnaavaat, imaluunniit piffissap ilaanni sulisarnissaq aallaqqaammut toqqarsinnaallugu piffissarlu sulinngiffeqarfiusussaq atorineqanngitsoq kingusinnerusukkut atorlugu.

Angajoqqaatut sulinnigiffeqartarnerup sivitsorneqarnerata angajoqqaatut sulinnigiffeqartarneq eqqarsaatigalugu suliffeqarnermi isumaqatigiissutinut isumaqatigiissutaareersunut sunniuteqassanngilaq.

2.5 Naartunermi, erninermi meeravissartaarnermilu sulinnigiffeqartarneq pillugu malittarisassat atuuttut nutarterneqarneri

Arnat najugaqarfigisamik avataanut erniartortussatut innersuunneqartut.

Sulinnigiffeqarnermut malittarisassani atuuttuni arnat najugaqarfigisamik avataanut erniartortussatut nakorsat suliainnut atatillugu kaammattuuteqarnerat tunngavigalugu innersuunneqartut isiginiarneqarsimangillat.

Aallaavittut arnat pineqartut erninissamut naatsorsuutigineqartumut sapaatit akunneri sissamangoraangata ernivissaminnut aallartariaqartarput, naak erninissaminnut naatsorsuutigineqartumut sapaatip akunneri 2-nngoraangata aatsaat sulinnigiffeqarsinnaatitaalertaraluarlu-tik.

Tamatuma malitsigisimavaa arnat ilaat suliffimminni pissuanartorsiortarsimammata, sulisitsisut pisussaaffeqarsimangimmata ernivissaq naatsorsuutigineqartoq sioqqullugu sapaatit akunneri 2-t sioqqullugit pissutissaqartumik sulisinnginnissaannut.

Taamaattumik siunnersuutikkut arnat sulinnigissinnaatitaalerput ullormiit erniartorlutik aallar-fimminniit. Tamanna peqatigalugu arnaq erninermut atatillugu ullormusiaqarsinnaatitaassaaq, isumaqatigiissut atorfeqartitaanermi atugassarititaasulluunniit malillugit akissarsiaqarsinnaatitaangikkuni.

Arnat qanoq amerlatigisut angerlarsimaffiup avataani erniartortussatut innersuunneqartarner-sut siunnersuutikkut allanngortinneqarnaviannngilaq. Taamaattumik naatsorsuutigineqanngi-laq arnat qanoq amerlatigisut suliffimminniit sulinnigissanersut siunnersuutikkut allanngortin-neqassasoq.

Siunnersuutip malitsigissavaa innersuunneqarneq tunngavigalugu arnap sulinnigittariaqarnera pissutissaqarani sulinnnginnertut isigineqarsinnaassanngimmat.

Ullumikkut malittarisassat malillugit arnap pissutissaqarani sulinnigitoorsimanera tunngavi-lersuutigalugu arnamik akissarsiaqarluni sulisartumik erniffissaminut angalareerner-mi kingorna suliartunngitsumik sulisitsisoq inatsisinik unioqquitsinani soraarsitsisinnaavoq. Siunnersuutikkut sulinnigissinnaatitaaneq inatsisitigut naqissuserneqarpoq, taamalu sulisitsisumit satioqqunneqarsinnaassanani arnamut aallartariaqartumut ajoqutaasumik.

Angajoqqaat sulinnigiffeqarnerminni meeqqamik annaasaqartut.

Ullumikkut malittarisassat malillugit angajoqqaat erninerup kingorna sapaatit akunneri siulliit 15-it aamma 19-it iluanni meeqqamik annaasaqartut sulinnigiffeqarnerminnik attassiinnarsinnaatitaapput.

Meerarli angajoqqaatut sulinnigiffeqarnerup nalaani toquppat, taava piffissaq sulinnigiffeqarsinnaatitaaffik, angajoqqaat sulinnigissinnaatitaanerat ilanngullugu, ulloq taanna atorunnaasaaq.

Taamaattumik angajoqqaanut inatsimmi §§ 3, 7 imaluunniit 12 malillugit sulinnigiffeqarnermi meeqqamik annaasaqartunut sapaatit akunnerini 4-ni sulinnigissinnaatitaaneq eqqunneqassaaq. Erninerup kingorna sapaatit akunnerisa 15-it 19-illu suilliit iluanni sulinnigiffeqarnerup ingerlatiinneqarsinnaanera allanngortinneqassanngilaq.

Naatsorsueqqissaartarfimmit kisitsisit takutippaat ukiumut meeqqat 5-iniit 7-inut toqusartut 1-imik ukioqalinnginnerminni. Taakku affaasa missaat tassaapput meeq-qat inunngornermik kinguninngua toqusut. Siunnersuummi inuit pineqartut amerlanavianngil-lat, angajoqqaanulli meeqqaminnik annaasaqartunut tamanna inatsiseqartitsinikkut inissisima-nerannik annertuumik pitsanngoriartitsinerussalluni.

Angajoqqaat suiaaqatigiit

Ullumikkut malittarisassat malillugit nalunaarsugaasumik aapparizat aapparizap meeraata meeravissartaarinerqarnerani erninermut atatillugu sulinnigiffeqarsinnaatitaapput. Paasinarsisimavorli malittarisassat meeravissartaarnermut malittarisassanut naapertuutinnigitsut, taamaattumillu meeravissartaarnerq aatsaat naammassineqarsinnaasarluni meeraq pingasunik qaammateqaleraangat.

Taamaattumik aappariinnut suiaaqatigiinnut malittarisassat allanngortinneqarput.

Malittarisassat nutaat malillugit anaanaasup aapparizaa arnaq ataataasup erninermut atatillugu sulinnigiffeqarsinnaatitaanera tigusunnaavaa meeraq atoqatigiinnani kinguaassaqaalersitsilluni nakorsanit suliarineqarnikkut erniusimappat.

Periarfissap ataataasup sulinnigiffeqarsinnaatitaanerani ingiaanninnissaa aalajangiisuvoq. Taamaattumik aamma piumasaaqatigineqarpoq periarfissaq tamanna aatsaat atorneqartassasoq meeqqamut kina ataatarpiaanersoq aalajangersarneqarsimannngikkaangat.

Inatsisiliornikkut killiliussat iluanni angajoqqaanut aappariinnut angutaannarnut taamaaqataanik pisinnaatitaaffiliinissaq ajornarsimavoq. Tamanna pissutsinik assigiinngitsunik pissuteqarpoq, tassunga ilanngullugu anaanaasup sulinnigiffeqarsinnaatitaanerani meeqqap paaqutarineqarnissaa kisimi eqqarsaatigineqanngimmat, kisiannili aamma anaanaasup ernereernermi kingorna qasuersaarfissaqarnissaa.

Malittarisassat ullumikkut atuuttut aamma isumaqarput arnaq meerartaartoq meeqqap annivigisaatut nalunaarsorneqartarmat. Taamaattumik erniunermi kinarpiaq anaanaanersoq aalajangersarneqareertarpoq, anaanaassuserlu taanna aatsaat meeravissianngortitsinikkut, aatsaat meeraq pingasunik ukioqalerpat pisinnaasukkut, taarserneqarsinnaalluni.

Taamaalilluni taamaaqataanik angutit angajoqqaajusut 2-t taamatut pisinnaatitaaffileraluaraanni tamanna anaanaasup sulinnigiffeqarsinnaatitaanerani ingiaanermik tamatigut isumaqassaaq.

Sulinnigiffeqarneq meeraq peqatigalugu ingerlanneqassaaq

Siunnersuut sulinnigiffeqarnerup aallaavittut meeraq peqatigalugu ingerlanneqarnissaanik nuutaatut aalajangersagartaqarpoq. Tamannali siunnersuummi § 19 kiisalu § 20, imm. 2 naapertorlugit angajoqqaanut erninerup kingorna sapaatit akunnerini siullerni 15-ini aamma 19-ini meeqqaminnik annaasaqartunut atuutinngilaq.

Aalajangersakkakut erseqqissarneqarpoq inatsisartut inatsisaat pingaarnertut meeqqanit isigalugu atuarneqassasoq, taamatullu aamma sulinnigiffeqarneq pingaarnertut meeqqap paaqqutarineqarneranut isumassorneqarneranullu atorneqassasoq.

Angajoqqaat sulinnigiffeqartut aallaavittut ullut tamaasa meeqqamut attaveqarnissaat aalajangersakkap malitsigissavaa.

Aalajangersagaq ima killiliitigisumik paasineqassanngilaq assersuutigalugu angajoqqaajusup arlaata ulluni marlussunni piniariarsinnaanissaa imaluunniit angajoqqaat sapaatit akunnerisa naanerani meeqqaminnik paarisisinnaanissaat inissaqassanani.

Pingaaruteqarpoq aalajangersakkap angajoqqaat inatsisitigut innarlitsaaliugaanerat, nammineq inuuneqarnerup ataqqineqarnissaa ilanngullugu, akigalugu timitalerneqannginnissaa. Taa maattumik aalajangersagaq aallaavittut pisuni erseqqilluinnartuni aatsaat atorneqartassaaq, assersuutigalugu meerap illoqarfimmi nunaqarfimmiluunniit allami najugaqarpat, imaluunniit ataataasup kissaatiginnippagu meeqqamut attuumassuteqarnissaani, tamatumalu malitsigisaanik ataataassutsini akueriumanngippagu.

2.6 Angajoqqaanut aningaasaqarniarnikkut atukkatigut pitsanngoriaatit allat

Angajoqqaanut piffissami sulinnigiffeqarfiusumi appasissunik akissarsialinnut pissutsit siunnersuutikkut pitsaanerulersinneqassapput.

Sulinnigiffeqarnermi akissarsiaqarsinnaatitaaneq erninermulluunniit atatillugu ullormusiaqarsinnaatitaaneq piffissaq sulinnigiffeqarfiusoq sioqqullugu sapaatit akunnerini kingullerni 13-ini nalunaaquttap akunneri pineqartup suliffigisimasai tunngavigalugit naatsorsorneqartarmata, angajoqqaaqarsinnaavoq tiimikissimanertik pissutigalugu piffissami sulinnigiffeqarfiusumi isertitaqartunik ilaqutariit inuuniarnerannut naammattusaaruminaatsunik.

Siunnersuutikkut aaqquissuussinermik eqqussisoqassaaq angajoqqaat periarfissillugit tapilius-sanik pisortanit ikiorsiissutinut tapilius-sanik qinnuteqarsinnaanissaannut, sulinnigiffeqarnerminni ima ikitsigisunik isertitaqartarpata pilersorneqarnermut tunngavigissallugit naammangitsunik.

Malittarisassat ullumikkut atuuttut malillugit nalunaaquttap akunnerinik naatsorsuineq nalunaaquttap akunneri pineqartup suliffigisimasai, kiisalu akissarsiaqarluni feriarnersiutisiaqarluniluunniit feriarfigisimasai, suliaminut atatillugu pikkorissarnernut peqataaffigisimasai, suliffeqarnermilu ikiorsiissutinik pissarsisinnaatitaaffigisimasai aallaavigalugit pisarpoq.

Siunnersuutikkut nalunaaquttap akunneri pineqartup suliffigisimasai suli aallaavigineqartasapput. Piffissalli ilaat suliffiunngitsut assigiinngitsut naatsorsuinnermut ilaatinneqannginnissaat nutaatut eqqunneqassaaq. Tamatumani pineqarput makku pissutigalugit piffissat sulinngiffiusut:

- Napparsimaneq, apeqqutaatinnagu pineqartoq piffissami suliffeqarnermit ikiorsiissutinik pisinnaatitaasimanersoq.
- Inatsisartut inatsisaat manna malillugu sulinnginnerit, taakkununga ilanngullugit naartunermik pissuteqartumik sulinnginnerit imaluunniit arnap najugaqarfigisami avataani erninissaa pissutigalugu sulinnginnerit.
- Tunisassiassaaleqineq silallu qanoq innera pissutigalugit piffissap ilaani suliffissaa-leqinerit.
- Feriarnert, apeqqutaatinnagu tamanna akissarsiaqarluni akissarsiaqarnaniluunniit imaluunniit feriarnersiuteqarluni ingerlanneqarsimanersoq.
- Akissarsiaqarani pikkorissarluni qaffasinnerusunilluunniit ilinniagaqarnerit suliffeqaannarsinnaanermut pingaarutillit.

Assersuutigalugu naartusut, tamakkiisumik suliinnaraluarunik nakorsat suliaminnut atatillugu naliliinerat tunngavigalugu namminerminnik naartuminnillu ulorianartorsiortitsisinnaanertik pissutigalugu piffissap ilaannaa sulilersut, siunnersuut malillugu piffissami sulinngiffeqarfigisaminni eqqorneqassanngillat, nalunaaquttap akunnerisa suliffigisimasaasa naatsorsorneqarnerani piffissap ilaannaani sulilerneq naatsorsuutigineqassanngimmat.

Taamaaqataanik angajoqqaq tunisassiassaaleqineq silaalluunniit ajornera pissutigalugit suliffimminnit angerlartinneqartariaqalersoq piffissami sulinngiffeqarfiusumi isertitaminit ilanngaanneqassanngilaq.

3. Pisortanut aningaasatigut allaffissornikkullu kingunerisassai

3.1 Pisortanut aningaasatigut kingunerisassai

Erninermut atatillugu ullormusianut aningaasartuutit tamarmiusut 2019-imi 36,7 mio. kr.-iusussatut missingerneqarput. Taakku 90 pct.-ii (33 mio.kr.) Namminersorlutik Oqartussanit 10 pct.-iilu (3,7 mio. kr.) kommuninit aningaasalersorneqarput.

Namminersortunut erninermut aningaasaateqarfik.

Erninermut aningaasaateqarfiup utertitsisarnermut aningaasartuutai aningaasalersorneqassapput ilaatigut sulisitsisut akileeqaataassutaannit, sulisoqarnermut akitsuut assigalugu taamatullu najoqqutassaqluni sulisitsisunit akilerneqartartussanit, ilaatigullu Namminersorlutik Oqartussanit ukiumoortumik aningaasaliissuteqartarnikkut, namminersortuni sulisunut erninermut atatillugu ullormusianut massakkut aningaasartuutaasartunut naapertuuttunik angajoqqaatut sulinngiffeqartarnerup sapaatit akunnerinik sisamanik sivitsorneqarneranut aningaasartuutit ilanngullugit.

Naatsorsueqqissaartarfiup naatsorsorsimavaa suliffeqarfinni namminersortuni sulisunut erninermut atatillugu Namminersorlutik Oqartussat kommunillu aningaasartuutaat tamarmiusut 2016-imi erninermut atatillugu ullormusianut aningaasartuutit tamarmiusut 45 pct.-iisa missaannut naapertuuttut. Taamaattorli paasissutissat pitsaassusiat eqqarsaatigalugu nalornissuteqarneq pissutigalugu naatsorsuineq nalorninartortaqaarsinnaavoq. Kisitsisip 2020-mi 16. mio. kr.-it missaanniinnissaa missingerneqarpoq. Taamaalluni Namminersorlutik Oqartussanit kommuninillu erninermut aningaasaateqarfimmut ukiumut 16 mio. kr.-it missaannik aningaasaliissuteqartoqartassaaq.

Tamatuma saniatigut namminersortuni suliffeqarnermi angajoqqaatut sulinngiffeqarnerup sapaatit akunnerinik sisamanik sivitsorneqarneranut aningaasartuutit matussuserneqarnissaanut aningaasaateqarfik aningaasaliivigineqassaaq. Aningaasartuutaanerusussat tamarmiusut Aningaasaqarnermut Naalakkersuisoqarfimmit 7,8 mio. kr.-inut missingerneqarsimapput.

Taakkunannga aningaasartuutit 45 pct.-iisa namminersortuni suliffeqarnermut tunnganissaat missingerneqarpoq. Aningaasartuutaanerusussat naatsorsorneqarnerini ilaatigut sulinngiffeqartut tamarmik piffissaq tamaat suliffeqarsimanissaat, ilaatigullu suliffeqarsimasut taama amerlatigisut nalinginnaasumik angajoqqaatut sulinngiffeqarsimasut aamma angajoqqaatut sulinngiffeqarnerup sivitsorneqarneranik atuinissaat aallaavigineqarsimavoq.

Nalilerneqarporli inuit arlallit sulinngiffeqalinnginnerminni piffissap ilaannaani suliffeqarlutik sulisarsimanissaat, taamatullu aamma angajoqqaatut sulinngiffeqartarnerup

sivitsorneqarnerata atorneqannginnissaa inuit ilaannit toqqarneqartarumaartoq. Sulinermik

Inuussutissarsiuteqartut Kattuffiata (SIK) taamaalluni ersersissimavaa isumaqarlutik

suliamik ilinniagaqanngitsut ikittuinnaat sulinngiffeqartut angajoqqaatut sulinngiffeqarnerup

sivitsorneqarneranik atuisassasut, erninermut atatillugu sulinngiffeqarnermi angajoqqaatullu

sulinngiffeqarnermi tamakkiisumik akissarsiaqartitsisoqanngitsillugu. Taamaattumik

aningaasartuutaanerusussaviit nalorninartortaqaarsinnaapput.

Erninnermut atatil- lugu ullormusianut anigaasartuutit agguataarneqarne- rat (mio. kr)	Katil- lugit	Kommu- nit	Namminersor- lutik Oqartus- sat	Angajoqqaatut sulin- ngiffeqartarnerup sa- paatit akunnerinik sisa- manik sivitsorneqar- neranut anigaasaar- tuutaanerusussat	Katil- lugit
AI2019-imi erni- nermut atatilugu ullormusianut ani- ngaasartuutit ta- marmiusut	36,67	3,7	33,0	7,8	44,5
Namminersortut (45 %)	16,5	1,7	14,9	3,5	20,0
Pisortat (45 %)	16,5	1,7	14,9	3,5	20,0
Ilinniartut nammi- nersortullu (10 %)	3,67	0,4	3,3	0,8	4,4

Namminersortunut erninnermut anigaasaateqarfimmut aallarniutitut anigaasaliissutissat aal-
laavittut katillugit 20 mio. kr.-iunissaat, taamaaqataanillu pisortat erninnermut anigaasaate-
qarfiannut 20 mio. kr.-iunissaat, missingerneqarpoq. 4,4 mio. kr. sinneruttut ilinniartunut
namminersorlutillu inuussutissarsiuteqartunut erninnermut atatilugu ullormusianut anigaas-
artuutininut matusissutissatut immikkoortinneqassappat.

Namminersortunut erninnermut anigaasaateqarfimmut Namminersorlutik Oqartussat anigaas-
aliissutissaasa naatsorsorneqarnerisa nalorninartortaqrarnerat eqqarsaatigalugu atuinermut ki-
sitsisiviit pigineqaleriarpata anigaasaliissutit kingusinnerusukkut iluarsiiisuteqarfingineqar-
nissaat siunniunneqarpoq.

Massakkorpiaq allaffissornikkut aqutsinnermut anigaasartuutit qanoq annertutiginnissaat eq-
qoqqissaarlugu naatsorsorneqarsinnaanngilaq. Namminersortunullu erninnermut anigaasaa-
teqarfiup ingerlanneqarneranut anigaasartuuteqartoqassaaq, ilaatigut sulisunut, ininut, qara-
saaiaqarnikkut atortunut, paasisitsiniaanermut ilitsersuisarnermullu, nittartakkamut il.il. Taak-
kununnga anigaasartuutit matussuserneqassapput anigaasanit namminersortunut erniner-
mut anigaasaateqarfiup atorsinnaasaanit.

Pisortat naligiissaarisarnermut aaqqissuussinerat.

Pisortani sulisitsisut akileeqaataasussaatitaanermut ilaatinneqassanngillat, taamalu sulisitsisut
akileeqaataassutaannik akiliisassanatik, tassami naligiissaarisarnermut aaqqissuussineq ani-
ngaasanut inatsimmi anigaasaliissuteqartarneq aquutigalugu allaffissornikkut ajornannginne-
rusumik anigaasalersorneqarneqarsinnaammat. Namminersorlutik Oqartussani kommuninilu
anigaasat akissarsianut atorneqartartut tamarmiusut ikilisinneqarnerisigut kiisalu anigaasa-

nut inatsimmi aningaasaliissutaareersutigut aningaasanut inatsimmit aningaasaliissutip aningaasalersorneqarnissaa eqqarsaatigineqarpoq.

Siunnersuutip pisortanut annertugisassaangitsumik aningaasartuutaanerunissaa naatsorsuutigineqarpoq, sulisut ilaat erninermut atatillugu sulinngiffeqarneq angajoqqaatullu sulinngiffeqarneq tamaat tamakkiisumik akissarsiaqartussatut isumaqatigiissutigut matussuserneqarsimangitsut siunissami erninermut atatillugu sulinngiffeqarnermi akissarsiaqarsinnaatitaalisammata ullumikkut erninermut atatillugu ullormusianit amerlanerusunik. Tamanna atuuppoq inunnut akunnermut 115 kr. sinnerlugu akissarsialinnut erninermut atatillugu sulinngiffeqarneq angajoqqaatullu sulinngiffeqarneq tamaat tamakkiisumik akissarsiaqanngitsunut. Assersuutigalugu akissarsiaqarluni sulisartoq nalunaaquttap akunneranut 120 kr.-sisarpoq erninermut atatillugu sulinngiffeqarnermi nalunaaquttap akunneranut minnerpaamik 96 kr.-sisassaaq, nalunaaquttap akunneranut erninermut atatillugu ullormusiaritinneqartartumit 4 kr.-it missaannik amerlanerusunik. Taamaattorli pisortani sulisut erninermut atatillugu sulinngiffeqarnermi angajoqqaatullu sulinngiffeqarnermi tamakkiisumik akissarsiaqarsinnaatitaanngitsut amerlagisassaangillat, annerusumik taamaallaat sulisut akunnermusiallit pineqarlutik. Aningaasartuutaanerussaviup naatsorsorneqarnissaa ajornarpoq, taamaattorli aningaasartuutaanerussat 0,5 mio.kr.-init amerlanerunnginnissaat missingerneqarluni.

Arnat najugaqarfigisamik avataanut erniartortussatut innersuunneqartut

Siunnersuutikkut arnat erniartortut aallarfinnit ullormit sulinngissinnaatitaalisapput. Taama pisinnaatitaaffiup, nalinginnaasumik sulinngiffeqarsinnaatitaanerup atuutilinnginnerani arnat erninermut atatillugu ullormusiaqarsinnaatitaalersissavai. Dronning Ingridip Napparsimavissuanit paasisutissat tunngavigalugit nalilerneqarpoq ukiumut arnat 200-t missaat erniartortarnissaat. Napparsimavimmi pisortat ilisimatitsissutigisimavaat, 2017-imi arnat 294-it erniartornissaminnut innersuunneqarsimasut. Taakkunannga arnat 29-t Nuummi erninissartik kissaatigisimavaat, arnat 58-it upalungaarsimanermik piareersimatitsisoqannginnera pissutigalugu innersuussaasimapput, arnat 207-it nakorsap suliaminut atatillugu naliliinera tunngavigalugu innersuunneqarsimallutik. 2018-imi arnat 310-t innersuunneqarsimapput. Taakkunannga arnat 41-t Nuummi erninissartik kissaatigisimavaat, arnallu 59-it upalungaarsimanermik piareersimatitsisoqannginnera pissutigalugu innersuussaasimapput, arnallu 210-t nakorsap suliaminut atatillugu naliliinera tunngavigalugu innersuussaasimallutik. Naatsorsuutigineqarpoq naartusut agguaqatigiissillugu erninissartik ullunik 25-nik sioqqullugu aallartartut.

Naartusut erninnginnerminni sapaatip akunneri 2-t sioqqullugit sulinngiffeqarsinnaatitaapput. Tamanna ima isumaqarpoq, arnanut sulisinnaasunut erninermut atatillugu ullormusiat annertoqataannik akissarsiaqarsinnaatitaaneq atuutilersinneqassasoq, arnallu ilinniagaqartut ilinniagaqarnerit ingerlaneranni ulluni 11-ni sapaatit nalliuttullu pinnagit ilinniarnersiutit annertoqataannik akissarsiaqarsinnaatitaalisasut. Naatsorsuutigineqarpoq, ullunut

suliffiusunut 9-nut aningaasartuuteqarnerulertoqassasoq. Arnat 18-65-illu akornanni ukiulinnit 71,5 pct-tit inuussutissarsiorlutik sulisinnaasut naatsorsuutigineqarpoq. Tamanna tunngavigalugu nalilernerqarpoq arnat naartusut 140-t missaat ulluni 9-ni erninermut atatillugu ullormusiat nalingannut akissarsiaqarnissamut piunasaqarsinnaasut, tamannalu 0,9 mio. kr.-inik aningaasartuutaanerussaaq. Tassunga ilanngullugu ilinniagaqartunut minnerusumik aningaasartuuteqarnerusoqassaaq. Ukiumut aningaasartuuteqarneruneq katillugu 1 mio. kr.-iussangatinneqarpoq.

Meeraq sulinnigiffeqarnerni toquppat sapaatit akunneri 4-ni sulinnigissinnaatitaaneq
Siunnersuut malitsigalugu angajoqqaat sulinnigiffeqarnermi meeqqamik annaasaqartut sapaatit akunnerini sisamani sulinnigissinnaatitaalerput, erninermut atatillugu ullormusianut annertungitsumik aningaasartuuteqarnerulermik kinguneqartussamik. Tamatumani ukiumut meeqqat 2-4-t pineqartassasut naatsorsuutigineqarpoq, ukioq naallugu 0,05 mio. kr.-inik aningaasartuuteqarnerunermut naapertuuttumik.

Nalunaaquttap akunnerisa erninermut atatillugu ullormusiat naatsorsorneqarnerinut tunngaviusartut naatsorsorneqartarnerinut tunngaviusut allanngortinneqarnerat
Akissarsiaqarlutik sulisartut sapaatit akunnerini kingullerni 13-ini akunnerni aalajangersimasuni suliffeqarsimanngitsut nalunaaquttap akunnerisa suliffiusimasut naatsorsorneqartarnerat siunnersuutikkut allanngortinneqarnissaa siunniunneqarpoq, taamaalilluni ilaatigut napparsimaneq, tunisassiassaaleqineq silalu pissutigalugit sulinnigiffeqarnerit ilaatinneqartartussaannngillat. Tamanna sulisitsisunut namminersortunut taamatullu aamma pisortani sulisitsisunut annikitsumik aningaasartuuteqarnerulermik malitseqassaaq. Aningaasartuutaanerussassalli missingerneqarsinnaannngillat, tassami paasissutissat aningaasatigut kingunerisassaasa naatsorsorneqarnerannut tunngaviusinnaasut pigineqanngimmat.

Pisuni immikkut ittunik ilassutitut pisortanit ikiorserneqarsinnaatitaaneq
Erninermut atatillugu ullormusiat sulinnigiffeqarnermiluunniit akissarsiat ima annikitsigippata naammattumik pilersorneqarnermut tunngaviusinnaanatik, taava inatsisissatut siunnersuutikkut pisortanit ikiorsiissutit pillugit inatsit malillugu ilassutitut ikiorserneqarsinnaatitaanermik eqqus-sisoqarpoq. Aningaasartuutaanerussaviilli naatsorsorneqarsinnaannngillat, aningaasartuu-taanerussassalli annikitsuinnaanissaat missingerneqarluni.

3.2 Pisortanut allaffissornikkut kingunerisassai

Pisortat naligiissarisarnermut aaqjissuussinerata allaffissornikkut aqunneqarnerata Aningaasqarnermik Sulisoqarnermillu Aqutsisoqarfimmit isumagineqarnissaa naatsorsuutigineqarpoq.

Aaqjissuussineq atuuttoq malillugu erninermut atatillugu ullormusiaqarnissaaq pillugu suliasat kommuninit suliarineqartarput. Naatsorsueqqissaartarfiup naatsorsorsimavaa 2015-imi

pisortani sulisunut tunngatillugu erninermut atatillugu suliassat 553-iusimasut suliffeqarfiillu namminersortut eqqarsaatigalugit suliassat 518-iusimallutik. Ingerlataqarfinnili marluusuni suliassat amerlassusii ukiumiit ukiumut nikeralaartarput. Taakkununga ilanngunneqassapput ilinniartunut kiisalu namminersorlutik inuussutissarsiuteqartunut tunngatillugu suliassat. Ilinniartut namminersorlutillu inuussutissarsiuteqartunut erninermut atatillugu ullormusiaqartitsinermut tunngatillugu suliassat ukiumut 50-it 100-ullu akornanni amerlassuseqarnissaat missingerneqarpoq.

Taamaattumik missingerneqarpoq erninermut atatillugu ullormusiaqarneq pillugu suliassat ullumikkut kommuninit sularineqartartut 45 pct.-iisa missaat siunissami namminersortuni suliffeqarnermut erninermut aningaasaateqarfimmi utertitsinissamik suliassanngorumaartut suliassallu 45 pct.-ii pisortat naligiissaarisarnermut aqqissuussinerata aqutsisoqarfianut nuunneqarlutik.

Kommunit siunissami ilinniartunut namminersorlutillu inuussutissarsiutilinnut erninermut atatillugu ullormusiaqartitsinermut tunngatillugu suliassat kisiisa sularisalertussaavaat, taakkulu ullumikkut suliassaasartut tamarmik 10 pct.-iisa missigigaat missingerneqarpoq.

Tamanna isumaqarpoq kommunit allaffissornikkut nukiit erninermut atatillugu ullormusiat pillugit sulianut ullumikkut atorineqartartut 90 pct.-inik allaffissornikkut sipaagaqassasut . Qeqqata Kommuniani misissuinikkut takutinneqarpoq erninermut atatillugu ullormusianut tunngatillugu suliassat 125-iugaangata ukiumut sulisoq 1 atorineqartartuq. Taamaalilluni namminersortuni sulisunut erninermut atatillugu ullormusiat tunniunneqartarnerannut atatillugu suliassat sularineqartarnerannut ukioq naallugu sulisut 4-t missaat ullumikkut atorineqartarput, pisortanilu sulisunut ullormusiat tunniunneqartarnerannut atatillugu suliassat sularineqartarnerannut ukioq naallugu sulisut 4,5-it atorineqartarlutik.

Taamaalilluni namminersortunut erninermut aningaasaateqarfik eqqarsaatigalugu kommunit allaffissornikkut sipaarutissaat aallaavittut ukioq naallugu sulisunut 4-nut naapertuutissapput.

Tassunga ilanngunneqassaaq kommunit suli nukissanik sipaagaqarnerusussaammata ukioq naallugu sulisunut 4,5-it missaannut naapertuuttumik, tassami pisortat naligiissaarisarnermut aningaasaateqarfiata Aningaasaqarnermik Sulisoqarnermillu Aqutsisoqarfimmit allaffissornikkut aqunneqarnissaa eqqarsaatigineqarmat.

Taamaalillutik kommuninut ataatsimoortumik tapiissutit ikilisinneqassapput ukiumut suliassanik sularinnittartunut 8,5-inut aningaasartuutitut naapertuuttumik.

Kommunit maannamutut inunnut suliffeqarnerup avataaniittunut erninermut atatillugu ullormusianik tunniussisartuuginnassapput, utertitassanik tunniussisarneq pisortat erninermut atatillugu naligiissaarisarnermut aqqissuussinerannut namminersortunullu erninermut aningaasaateqarfimmut nuunneqarluni.

Ilinniartut namminersorlutillu inuussutissarsiutillit eqqarsaatigalugit erninermut atatillugu ul-lormusianut tunngatillugu suliassat amerlassusii annerpaamik suliassat tamarmiusut 10 pct.-erissagaat, ukiumut suliassanut 55-inut naapertuuttut, missingerneqarpoq. Suliassat amerlassusii ukioq naallugu sulisunut naatsorsorlugit 0,5-init ikinnerussapput.

Taamaalilluni ukioq naallugu sulisorisat 8,5-it kommuninit nuuttariaqassapput. Aningaasat ukioq naallugu sulisorisanut sisamanut naapertuuttut pisortat erninermut atatillugu sulinngif-feqarnermut aningaasartuutitut naligiissaarisarnermut aaqqissuussinerata allaffissornikkut aqunneqarneranut atortussat pisortat erninermut atatillugu naligiissaarisarnermut aaqqissuussinerannut nuunneqassapput, taamatullu aamma aningaasat ukioq naallugu sulisunut 1,5-inut naapertuuttut sulisitsisut akileeqataassutissaasa akilersinniartarnerannut atatillugu aningaasartuutitut matussissutissatut Akileraartarnermik Aqutsisoqarfimmut nuunneqassallutik.

Tamatuma saniatigut qarasaasiaqarnikkut periaatsit atuuttut naleqqussarneqarnerannut atatil-lugu qarasaasiaqarnermut aningaasartuuteqartoqarnissaa naatsorsuutigisariaqarpoq, tassami akiliisitsiniartarnermut periaatsimi siunissami ilaatigut namminersortuni pisortanilu suliffe-qarnek immikkoortinneqarsinnaasariaqarmata, kiisalu aamma sulisitsisunut utertitassanik tun-niussinermut qarasaasiaqarnikkut periaatsinut aningaasartuuteqartoqartariaqarmat. Nalorni-narsinnaasut apeqqutaatillugit qarasaasiaqarnikkut periaatsinut aningaasartuutit tamarmiusut 1. mio. kr.-it missaannut missingerneqarput.

Ukioq naallugu sulisorisanut sinneruttunut 3-nut tunngatillugu aningaasat pineqartut 1,5 mio. kr.-inullu naapertuuttut qarasaasiaqarnikkut atortunut pisariaqartunut aaqqissuussinerullu pilersinneqarneranut atatillugu allaffissornikkut aningaasartuutitut allanut atorneqassapput.

Ataatsimut isigalugu nalilerneqarpoq allaffissornikkut nukiit ullumikkut kommunini ator-neqartartut aaqqissuussinermit nutaami Namminersorlutik Oqartussat, Akileraartarnermik Aqut-sisoqarfik ilanngullugu, kommunillu allaffissornikkut suliassaannik matussusiinnaassasut, taamaalillunilu nukissanik nutaanik ilasinissaq pisariaqassanani.

4. Inuussutissarsiornermut aningaasatigut allaffissornikkullu kingunerisassai

4.1. Inuussutissarsiornermut aningaasatigut kingunerisassai

Erninermut aningaasaateqarfimmik pilersitsinikkut inuussutissarsiortut pisussaaffilerneqas-sapput aaqqissuussinermut sulisitsisut akileeqataassutaannik akiliisalernissamut, akissarsiat tunniunneqartartut tamarmiusut 0,05-0,15 promilliannik annertussuseqartussatut missingerne-qartunik. Sulisitsisut akileeqataassutissaata annertussusissaanut ilaatigut erniusartut amerlas-susii, ilaatigullu utertinneqarsinnaasut amerlanerpaaffigisinnaasaasa annertussusiat taamalu utertitsissutaasinnaasut annertussusii apeqqutaassapput.

Erninermut aningaasaateqarfimmut inuussutissarsiortut akileeqataassutaat taamaattoq inuus-sutissarsiorneq ataatsimut isigalugu annertuumik aningaasartuuteqarnerulernermik kingune-qarnaviangilaq, tassami tamatumani nammaqatigiilluni agguataareqqinneq taamaallaat pine-

qarmat. Suliffeqarfiit ikittunik erninermut atatillugu sulinngiffeqarsinnaatitaanermik atuisus-
satut naatsorsuutigineqartunik sulisullit, suliffeqarfinnut amerlasuunik erninermut atatillugu
sulinngiffeqarsinnaatitaanermik atuisussatut naatsorsuutigineqartunut sulisulinnut akileeqataa-
sarnissaat naatsorsuutigineqartariaqarpoq.

Sulisulli isumaqatigiissutit malillugit imaluunniit atorfeqartitaanermi atugassarititaasut tun-
ngavigalugit erninermut atatillugu sulinngiffeqarnermi angajoqqaatullu sulinngiffeqarnermi
tamakkiisumik akissarsiaqarsinnaatitaanngitsut nalunaaquttallu akunneranut 115 kr.-init ikin-
nerusunik isertitaqartartut ataatsimut isigalugit inuussutissarsiortut annertugisassaangitsu-
mik aningaasartuuteqarnerussapput.

Erninermut aningaasaateqarfeqalernikkut sulisut erninernut atatillugu sulinngiffeqarnermi
angajoqqaatullu sulinngiffeqarnermi akissarsiaqarsinnaatitaanngitsut erninermut atatillugu
sulinngiffeqarnerminni angajoqqaatullu sulinngiffeqarnerminni aallaqqaammut akissarsiamik
ikinnerpaamik 80 %-ii akissarsiarisinnaavaat. Sulisoq nalunaaquttap akunneranut 120 kr.-inik
akissarsialik taamaalillutik akissarsiaqassaaq ikinnerpaamik nalunaaquttamut ataatsimut ullu-
mikkut ullormusiatut tunniunneqartartumit 4 kr.-inik amerlanerusunik.

Sulisitsisoq utertinneqarsinnaasut amerlanerpaaffigisinnaasaannit qaffasinnerusunik akissarsi-
sitsisarnissamut pisussaaffilerneqanngimmat aningaasartuutaanerusoq tamanna annikitsuin-
naassaaq.

Angajoqqaatut sulinngiffeqarnerup sapaatit akunnerinik sisamanik sivitsorneqarnerata malitsi-
gisaanik, sulisitsisut ilaatigut sulisunut taartaasussanut aningaasartuuteqarnerulernissaat naat-
sorsuutigineqarpoq. Aningaasartuutilli taassuma annikitsuinnaanissaa naatsorsuutigineqar-
poq, minnerunngitsumik piffissami ikaarsaariarfiusumi sulisut amerlanerpaartaasa taamaallaat
erninermut atatillugu ullormusiaqarfigisinnaasaanni. Sulisitsisut sulinngiffeqarnermi akissar-
siaqartitsisussaataaernerat 2020-mi septembarip ulluisa aallaqqaataanni atuutilerpat, sulisitsi-
soq tamanna peqatigalugu akissarsianut aningaasartuutiminut utertitsivigineqarsinnaatitaa-
lissaaq.

Siunnersuutikkut arnanut najugaqarfigisap avataanut erniartortussanut sulinngissinnaatitaaneq
eqqunneqassaaq. Tamatuma inuussutissarsiortunut taasariaqartumik aningaasartuutaanerunis-
saa naatsorsuutigineqanngilaq, tassami piffissami peqanngiffiusumi akissarsiaqartitsinissamut
sulisitsisoq pisussaaffilerneqanngimmat, arnamut atorfeqarnermi atugassarititat sulinnginner-
mi akissarsiaqartitsinissamut tunngavissiiingippata, taamatullu aamma siunnersuut naatsor-
suutigineqanngimmat, arnat najugaqarfimmik avataanut erniartortussatut innersuunneqarner-
tik pissutigalugu sulinngitsut amerlassusiinik allannguuteqartitsissasoq.

Tamatuma saniatigut angajoqqaat sulinngiffeqarnerminni meeqqamik annaasaqartut siunner-
suutikkut sapaatit akunnerini sisamani sulinngissinnaatitaallissapput. Siunnersuutilli inuussu-
tissarsiortunut taasarialimmik aningaasartuutaanerulernissaa naatsorsuutigineqanngilaq, inuit
taamatut pisinnaatitaaffimminnik atuisussat ikittuinnaasussaammata.

Taamaattorli aningaasartuutaanerusussaviit tamarmiusut naatsorsorneqarsinnaanissaannut kisitsisitigut paasissutissanik tunngavissanik pissarsinissaq ajornarsimavoq. Tamatumunnga ilaatigut pissutaavoq, nalilerneqarsinnaanngimmat erninermut aningaasaateqarfimmik pilersitsineq akissarsiaqarlutik sulisartut ullumikkornit amerlanerusut sulinngiffeqarsinnaatitaanerminnik atuissanersut. Tamatuma peqatigisaanik inuit qassit angajoqqaatut sulinngiffeqarsinnaatitaanerup sivitsorneqarneranik atuissanersut nalilerneqarsinnaanngilaq.

Siunnersuut erninermut aningaasaateqarfimmit utertitsivigineqarnissamik qinnuteqaateqarnermut taakkulu suliarinerannut atatillugu allaffissornikkut kinguneqassaaq. Qinnuteqaatit ilusissaannut piumasaqaatit nalunaarummi aalajangersarneqarumaarput, tassarilu qinnuteqartarnerup ingerlasarnerata sapinngisamik pisariinnerpaanissaa pingaartinneqarumaarpoq, inuussutissarsiortunut allaffissornikkut kingunerisassai minnerpaaffissaminniitinniarlugit.

Erninermut aningaasaateqarfimmut sulisitsisut akileeqataassutaata akilersinniarneqartarnera allaffissornikkut kinguneqassanngilaq, sulisoqarnermut akitsuut, sulisitsisut Sulisoqarnermi akitsuut pillugu Inatsisartut inatsisaat malillugu akiligassareriigaat, peqatigalugu akileqquneqartassammat.

5. Avatangiisinut, pinngortitamut innuttaasullu peqqissusiannut kingunerisassai

Siunnersuutip avatangiisinut, pinngortitamut innuttaasullu peqqissusiannut kinguneqartussatut nalilerneqanngilaq.

6. Innuttaasunut kingunerisassai

Siunnersuutip suliffeqarnermi angutit arnallu akornanni naligiissitaanermut annertuumik pingaaruteqarnissaa nalilerneqarpoq. Arnat kinguaassiorsinnaasutut ukioqarnertik pissutigalugu suliffeqarnermi siunissami tunulliunneqartannginnissaat erninermut aningaasaateqarfimmik pilersitsinerup malitsigissagaa naatsorsuutigineqarpoq.

Malittarisassanut atuuttunut sanilliullugu nalinginnaasumik erseqqissaanernik aqqissuussaanermillu pitsaanerusumik siunnersuut imaqarpoq. Tamatuma malittarisassat inissisimanerminnut pingaarutillit iserfiginissaannut innuttaasut ajornannginnerusumik periarfissaqalersissaavaat.

Angajoqqaatut sulinngiffeqartarnerup sapaatit akunnerinik sisamanik sivitsorneqarnera ilaqtariinnut meerartalinnut pitsaasumik kinguneqassaaq, erninerup kingorna piffissami siullermi sivilunerusumik imminnut najorsinnaalissagamik, soorlu aamma meeqqat utoqqaanerusassasut ulluunerani paaqqutarineqalerunik meeraaqqerivimmiluunniit aallartikkunik.

Siunnersuut suliniutinik assigiinngitsunik aamma imaqarpoq innuttaasunut sulinngiffeqartussanut pitsaasunik kinguneqartussanik. Tamatumani taaneqarsinnaapput arnat najugarisamik avataanni erniartortussatut innersuunneqartut sulinngissinnaatitaalernissaat, angajoqqaanut

piffissami sulingiffeqarfiusumi meeqqaminnik annaasaqartut sulingissinnaatitaalernissaat ,
kiisalu angajoqqaanut suaaraqatigiinnut atugassarititaasut pitsaanerulernerat.

Peqatigitillugu ilaqutariinnut naartunermut erninermullu atatillugu sulingiffeqartunut piler-
sornerqarnissamut tunngaviit pitsaanerulissapput.

7. Kingunerisassai pingaarutillit allat

Siunnersuutip pingaarutilinnik allanik kinguneqarnissaa naatsorsuutigineqanngilaq.

8. Oqartussanik suliniaqatigiiffinnillu il.il. tusarniaaneq

Siunnersuut uu. qqqq 2019-imi www.naalakkersuisut.gl-imi tusarniaasarfimmi tamanut
saqqummiunneqarpoq, tusarniaanermut atatillugu akissuteqarnissaq uu. qqqq 2019-imut
killilerneqarluni.

Siunnersuut piffissami 2019-imi uu. qqqqmit uu. qqqqmut tusarniaavigineqartussanut
ukununnga tusarniaatigineqarsimavoq:

Siunnersuummi aalajangersakkanut ataasiakkaanut nassuiaatit

§ 1-imut

Imm. 1-imut

Inuit qaqugukkut naartunermut erninermullu atatillugu sulinngiffeqarsinnaatitaanersut sulinngissinnaatitaanersullu, angajoqqaatut sulinngiffeqarsinnaatitaanersut, meeravissartaarnissaq siunertaralugu meeqqamik paaqqtarineqartussamik tigusinermut atatillugu sulinngiffeqarsinnaatitaanersut, kiisalu meeravissartaarnermut atatillugu sulinngiffeqarsinnaatitaanersut aalajangersakkami killilerneqarput.

Sulinngiffeqarsinnaatitaaneq isumaqarpoq inuk pineqartoq sulinngissinnaatitaasoq. Inunnut suliffeqartunut tamanna isumaqarpoq pineqartoq suliffigisaminit sulinngissinnaatitaasoq. Inunnut suliffeqanngitsunut tamanna isumaqarpoq piffissami sulinngiffeqarfiusuni pineqartup suliartoqquneqarsinnaanissaa piunasaqaatigineqarsinnaanngitsoq.

Inuk pineqartoq piffissami sulinngiffeqarfiusumi qanoq akissarsiaqarsinnaatitaanersoq inatsisartut inatsisaanni kapitalini 2-mi 5-miluunniit, kiisalu pineqartup atorfeqartitaanerani atugasarititaasuni, aalajangersarneqarsimavoq.

Siunnersuummi sulinngiffeqarsinnaatitaneq sulinngissinnaatitaanerlu immikkoortinneqarput. Siunnersuut manna malillugu sulinngiffeqarnermi akissarsiaqarsinnaatitaanermut sulinngiffeqarneq kisimi pineqarpoq. Sulinnginnerli § 46, imm. 3 naapertorlugu erninermut atatillugu ullormusiaqarsinnaatitaanermut ilaatinneqarpoq.

Assersuutigalugu arnaq akissarsiaqarluni sulisartoq § 5 malillugu naartunerminut attuumassutilimmik sulinngittoq aatsaat akissarsiaqarsinnaatitaassaaq tamanna pineqartup atorfeqartitaanerani atugasarititaasuni aalajangersarneqarsimappat. Pineqartorli piffissami erninermut atatillugu ullormusiaqarsinnaatitaassaaq.

Inatsisartut inatsisaat malillugu sulinngiffeqarsinnaatitaassagaanni Kalaallit Nunaanni aalajangersimasumik najugaqarlunilu inuit nalunaarsorsimaffiannut nalunaarsimanissaq nr. 1-imi aalajangersarneqarpoq.

Aalajangersimasumik najukkatut paasineqassaaq, feriarneq, suliamut atatillugu angalaneq, napparsimaneq assigisaalluunniit pissutigalugit peqanngikkallanngikkaanni, sumiiffik aalajangersimasumik siniffiusartoq pigisanillu inissisimatitsiviusoq.

Sulinngiffeqarsinnaatitaaneq aamma inunnut Nunani Avannarlerni Isumaginninnikkut Isumannaaallisaaneq pillugu Isumaqatigiisummut imaluunniit nunat tamalaat akornanni isumaqatigiisummut allamut Kalaallit Nunaannut atuuttumut ilaatinneqartunut aamma atuuttoq nr. 2-mi aalajangersarneqarpoq.

Imm. 2-mut

Meeqqap erniunerata imaluunniit tiguneqarnerata kingorna sulinngiffeqarneq meeraq peqatigalugu ingerlanneqassasoq aalajangersakkami aalajangersarneqarpoq.

”Tiguneqarnera” tassaavoq piffissaq angajoqqaat meeravissiartaartut meeqqamik tigusiffiat. Meeravissiartaarnermut tunngatillugu malittarisassat allat eqqarsaatigalugit §§ 8-10 taakkununggalu nassuiaatit innersuussutigineqarput.

Sulinngiffeqartup meeqqamik najugaqateqarnissaa piumasaqaataangilaq, sulinniffeqartulli aallaavittut ullut tamaasa meeqqamik najuisarnissaa piumasaqaataalluni.

Taamaattumik naammangilaq oqarasuaatikkut oqaloqatigiittarnertigut imaluunniit attaveqatigeeriaatsit elektroniskiusut Facetime-itut Skype-itulluunniit ittut aqqutigalugit meeqqamut attaveqartarnissaq.

Angajoqqaat ullut ataasiakkaat meeraq najornagu atoraluarpatigut sulinngiffeqarsinnaatitaaneq atorunnaassanngilaq. Taamaalilluni aalajangersagaq aporfussanngilaq assersuutigalugu sulinngiffeqartup sapaatip akunnerata naanerani piniariarsinnaaneranut, imaluunniit sapaatip akunnerata naanerani angajoqqaat meeqqaminnik allanut paarsisitsisinnaanerannut.

Aalajangersakkap malitsigaa angajoqqaq aallaavittut sulinngiffeqarsinnaatitaassanngimmat, pineqartoq illoqarfinni nunaqarfimmiluunniit allami meeqqap najugaqarfiginngisaani najugaqarput, tassami taamaattoqarpat pineqartup ulluinnarni najuisarnissaa taava naatsorsuutigisariaqanngimmat.

Taamaattoq § 19 malillugu §§ 3 imaluunniit 7 malillugit sulinngiffeqarsinnaatitaanerit atorunnaassanngillat meeraq toqungalluni erniuppat, meeravissiassanngortinneqarpat, angerlarsimaffiup avataanut inissinneqarpat, imaluunniit meeraq erniunermini kingornatigut sapaatit akunnerisa 15-it imaluunniit 19-it siulliit iluanni toquppat.

§ 2-mut

Inatsisartut inatsisaanni malittarisassat sulinngiffeqartumut ajoqutaasumik sanioqqunneqarsinnaannginnerat aalajangersakkami aalajangersarneqarpoq.

Assersuutigalugu sulisitsisup akissarsiaqarluni sulisartoq isumaqatigiissuteqarfigisinnaanngilaq sapaatit akunnerini quliinnarni angajoqqaatut sulinngiffeqarsinnaatitaanerani, imaluunniit akissarsiaqarluni sulisartoq kapitali 2 malillugu sulinngiffeqarnermini akissarsiaqarsinnaatitaassaaq taamaallaat erninermut atatillugu sulinngiffeqarnermini, kisiannili angajoqqaatut sulinngiffeqarnerminiunngitsoq, akissarsiaqarsinnaatitaassasoq.

Assersuutit tamakkiisuunngillat.

§ 3-mut

Imm. 1-imut

Naartunermut erninermullu atatillugu arnap sulinnigiffeqarsinnaatitaanera aalajangersakkami aalajangersarneqarpoq.

Arnaq ataatsimik meerartaartoqartillugu erninissamut ulloq naatsorsuutigineqartoq sioqqullugu sapaatit akunnerini 2-ni naartunermi sulinnigiffeqarsinnaatitaavoq ernereernerullu kingorna sapaatit akunneri 15-ini erninermut atatillugu sulinnigiffeqarsinnaatitaalluni.

Ullormit erninissamut naatsorsuutigineqartumut sapaatit akunnerisa 2-nngornerinik naatsorsuuteqlernermit meeqqallu inunngornissaata tungaanut arnaq naartunermut atatillugu sulinnigiffeqarsinnaatitaavoq.

Arnaq naatsorsuutigineqartumit siusinnerusukkut ernippat, taava arnaq sulinnigiffeqarfissanik ernereernermi kingorna atorsinnaasaminik pisassaqaassanngilaq. Taamaalilluni erninerup kingorna sulinnigiffeqarsinnaatitaaneq sivitsorneqassanngilaq.

Arnaq naatsorsuutigineqartumit kingusinnerusukkut ernippat, arnaq ullormit ernivissatut naatsorsuutigineqartumit erninissap tungaanut aamma naartunermi sulinnigiffeqarsinnaatitaavoq.

Imm. 2-mut

Marlulinermi imaluunniit amerlanerusunik ataatsikkut erninermi arnap erninerup kingorna sulinnigiffeqarsinnaatitaanera aalajangersakkami aalajangersarneqarpoq.

Arnaq marlulippat amerlanerusunilluunniit ataatsikkut ernippat, taava sulinnigiffeqarsinnaatitaanerit erninerup kingorna sapaatit akunnerinut 19-imut sivitsorneqassaaq.

§ 4-mut

Arnaq nakorsat suliaminnut atatillugu kaammattuuteqarnerat malillugu najugaqarfigisami avataanut erniartortussatut innersuunneqartoq ernivissamut angalanerup ulluanit § 3-lu malillugu sulinnigiffeqarsinnaatitaanerup aallartinneranut sulinnigissinnaatitaavoq.

Aalajangersakkami pineqarput arnat peqqinnissaqarfimmi naartusulerinermut ernisussiornermullu najoqqutassiat malillugit arnap angerlarsimaffigisaata avataanut illoqarfimmi allami erniartortussatut innersuunneqartut.

Tamatumani pineqarsinnaapput arnat illoqarfimmi nunaqarfimmiluunniit ernisussiornerissamut periarfissaqaanngitsuneersut imaluunniit arnat naartunerup aarlerinartorsiortitsisinnaasutut na-

lilernerqarsimanera pissutigalugu Nuummi Dronning Ingridip Napparsimavissuani ernisussatut innersuunneqartut.

Arnat taakku ullormiit aallarfirminniit atuutilersumik § 3-lu malillugu sulinnigiffeqalersinnaanermik tungaanut sulinnigissinnaatitaapput.

Arnap nakorsanit innersuunneqartumik angalanissaa piumasqaataavoq. Tamatumunnga atatillugu atugassarititaasut Napparsimasup najugaqarfimmi avataani misissorneqarnerani katsorsarneranilu kiffartuussinerit pillugit Namminersornerullutik Oqartussat nalunaarutaanni takuneqarsinnaapput.

Arnap nammineq akilikkaminik angalanissani toqqarpagu, tassunga ilanngullugu nakorsamit innersuunneqartumik angallanneqarsinnaagaluarnermi siorna kingornaluunniit, taava pineqartoq § 3 malillugu sulinnigiffeqarsinnaatitaanerup atuutilinnginnerani sulinnigissinnaatitaassanngilaq.

§ 5-imut

Nakorsap naliliinera malillugu suliinnarnikkut naartunerup arnap naartulluunniip peqqissusiinut kingunerluuteqarsinnaanera ilimagineqarpat arnaq naartusoq § 3 malillugu sulinnigiffeqarsinnaatitaanerup atuutilinnginnerani sulinnigissinnaatitaasooq aalajangersakkami aalajangersarneqarpoq. Taamaalilluni aalajangersakkakkut arnaq naartuneq pissutigalugu sulinnigissinnaatitaavoq sulinnigiffeqarsinnaatitaalinnginnermini.

Arnap anniaataasa naartunermut attuumassuteqarnissaat piumasqaataavoq. Arnaq napparsimalerpat naartunermut attuumassuteqanngitsumik, taava aalajangersagaq taanna malillugu sulinnigissinnaatitaassanngilaq.

Piumasqaataavortaaq suliinnarnerup arnap peqqissusianut naartumulluunniit aarlerinaateqannginnissaa. Taamaalilluni nalinginnaasumik naartunermi ippigusuutaasinnaasut aatsaat ilaatinneqarsinnaapput arnap suliinnarneratigut tamanna arnap naartulluunniip peqqissusiinut aarlerinartoqarsinnaappat. Tamanna pillugu nakorsap suliaminut atatillugu naliliisimassaaq, tamannalu nalinginnasumik nakorsap nalunaaruteqarneratigut pisarluni.

§ 6-imut

Imm. 1-imut

Suliap pissusia nakorsap naliliinera malillugu naartumik naartunermilluunniit ulorianartorsiortitsippat, imaluunniit aalajangersakkat pisortanit aalajangersarneqartut arnap sulisinnaanera akornuserpassuk sulisitsisorlu pisuni taamaattuni naartusumut suliffimmik naleqquttumik allamik neqeroorutissaqanngippat arnaq naartusoq § 3 malillugu sulinnigiffeqarsinnaatitaanerup atuutilinnginnerani sulinnigissinnaatitaasooq aalajangersakkami aalajangersarneqarpoq.

Aalajangersagaq naartusunik naartunerminni peqqissutsimut ajoqutaasinnaasunik atugassaqartitaallutik sulisunik illersuineruvoq. Arnap sulisitsisua pisussaaffilerneqarpoq sapinngisamik arnap sulinerata naartusumut naleqquttumik aaqqissuunnissaanut. Tamanna ajornarpat sulisitsisup suliassammut naapertuuttumut allamut nuunneqarnissaanik arnaq neqeroorfigisavaa. Tamanna aamma ajornassappat arnaq suliffimmit sulinngissinnaatitaavoq.

Aalajangersakkami pissutsit marluk ilaatinneqarput:

- 1) nakorsap nalilerpagu arnap sulinera arnap peqqissusianut naartumulluunniit ulorianartorsiortitsisinnaasoq, imaluunniit
- 2) aalajangersakkat pisortanit aalajangersarneqarsimasut arnap sulisinnaanera akornuserpasuk.

Aalajangersagaq atuutissanngilaq arnap sulisitsisuata suliffimmik allanik naapertuuttumik arnaq neqeroorfigisinnaappagu.

Imm. 2-mut

Pissutsit aalajangersimasut atuutsillugit arnaq naartusoq naartunermi imm. 1 naapertorlugu suliffimmik naapertuuttumik allamik neqeroorfigineqartoq neqeroorummik itigartitsisinnaasoq aalajangersakkami aalajangersarneqarpoq. Suliffik naapertuuttoq pineqarnersoq pisumiit pisumut nalilerneqartassaaq.

Nr. 1-imi aalajangersarneqarpoq arnap nalinginnaasumik sularisartagaanit allaanerujussuarmik suliaqarnissaq pineqarpat, taava arnap sulisitsisumit allamik suliaqarnissamik neqeroorut itigartissinnaagaa. Assersuutigalugu tamatumani pineqarsinnaavoq suliassaqarfik arnap piginnaasaasa avataanniittoq.

Nr. 2-mi aalajangersarneqarpoq arnap nalinginnaasumik sularisartagaanit allatut qaffasissusilimmik suliaqarnissaq pineqarpat, taava arnap sulisitsisumit allamik suliaqarnissamik neqeroorut itigartissinnaagaa.

Arnaq aqutsisutut inissisimasoq atorfirmik aqutsinertaqanngitsumik neqeroorfigineqarpat tamanna suliatur massakkut suliatur allarujussuarmik qaffasissulittut assersuutigineqarsinnaavoq.

Nr. 3-mi aalajangersarneqarpoq suliffigisaq taarserneqarpat arnap nuuttariaqarneranik imaluunniit suliffimmut suliffimmiillu sivirusumik assartorneqartariaqalerneranik malitseqartumik, taava arnap sulisitsisumit allamik suliaqarnissamik neqeroorut itigartissinnaagaa. Tamanna soorlu atuutissaaq arnaq illoqarfimmi nunaqarfimmiluunniit allami suliffissaminik neqeroorfigineqarpat.

Nr. 4-mi aalajangersarneqarpoq arnap ullup sapaatip akunnerataluunniip qanoq ilinerani sulisarnissaq annertuumik allannguuteqarpat, taava arnap sulisitsisumit allamik suliaqarnissa-

mik neqeroorut itigartissinnaagaa. Arnaq nalinginnaasumik ulluunerani sulisaraluarluni unnu-arsioortalernissamik neqeroorfigineqarnera tamatumunnga assersuutaasinnaavoq.

Imm. 3-mut

Imm. 1 naapertorlugu siusinnerusukkut suliffigisimasami sapaatip akunneranut nalunaaquttap akunneri suliffiusartut amerlaqataannik suliffiusumik suliffimmik naleqquttumik nassaartoqarsinnaanngippat arnaq piffissami sivikillisami sulisinnaatitaasoq aalajangersakkami aalajangersarneqarpoq.

Tamanna isumaqarpoq assersuutigalugu sulisitsisup arnaq suliffissamik naapertuuttumik al- lamik sapaatit akunneranut nalunaaquttap akunnerini taamaallaat 30-ni sulisinnaaneranik neqeroorfigisinnaappagu, taava arnaq sapaatip akunneranut nalunaaquttap akunnerini qulini sulinngissinnaatitaassasoq.

§ 7-imut

Imm. 1-imut

Ataataasoq meeqqap erniunerata kingorna sapaatit akunnerisa 15-it siulliit iluanni sapaatit akunnerini ataqatigiissuni 3-ni erninermut atatillugu sulinngiffeqarsinnaatitaasoq aalajangersakkami aalajangersarneqarpoq.

”Ataataasutut” paasineqassaaq meeqqat inatsiseqartitsinikkut inissisimanerat pillugu Kalaallit Nunaannut inatsimmi (Meeqqat inatsiseqartitaanerannik Kalaallit Nunaanni inatsit nr. 197, 16. juni 1962-imeersoq) inatsisitigut ataataasoq. Angut ernisussamut katinnikoq inooqataasorluunniit, taakku pissutiginnarlugit inatsisartut inatsisaat manna malillugu sulinngiffeqarsinnaatitaanngilaq.

§ 18 malillugu arnaq anaanaasumut katissimasoq imaluunniit nalunaarsugaasumik aappaasoq arnaq pineqartoq meeqqamut ataataasimasuuppat malittarisassat taakku malillugit pisinnaatitaasinnaavoq.

Imm. 2-mut.

Anaanaasoq marlulippat ataatsikkulluunniit amerlanerusunik ernippat ataataasup sulinngiffeqarsinnaatitaanera aalajangersakkami aalajangersarneqarpoq.

Anaanaasoq ataatsikkut meeqqanik ataatsimit amerlanerusunik ernippat, taava inunngornerup kingorna sapaatit akunnerisa siulliit 19-it iluanni ataataasoq sapaatit akunnerini pingasunik ataqatigiissumik sulinngiffeqarsinnaatitaavoq.

§ 8-mut

Imm. 1-imut

Meeqqamik Kalaallit Nunaanni najugalimmik meeravissartaartut, meeqqap tiginissaa sioqqullugu sapaatip akunnerani 1-imi sulinnigissinnaatitaasut aalajangersakkami aalajangersarneqarpoq.

Meeravissartaartut angajoqqaaviusunut aalajangersakkami naligiissinneqarput, taamaalillunilu piffissaq meeqqap aaneqarneranut atorneqartoq angajoqqaatut sulinnigiffeqarnermit tigu-neqassanani.

Aalajangersakkakkut angajoqqaarsiannngortussat periarfissinneqarput sumiiffimmut meeqqamik meeqqanilluunniit aallerfissaminnut angalasinnaanissaminnut. Aalajangersakkakkut periarfissiisoqarportaaq angajoqqaarsiannngortussat tigusinnginnermini meeqqat meeqqalluunniit najorsinnaanissaannut, meeraq meeqqalluunniit tiguneqannginnerminni meeravissiatut angajoqqaassaminnut attaveqalereerniassammata.

Imm. 2-mut

Meeqqamik Kalaallit Nunaata avataani najugalimmik meeravissartaartut, meeqqap tiginissaa sioqqullugu sapaatit akunnerini 3-ni sulinnigissinnaatitaasut aalajangersakkami aalajangersarneqarpoq. Meeqqamik Kalaallit Nunaata avataanut aallarnerup sivirusinnaanera taamaalilluni piffissami sulinnigiffiusinnaasumi isiginiarneqarsimavoq.

§ 9-mut

Imm. 1-imut

Meeravissartaartut meeqqap tiguneqarneranut atatiinnarlugu katillugit sapaatit akunneri 15-it tikillugit sulinnigiffeqarsinnaatitaapput. Aalajangersakkakkut meeravissartaartut angajoqqaavinnut naligiissinneqarput piffissap sulinnigiffeqarfiusup takissusia eqqarsaatigalugu, meeravissartaartut akornanni sulinnigiffeqarnerup agguataarneqarnera ilanngullugu.

Meeravissartaartut katillugit sapaatit akunnerini 15-imi sulinnigiffeqarsinnaatitaapput. Sapaatit akunnerisa 15-it taakku iluanni meeravissartaartut ataatsikkut sapaatit akunnerini 3-ni sulinnigiffeqarsinnaatitaapput. Taamaalillutik meeravissartaartut katillugit sapaatit akunnerini 18-imi sulinnigiffeqarsinnaatitaapput, meeqqap tiguneqarnerata ingorna sapaatit akunnerisa 15-it siulliit iluanni ingerlanneqartussanik.

Sapaatit akunneri 15-it taakku erninerup kingorna piffissamut anaanaasup sulinnigiffeqarfigisinnaasaanut naapertuupput, sapaatit akunnerinilu pingasut taamaaqataanik erninerup kingorna ataataasup sapaatit akunnerini 3-ni sulinnigiffeqarfigisinnaasaanut naapertuullutik.

Sapaatit akunneri sinneruttut meeravissartaartut arlaannit ataasiinnarmit atorneqarsinnaassapput. Meeravissartaartut sapaatip akunneri qanoq agguataassanerlugit namminneq aalajangis-savaat.

Imm. 2-mut

Meeravissartaartut ataatsikkut meeqqanik 2-nik amerlanerusunilluunniit tigusaqartut tigusinermut atatiinnarlugu katillugit sapaatit akunnerini 19-ini sulinngiffeqarsinnaatitaasut aalajangersakkami aalajangersarneqarpoq. Sapaatit akunnerisa 19-it taakku iluanni meeravissartaartut ataatsikkut sapaatit akunnerini pingasuni sulinngiffeqarsinnaatitaapput. Meeravissartaartut taamaalillutik ataatsimut sapaatit akunnerini 22-ini sulinngiffeqarsinnaapput meeqqap tiguqeqarnerata kingorna sapaatit akunnerisa 19-it siulliit iluanni ingerlannqartussanik.

Sapaatit akunnerini 19-it taakku naapertuupput piffissamut marlulinermi ataatsikkullulluunniit amerlanerusunik meerartaarnermini anaanaasup sulinngiffeqarfigisassaanut, sapaatit akunerilu pingasut taakku naapertuullutik piffissamut erninerup kingorna ataataasup sulinngiffeqarfigisassaanut.

Sapaatit akunneri sinneruttut meeravissartaartut arlaannit ataasiinnarmit atorneqarsinnaassapput. Meeravissartaartut sapaatip akunneri qanoq agguataassanerlugit namminneq aalajangis-savaat.

§ 10-mut

Imm. 1-imut

Aalajangersakkami aalajangersarneqarpoq meeravissartaartut §-ini 8-mi 9-milu angajoqqavivusunut naligiissinneqarnerat taamaallaat atuuttoq meeqqamik tigusaqannginnerminni nalusaminnik meeravissartaartunut. Taamaalillugu assersuutigalugu meerassamik ilaqtutamiluunniit meeravissartaarneq §-inut 8-mut 9-mullu ilaatinneqanngillat.

Meeravissartaartussat Kalaallit Nunaanni qitornavissartaartussat akuersissutigineqartarnerat pillugu nalunaarut malillugu akuerineqartarput.

Meeravissartaartut katissimassapput meeravissartaarsinnaassagunik. Aappariit assigiinngitsunik assigiimmilluunniit suaassuseqarnerisut tamatumani apeqqutaanngilaq.

Inuit nalunaarsugaasumik aappariit meeravissartaarsinnaassapput nalunaarsugaasumik aappariinnerminnut taarsiullugu katikkunik.

Meeravissartaartut meeravissartaarnissaq siunertaralugu ilaqtariittut paarsisartutut akuerineqarsimasut aalajangersakkami aamma pineqarput.

§ 11-mut

Imm. 1-imut

Meeraq ilaqutariinnut paaqqutarineqartussanngortinneqarpat meeqqap tiguneqarneranut atatillugu angajoqqaarsiannngortut arlaat sulinngiffeqarsinnaassasoq kommunalbestyrelsip aalajangersinnaagaa aalajangersakkami aalajangersarneqarpoq.

Imm. 2-mut

Meeqqap paaqqutarineqartussatut inissinneqarneranut atatillugu sulinngiffeqarnermut malit-tarisassanik sukumiinerusunik aalajangersaasinnaanermut Naalakkersuisut piginnaatinneqar-put. Assersuutigalugu kommunalbestyrelsit qaqugukkat angajoqqaat paarsisartut sulinngiffe-qartissinnaaneraat, sulinngiffeqarnerup sivisussusia sulisitsisumullu ilisimatitsisarnermut atu-gassarititaasussat pillugit atugassarititaasussanik Naalakkersuisut aalajangersaasinnaapput.

§ 12-imut

Imm. 1-imut

§ 3, imm.1, § 7, imm. 1 aamma § 9, imm. 1 malillugit sapaatit akunnerinut 15-inut siullernut sulinngiffeqarnermut atatiinnarlugu angajoqqaajusut katillugit sapaatit akunneri 17-it tikillugit angajoqqaatut sulinngiffeqarsinnaatitaasut aalajangersakkami aalajangersarneqarpoq.

Imm. 2-mut

Marlulissanut amerlanerusunulluunniit ataatsikkut erniusunut tiguneqartunulluunniit angajoq-qaajusut, § 3, imm. 2, § 7, imm. 2 aamma § 9, imm. 2 malillugit sapaatit akunnerinut 19-inut siullernut atatiinnarlugu sapaatit akunneri 21-t tikillugit ataatsimut angajoqqaatut sulinngiffe-qarsinnaatitaasut aalajangersakkami aalajangersarneqarpoq.

Imm. 3-mut

Imm. 1 aamma 2 malillugit angajoqqaatut sulinngiffeqarsinnaatitaaneq taamaallaat angajoq-qaajusut ataasiakkaarlutik atorsinnaagaat aalajangersakkami aalajangersarneqarpoq.

Piffissap angajoqqaatut sulinngiffeqarfiusup ingerlanerani angajoqqaat paarlakaallutik anga-joqqaatut sulinngiffeqarsinnaanerat aporfissaqanngilaq. Assersuutigalugu angajoqqaatut su-lingngiffeqarneq agguataarneqarsinnaavoq, angajoqqaajusup aappaata sapaatit akunnerini siulliit qulit sulinngiffeqarfigalugit, aappaatalu sulinngiffeqarnissap sinnera tigullugu.

§ 13-imut

Imm. 1-imut

Aalajangersakkakut angajoqqaat pisinnaatinneqarput angajoqqaatut sulinngiffeqarnerup suli sapaatit akunnerinik sisamanik sivitsorsinnaanissaanut. Angajoqqaat ataatsimik meerartaarsi-manertik pissutigalugu angajoqqaatut sulinngiffeqartut eqqarsaatigalugit tamanna isumaqar-

poq angajoqqaajusut ataatsimut sapaatit akunnerini 21-ini angajoqqaatut sulinngiffeqarsinnaatitaassasut.

Angajoqqaat marlulisimanertik ataatsikkulluunniit amerlanerusunik meerartaarsimanertik pisutigalugu angajoqqaatut sulinngiffeqartut eqqarsaatigalugit tamanna isumaqarpoq angajoqqaajusut ataatsimut sapaatit akunnerini 25-ini angajoqqaatut sulinngiffeqarsinnaatitaassasut.

Imm. 2-mut

§ 12 malillugu nalinginnaasumik angajoqqaatut sulinngiffeqarsinnaatitaaneq assigalugu imm. 1 malillugu angajoqqaatut sulinngiffeqarnermik sivitsuisinnaatitaaneq taamaallaat angajoqqaajusut ataasiakkaarlutik atorsinnaavaat.

§ 14-imut

Imm. 1-imut

Akissarsiaqarluni sulisartup § 13 malillugu piffissami sulinngiffeqarfiusumi sulinini tamakkiisumik ilaannakortumilluunniit aallarteqqissinnaagaa aalajangersakkakut periarfissinneqarpoq.

Sulinerup tamakkiisumik aallarteqqinneqarneratigut akissarsiaqarluni sulisartup sulinini aallarteqqissavaa nalunaaquttap akunnerini nalinginnaasumik suliffiusarsimasut suliffigalugit. Taamaattoqartillugu akissarsiaqarluni sulisartup imm. 3 malillugu angajoqqaatut sulinngiffeqarnerup sinnerata kinguartinnissaanut pisinnaatitaavoq.

Sulinerup ilaannakortumik aallarteqqinneqarneratigut akissarsiaqarluni sulisartup piffissap ilaa sulissaaq piffissallu ilaa angajoqqaatut sulinngiffeqassalluni. Taamaattoqartillugu akissarsiaqarluni sulisartup imm. 2 malillugu angajoqqaatut sulinngiffeqarnerup sivitsorneqarnissaanut pisinnaatitaavoq.

Sulineq qanoq tamakkiisumik ilaannakortumilluunniit aallarteqqinneqassanersoq sulisitsisunut isumaqatigiissutigineqassaaq. Akissarsiaqarluni sulisartup angajoqqaatut sulinngiffeqarnerup sivitsuutaata nalaani sulinerminik aallartitseqqinnissaa sulisitsisup piumasarisinnaangilaa.

Assersuutigaluguli akissarsiaqarluni sulisartup kissaateqarpat piffissap affaannaani sulisarluni sulinini aallarteqqinniarlugu, tamanna sulisitsisup itigartissinnaavaa.

Sulisitsisup sulinerup tamakkiisumik ilaannakortumilluunniit aallarteqqinneqarnissaa itigartippagu, akissarsiaqarluni sulisartup § 13 malillugu sivitsukkamik angajoqqaatut sulinngiffeqarsinnaanini attatiinnassavaa.

Imm. 2-mut

Sulisitsisoq isumaqatigiissuteqarfigalugu akissarsiaqarluni sulisartup sulinermi ilaannakortumik aallarteqqinneqarnissaa toqqarpagu, taava sivitsukkamik angajoqqaatut sulinngiffeqarsinnaatitaaneq sivitsorneqassaaq nalunaaquttap akunnerinik sulinerup aallarteqqinneqarneranut atorneqartunik.

Akissarsiaqarluni sulisartuq sapaatip akunneranut nalunaaquttap akunnerini 40-ni sulisartusatur atorfinitsinneqarsimasoq § 13 malillugu sapaatit akunnerini 4-ni sivitsukkamik angajoqqaatut sulinngiffeqarsinnaatitaassaaq, sapaatit akunnerisut sisamatut tamarmik nalunaaquttap akunnerini 40-ni suliffiusutut naatsorsorlugu, tassa katillugit nalunaaquttap akunnerisut 160-itut. Sulinerup ilaannakortumik aallarteqqinneqarneratigut akissarsiaqarluni sulisartup nalunaaquttap akunnerini 160-ini sulinngiffeqarnissaaq pigiinnassavaa, nalunaaquttalli akunneri piffissamut sivisunerusumut siaarsinnaallugit.

Akissarsiaqarluni sulisartuq sapaatip akunneranut nalunaaquttap akunnerini 30-ni sulisartuq taamaaqataanik nalunaaquttap akunnerini 4x30-nik, tassa nalunaaquttap akunnerinik 120-nik, pissaqassaaq, piffissamut sivisunerusumut siaarneqarsinnaasunik.

Aalajangersagaq eqaatsumik aqqiissunneqarsinnaavoq, akissarsiaqarluni sulisartuq sulisitorlu akunnerminni tamanut naammaginatsumik aqqiissuteqarsinnaallutik.

Akissarsiaqarluni sulisartup sulisitsisullu assersuutigalugu isumaqatigiissutigisinnaavaat akissarsiaqarluni sulisartuq

- 1) sulinerminik aallartitseqqissasoq sapaatit akunnerini 8-ni piffissap suliffiusussap affaani sulisarluni,
- 2) sulinerminik aallartitseqqissasoq sapaatit akunnerini 16-imi piffissap suliffiusussap 75 %-iani sulisarluni,
- 3) sapaatit akunnerini 2-ni tamakkiisumik sulinniffeqassasoq tamatumalu kingorna sulinini aallarteqqillugu sapaatit akunnerini 4-ni piffissap affaannaa sulisarluni, imaluunniit
- 4) sapaatit akunnerini 3-ni tamakkiisumik sulinngiffeqassasoq tamatumalu kingorna sulinini aallarteqqillugu sapaatit akunnerini 2-ni piffissap affaannaa sulisarluni.

Angajoqqaat tamarmik akissarsiaqarlutik sulisartuugunik taamatuttaaq sivitsukkamik angajoqqaatut sulinngiffeqarnerup akunnerminni agguataarnissaa toqqarsinnaavaat, assersuutigalugu angajoqqaap aappaa assersuutigalugu sapaatit akunnerini siullerni 2-ni piffissaaq tamaat sulingiffeqarluni, tamatumalu kingorna angajoqqaap aappaata sapaatit akunnerini tulliuttuni 4-ni sulinini piffissap affaanut aallarteqqillugu.

Angajoqqaat, aappaa akissarsiaqarluni sulisartuuppat aappaatalu erninermut atatillugu ullormusiaqarsinnaatitaanermut piumasaaqatit naammassisimappagit, §§ 14-imi 15-imilu malittarisassat malillugit sivitsukkamik angajoqqaatut sulinngiffeqarneq akunnerminni agguataarniarlugu toqqarsinnaavaat.

Assersuutit tamakkiisuunngillat.

Imm. 3-mut

Akissarsiaqarluni sulisartup sulisitsisoq isumaqatigiissuteqarfigalugu sulinerup tamakkiisumik aallarteqqinneqarnissaa toqqarpagu, taava sivitsukkamik angajoqqaatut sulinngiffeqarnerup sinnera kingusinnerusukkut ingerlanneqartussanngorlugu kinguartinneqassaaq.

Akissarsiaqarluni sulisartup § 13 malillugu sapaatit akunnerini 4-ni sivitsukkamik angajoqqaatut sullinngiffeqarsinnaanini atorniarnagu toqqarpagu, taava akissarsiaqarluni sulisartop sapaatit akunnerini 4-ni angajoqqaatut sulinngiffeqarnissaminik pisassaqaassaaq.

Aalajangersagaq assersuutigalugu inuussutissarsiutini ukiup qanoq ilineranit sunnertiasuni akissarsiaqarlutik sulisartunit atorneqarsinnaavoq. § 13 malillugu sapaatit akunnerini 4-ni sivitsukkamik angajoqqaatut sulinngiffeqarneq piffissami suliassa qarfiulluarmi inissisimapat, taava akissarsiaqarluni sulisartup tamatuma nalaani sulinini aallarteqqissinnaavaa, angajoqqaatullu sulinngiffeqarfissami sinnera piffissamut suliassa qarfiunnginnerusumut nuullugu.

Assersuutigalugu sulisitsisumut isumaqatigiissutigineqarsinnaavoq akissarsiaqarluni sulisartup sulinermik tamakkiisumik aallartitseqqinnissaa angajoqqaatullu sulinngiffeqarnerup sinnera feriarnermut nangissutigiinnarlugu ingerlallugu, imaluunniit akissarsiaqarluni sulisartup angajoqqaatut sulinngiffeqarfissami sinneruttup meeqqami meeqqerivimmi aallartinnissaanut toqqorsinnaagaa.

Angajoqqaatut sulinngiffeqarsinnaatitaanerup sinnera meeraq 5-inik ukioqalertinnagu ingerlanneqassaaq. Sulinngiffeqarsinnaaneq atorneqanngikkuni atorunnaassaaq. Sulinngiffeqarneq sulinngissinnaatitaanerummat akissarsiaqarluni sulisartumut ajornarpoq sulinngiffeqarnissamut taarsiullugu nalunaaquttap akunnerisa aningaasannorlugit tiguneqarsinnaanis-saat.

Aalajangersagaq eqaatsumik aaqquissuunneqarsinnaavoq, akissarsiaqarluni sulisartop sulisitsisorlu akunnerminni tamanut naammaginartumik aaqquissuteqarsinnaallutik.

Angajoqqaatut sulinngiffeqarnerup sinnerata ingerlanneqarnerani, pineqartoq sulinngiffeqarnermi akissarsiaqarneq pillugu kapitali 2-mi malittarisassanut ilaatinneqassaaq, pineqartoq angajoqqaatut sulinngiffeqarnerup sinnerata ingerlanneqarnerani akissarsiaqarluni sulisartuusimappat.

Angajoqqaatut sulinngiffeqarnerup sinnerata ingerlanneqarnerani pineqartoq suliffeqanngip-pat, taava pineqartoq tamanna pillugu kapitali 5-imi piunnaasaqaatit naammassineqarsimappata erniner-mut atatillugu ullormusiaqarsinnaatitaalluniluunniit pisortanit ikiorsiissutisisinnaavoq, tamatumunnga piunnaasaqaatit naammassineqarsimappata.

Akissarsiaqarluni sulisartup sulinini tamakkiisumik aallarteqqippagu, angajoqqaajusullu aapaata tamatumunnga atatiinnarlugu angajoqqaatut sulinngiffeqarsinnaatitaanerup sivitsukkap sinnera atorpagu, tamanna angajoqqaatut sulinngiffeqarsinnaatitaanerup sivitsukkap kinguartinneqarneratut isigineqassanngilaq.

§ 15-imut

Imm. 1-imut

Aalajangersakkakut inuk erninermut atatillugu ullormusiaqartoq § 13 malillugu piffissami sulinngiffeqarfiusumi tamakkiisumik ilaannakortumilluunniit sulileqqissinnaatinneqarpoq.

Sulinerup tamakkiisumik aallarteqqinneqarneratigut pineqartoq ullormiit suliffiusumiit siulermiit suleqqilissaaq nalunaaquttap akunnerini suliffigisassamini sulisarluni. Taamaattoqartillugu pineqartup imm. 3 malillugu angajoqqaatut sulinngiffeqarfiusussap sinnera kinguartissinnaavaa.

Sulinerup ilaannakortumik aallarteqqinneqarneratigut pineqartoq nalunaaquttap akunnerini suliffigisassamini ikinnerusuni sulisarluni aallatissaaq, taammattumillu ilaannakuusumik sulitigaluni ilaannakuusumik angajoqqaatut sulinngiffeqassalluni. Taamaattoqartillugu pineqartup imm. 2 malillugu angajoqqaatut sulinngiffeqarnini sivitsorsinnaavaa.

Sulineq qanoq tamakkiisumik ilaannakortumilluunniit aallartinneqassanersoq sulisitsisumut nutaamut isumaqatigiissutigineqassaaq.

Pineqartoq erninermut atatillugu ullormusiaqartinneqartoq pisussaavoq sulinerup tamakkiisumik ilaannakortumilluunniit aallartinneqarnissaa pillugit kommunimut qinnuteqassalluni, taamaalilluni pineqartoq piffissami eqqortumi aningaasanik eqqortumik amerlassusilinnik erninermut atatillugu ullormusiaqarniassammat.

Imm. 2-mut

Pineqartup sulisitsisoq isumaqatigiissuteqarfigalugu sulinerup ilaannakortumik aallarteqqinneqarnissaa toqqarpagu, sivitsukkamik angajoqqaatut sulinngiffeqarsinnaatitaaneq taamaqataanik sivitsorneqassaaq piffissamik sulileqqinnermut atorneqarsimasumik.

Inuk sapaatip akunneranut nalunaaquttap akunnerini 40-ni sulinerup naapertuuttunik erninermut atatillugu ullormusiaqarsinnaatitaasoq, § 13 malillugu sapaatit akunnerini sisamani sivitsukkamik angajoqqaatut sulinngiffeqarsinnaatitaassaaq, sapaatit akunnerisut sisamatut tamarfik nalunaaquttap akunnerini 40-ni suliffiusutut naatsorsorlugu, tassa katillugit nalunaaquttap akunnerini 160-ni erninermut atatillugu ullormusiaqarluni.

§ 13 malillugu sivitsukkamik angajoqqaatut sulinngiffeqarnermi pineqartoq isumaqatigiissuteqarpat piffissami sivikillisami sulisarnissaminik pineqartup nalunaaquttap akunnerini 160-ini erninermut atatillugu ullormusiani attatiinnassavai, nalunaaquttalli akunneri piffissamut sivilisunerusumut siaarlugit.

Inuk sapaatip akunneranut nalunaaquttap akunnerinut 30-inut naapertuuttunik erninermut atatillugu ullormusiaqarsinnaatitaasoq taamaaqataanik nalunaaquttap akunnerini 4x30-ini, tassa nalunaaquttap akunnerini 120-ini, ullormusiaqarsinnaatitaassaaq piffissamut sivilisunerusumut siaarneqarsinnaasunik.

Pineqartup piffissap ilaannaani sulilernissaanik isumaqatigiissuteqarnermi pineqartoq erninermut atatillugu ullormusiaqarsinnaatitaassaaq piffissami nalunaaquttap akunnerisa pineqartup suliffigisaasa nalunaaquttallu akunnerisa pineqartup erninermut atatillugu ullormusiaqarfigisinnaasa assigiinngissutaanni.

Inuk sapaatip akunneranut nalunaaquttap akunnerinut 30-inut naapertuuttunik erninermut atatillugu ullormusiaqarsinnaatitaasoq, atorfimmilu sapaatip akunneranut nalunaaquttap akunnerini 30-ini sulisalersoq, kisiannili § 13 malillugu sivitsukkamik angajoqqaatut sulinngiffeqarnermi sapaatip akunneranut nalunaaquttap akunnerini 20-ni sulisartoq, nalunaaquttap akunnerinut 20-nut akissarsiaqassaaq nalunaaquttallu akunnerinut qulinut erninermut atatillugu ullormusiaqarluni.

Akerlianik pineqartoq atorfimmi sapaatip akunneranut nalunaaquttap akunnerini 30-ni suliffiusumi aallartippat, sulinerup ilaannakortumik aallarteqqinneqarnera pineqarani imm. 3 malillugu tamakkiisumik aallartitseqqinneq pineqassaaq.

Aalajangersagaq eqaatsumik aaqqissuunneqarsinnaavoq, akissarsiaqarluni sulisartoq sulisisorlu nutaaq akunnerminni tamanut naammaginartumik aaqqiissuteqarsinnaallutik.

Pineqartup sulisisisullu assersuutigalugu isumaqatigiissutigisinnaavaat pineqartoq

- 1) sulinerminik aallartitseqqissasoq sapaatit akunnerini 8-ni piffissap suliffiusussap affaani sulisarluni,
- 2) sulinerminik aallartitseqqissasoq sapaatit akunnerini 16-imi piffissap suliffiusussap 75 %-iani sulisarluni,
- 3) sapaatit akunnerini 2-ni tamakkiisumik sulinniffeqassasoq tamatumalu kingorna sulinini aallarteqqillugu sapaatit akunnerini 4-ni piffissap affaannaa sulisarluni, imaluunniit
- 4) sapaatit akunnerini 3-ni tamakkiisumik sulinngiffeqassasoq tamatumalu kingorna sulinini aallarteqqillugu sapaatit akunnerini 2-ni piffissap affaannaa sulisarluni.

Angajoqqaat tamarmik erninermut atatillugu ullormusiaqarsinnaatitaasut taamatuttaaq sivilsukkamik angajoqqaatut sulinngiffeqarnermik akunnerminni agguataarneqarnissaa toqqarsinnaavaat, assersuutigalugu angajoqqaajusup aappaa sapaatit akunnerini siullerni 2-ni ta-

makkiisumik sulinngiffeqarluni, tamatumalu kingorna angajoqqaajusup aappaa sapaatit akunnerini tulliuuttuni 4-ni piffissap affaa sulisalerluni.

Angajoqqaajusut, aappaa akissarsiaqarluni sulisartuuppat aappaatalu erninermut atatillugu ullormusiaqarsinnaatitaanermut piunasaqaatit naammassisimappagit, §§ 14-imi 15-imilu malittarisassat malillugit sivitsukkamik angajoqqaatut sulinngiffeqarneq akunnerminni agguataarniarlugu toqqarsinnaavaat.

Assersuutit tamakkiisuunngillat.

Imm. 3-mut

§ 13 malillugu sapaatit akunnerini sisamani angajoqqaatut sulinngiffeqarnermi sivitsukkami sulilernissani toqqarpagu, taava sivitsukkamik angajoqqaatut sulinngiffeqarnerup sinnera kinguartinneqassaaq kingusinnerusukkut ingerlanneqartussanngorlugu.

Aalajangersagaq assersuutigalugu inuussutissarsiutini ukiup qanoq ilineranit sunnertiasuni akissarsiaqarlutik sulisartunit atorpeqarsinnaavoq. § 13 malillugu sapaatit akunnerini 4-ni sivitsukkamik angajoqqaatut sulinngiffeqarneq piffissami suliassaqrifiulluurtumi inissisimappat, taava pineqartoq piffissami tassani sulisinnaavoq sapaatip akunneri sisamani sivitsukkamik angajoqqaatut sulinngiffeqarsinnaaneq annaanagu. Angajoqqaatut sulinngiffeqarnerup sinnera taamaalilluni kinguartinneqarsinnaavoq piffissamut suliassaaleqiffiusumut.

Assersuutigalugu sulisitsisumut nutaamut isumaqatigiissutigineqarsinnaavoq pineqartup tamakkiisumik sulinini aallarteqqissagaa angajoqqaatullu sulinngiffeqarnerup sinnera feriarnermut nangissutiginnarlugu ingerlallugu, imaluunniit pineqartup angajoqqaatut sulinngiffeqarfissami sinneruttup meeqqami meeqquvimmi aallartinnissaanut toqqorsinnaagaa.

Angajoqqaatut sulinngiffeqarnerup sinnera meeqqap 5-inik ukioqalinnginnerani atorpeqassaaq. Sulinngiffeqarnissaaq atorpeqanngikkuni atorunnaassaaq. Sulinngiffeqarneq sulinngissinnaatitaanerummat erninermut atatillugu ullormusiallu piffissami isertitaqannginnermut matussutissaammata, sulinngiffeqarnissamut taarsiullugu pineqartup erninermut atatillugu ullormusiaqartinneqarnissaa ajornassaaq.

Aalajangersagaq eqaatsumik aaqqissuunneqarsinnaavoq, akissarsiaqarluni sulisartoq sulisitsisorlu nutaq akunnerminni tamanut naammaginartumik aaqqiissuteqarsinnaallutik.

Angajoqqaatut sulinngiffeqarnerup sinnerata ingerlanneqarnerani pineqartoq kapitali 2-mi, sulinngiffeqarnermi akissarsiaqarnermut tunngasumi, malittarisassanut ilaatinneqassaaq, pineqartoq angajoqqaatut sulinngiffeqarnerup sinnerata ingerlanneqarnerani akissarsiaqarluni sulisartuuppat.

Pineqartoq angajoqqaatut sulinnigiffeqarnerup sinnerata ingerlanneqarnerani suliffeqanngipat, pineqartoq erninermut atatillugu ullormusiaqarsinnaatitaasinnaavoq kapitali 5-imi piumasqaatit naammassineqarsimappata. Taamaattoqarpat pineqartup § 16-imi malittarisassat malillugit angajoqqaatut sulinnigiffeqarsinnaatitaanerup sinnerata atornissaa toqqarsinnaavaa.

§ 16-imut

Imm. 1-imut

Aalajangersakkami pineqartut inuit § 14, imm. 3, imaluunniit § 15, imm. 3 malillugit § 13 malillugu sivitsukkamik angajoqqaatut sulinnigiffeqarsinnaatitaasut, kisiannili sulinnigiffeqarnerminni akissarsiaqarsinnaatitaanngitsut, assersuutigalugu pineqartup soraarsinneqarsimamera pissutigalugu.

§ 13 malillugu angajoqqaatut sulinnigiffeqarsinnaatitaanerup sivitsukkap ilaa § 14, imm. 3 imaluunniit § 15, imm. 3 malillugu kinguartinneqarsimasoq aalajangersakkami taamaallaat pineqarpoq. Pineqartup sulilernissaata tungaanut angajoqqaatut sulinnigiffeqarnermi erninermut atatillugu ullormusiat ilaatinneqanngillat.

Imm. 2-mut

Piffissamut erninermut atatillugu ullormusiat tigussagaanni taamaattoq piumasqaataavoq sulinnigiffeqarnerup sapaatip akunneranit ataatsimit sivilsunerusumik ingerlanneqarnissaa. Inuk erninermut atatillugu ullormusiaqarsinnaanngilaq assersuutigalugu pineqartoq taamaallaat ullunik sisamanik sivitsukkami angajoqqaatut sulinnigiffeqarfissanik sinneqarpat.

Piffissap tamarmiusup ataatsikkut ingerlanneqarnissaa piumasqaataanngilaq. Assersuutigalugu pineqartoq § 13 malillugu suli sapaatit akunnerini 3-ni angajoqqaatut sulinnigiffeqarfissaqarpat, taava pineqartup sapaatit akunneri 3-t tamaasa ataatsikkut ingerlassinnaavai, imaluunniit agguataarlugit assersuutigalugu 3 x 1 sapaatip akunnera imaluunniit 2 x 1,5 sapaatip akunnera. Piffissat tamarmik sapaatit akunneranit 1-imit sivilsuneruinnassapput piffissami pineqartumi pineqartoq erninermut atatillugu ullormusiaqarsinnaatitaassappat.

§ 17-imut

Angajoqqaq sulinnigiffeqartoq toqukkut qimaguppat imaluunniit angajoqqaq ima perulutsigilerpat meeqqamik paarsisinnaajunnaarluni imaluunniit pissutsit immikkorluinnaq ittut atuuppata angajoqqaajusup arlaata aappaasup sulinnigiffeqarsinnaatitaaneraniq tiguisinnaanissaa kommunalbestyrelsip akuerisinnaagaa aalajangersakkami aalajangersarneqarpoq.

§ 18-imut

Aalajangersakkakkut periarfissiisoqarpoq arnat marluk peqatigiillutik meerartaartut, angajoqqaat anaanatut ataatatullu aappariittut assigalugit sulinnigiffeqarsinnaanissaannut.

Anaanaasup aapparisaata imaluunniit nalunaarsugaasumik inooqatigisaata meeraq ataataqanngippat meeqqamut ataataasutut sulinnigiffeqarsinnaanissaa aalajangersakkami qitiuvoq.

Ataatatut sulinnigiffeqarsinnaalernikkut arnaq inatsisartut inatsisaat manna malillugu meeqqap ataataatulli pisinnaatitaaffinnut pisussaaffinnullu ilaatinneqalissaaq. Tamanna isumaqarpoq ataataasutulli piffissami tassani sulinnigiffeqarsinnaatitaallissasoq sulinnigissinnaatitaanermullu tassunga aamma ilaatinneqarluni. Taamaaqataanik aamma taamatut piffissami pineqartumi akissarsiaqarsinnaatitaassaaq erninnermut atatillugu ullormusiaqarsinnaatitaalluniluunniit. Piffissani sulinnigiffeqarfiusumi ullut tamaasa meeqqani najortassagaa peqatigitillugu piumasaqaataavoq.

Aalajangersagaq piumasaqaatinik 4-nik imaqarpoq, tamarmik naammassineqarsimasus-sanik, ataataasup sulinnigiffeqarsinnaatitaanera arnap tigussappagu.

Nr.1-imi meeqqap atoqatigiinnani kinguaassaqaalersitsilluni nakorsanit suliarineqarnikkut pinngorsimanissaa piumasaqaataavoq. Meeraq atoqatigiinnikkut pinngorsimappat angut meeqqamut ataataasutut isigineqassaaq Kalaallit Nunaanni meeqqat inatsiseqartitaanerannik inatsimmut nalunaarut malillugu. Meeqqamut ataataassuseq aalajangersarneqarsinnaappat, taavaa anaanaasup aappaata arnap nalunaarsugaasumilluunniit aappaata ataataasup sulinnigiffeqarsinnaanera ingiarsinnaanngilaa.

Nr. 2-mi arnap ataataasup sulinnigiffeqarsinnaatitaaneranik tiguisussap suliarineqarnissamut akuersisimanissaa piumasaqaataavoq.

Nr. 3-mi atoqatigiinnani kinguaassaqaalersitsilluni nakorsanit suliarineqarnerup nalaani aappariit inooqatigiissimanissaat piumasaqaataasoq aalajangersarneqarpoq. Suliarineqarnerup nalaani aappariit katissimanissaat piumasaqaataanngilaq, kisiannili imm. 1, oqaaseqatigiit siullit naapertorlugit piffissami qinnuteqarfiusumi kingusinnerpaamik katissimanissaat imaluunniit nalunaarsugaasumik inooqatigiilersimanissaat piumasaqaataavoq.

Nr. 4-mi meeqqamut ataataassutsip aalajangersarneqarsimannginnissaa piumasaqaataavoq. Meeraq ataataqarpat anaanaasup aappaata nalunaarsukkamilluunniit aapparisaata ataataasup sulinnigiffeqarsinnaanera ingiarsinnaanngilaa.

§ 19-imut

§ 3 aamma § 7 malillugit sulinnigiffeqarsinnaatitaaneq meeraq toqungalluni inuuppat aamma atuuttoq aalajangersakkami aalajangersarneqarpoq.

Meeraq toqungalluni inuusutut isigineqassaaq, meeraq sapaatit akunnerisa 22-it naartooreernermi kingorna erniuppat uumassuseqarneranik takussutissaqarani. Meeraq erniunerme ki-

ngorna uumassuseqartutut ersiutilik qaqugukkut inunngornera apeqquatainnagu uumalluni inuusutut isigineqassaaq. Erniunerup kingorna meeraq uumassuseqartutut ersiuteqarsimaner-soq nakorsap suliainut atatillugu naliligassaraa.

Aalajangersakkami taamatuttaaq ilaatinneqarput meeravissiassanngortitsinerit aamma mee-qat tapersorneqarnissaannut Inatsisartut inatsisaat naapertorlugu angerlarsimaffiup avataanut inissiinerit tamarmik, paaqqutarineqartussatut imaluunniit ulloq unnuarlu paaqqinnittarfimmut inissiinerit ilanngullugit.

Meeqqap toqnerani sulinngiffeqarsinnaatitaaneq eqqarsaatigalugu aalajangersakkami erseq-qissarneqarneqarpoq tamanna atuuttoq meeraq erniunermi kingornatigut sapaatit akunnerisa 15-it imaluunniit 19-it siulliit iluanni toqppat, apeqquataalluni § 3 naapertorlugu meeqqap ataatsip inunngornera imaluunniit marluliisoqarnersoq ataatsikkulluunniit amerlanerusunik meerartaartoqarnersoq.

Aalajangersagaq § 1, imm. 2-mut, taanna naapertorlugu inuup sulinngiffeqartup aamma sulinngiffeqarnermini meeraq najussagaa piumasaaqatigineqarluni, ilaatitsinnginneruvoq.

§ 20-mut

Imm. 1-imut

§§ 12 aamma 13 naapertorlugit angajoqqaatut sulinngiffeqarsinnaatitaaneq meeqqap toqne-rani imaluunniit meeqqat tapersorneqarnissaannut Inatsisartut inatsisaat malillugu angerlar-simaffiup avataanut inissinneqarpat atorunnaassasoq aalajangersakkami aalajangersarneqar-poq.

Meeqqat tapersorneqarnissaannut Inatsisartut inatsisaat naapertorlugu meeraq angerlarsi-maffiup avataanut inissinneqarsimasoq angajoqqaatut sulinngiffeqarnermi angerlartinneqarpat angajoqqaatut sulinngiffeqarsinnaatitaataaneq piffissamut sinneranut atuutleqqissaaq. Piffis-saq meeqqap angerlarsimaffiup avataanut inissinneqarfigisimasaa taamaalilluni piffissamut tamarmiusumut angajoqqaatut sulinngiffeqarfigisassamut ilaatinneqassaaq.

Imm. 2-mut

§§ 3, 7 imaluunniit 12 malillugit piffissami sulinngiffeqarfiusumi meeraq toqppat, angajoq-qaajusut sapaatit akunnerini sisamani sulinngissinnaatitaasut aalajangersarneqarpoq.

Angajoqqaajusut tamarmik immikkut sapaatit akunnerini 4-ni sulinngissinnaatitaapput. Sulinngissinnaatitaaneq meeqqap toqneraniit atuutilterarpoq, sapaatillu akunnerinut tulliut-tunut 4-nut atuulluni. Taamaalilluni sulinngissinnaatitaaneq kingusinnerusumut toqpor-neqarsinnanngilaq.

Angajoqqaat § 46 malillugu piffissami erninermut atatillugu ullormusiaqarsinnaatitaasinnaasapput, imaluunniit atorfeqartitaanerminni atugassarititaasut malillugit akissarsiaqarsinnaatitaasinnaallutik. Angajoqqaq isumaqatigiissut malillugu sapaatit akunnerini 2-ni akissarsiaqarsinnaatitaasoq, taamaalilluni aallaavittut sapaatit akunnerini 2-ni akissarsiaqarsinnaatitaassaaq sapaatit akunnerinilu 2-ni erninermut atatillugu ullormusiaqarsinnaatitaalluni.

Angajoqqaat §§ 3 imaluunniit 7 malillugu sulinngiffeqarnerminni meeqqamik annaasaqartut § 19-imi malittarisassat malillugit sulinngiffeqarnertik attatiinnarsinnaassavaat.

Taamaalilluni aalajangersagaq anaanaasumut meeqqap toqunerani § 3 malillugu suli sapaatit akunnerisa sisamat sinnerlugit sulinngiffeqarfissaqartumut apeqqutaassanngilaq.

Angajoqqaq assersuutigalugu §§ 3 imaluunniit 7 malillugit suli sapaatit akunnerini marlunni sulinngiffeqarfissaqartoq, taamaalillugu sapaatip akunneri 2-ni sulinngiffeqarsinnaatitaassaaq sapaatip akunnerini marlunni sulinnginnermik malitseqartunik.

§ 21-mut

Meeraq piffissap angajoqqaat sulinngiffeqarsinnaatitaaffiata iluani napparsimmavimmut unit-sinneqarpat piffissaq sulinngiffeqarfiusoq piffissap napparsimmavimmi uninngaffiusup sivi-soqataanik sivitsorneqassasoq aalajangersakkami aalajangersarneqarpoq.

Tamanna atuuppoq inunngornerup meeqqalluunniip tiguneqarnerata kingorna sapaatit akunnerini siullerni 15-ini 19-iniluunniit sulinngiffeqarsinnaatitaanermut, taamatullu aamma angajoqqaatut sulinngiffeqarsinnaatitaanermut angajoqqaatullu sulinngiffeqarsinnaatitaanermut sivitsukkamut. Ataataasulli § 7 malillugu sulinngiffeqarsinnaatitaanera ilaatinneqanngilaq.

Tamanna aamma atuuppoq meeraq, nakorsat suliaannik pissuteqartumik piffissap inunngornerup kingorna nalinginnaasumik uninngaviusartup kingorna angerlartinneqarsinnaanngikkaangat.

Assersuutigalugu meeraq angajoqqaatut sulinngiffeqarnerup nalaani sapaatip akunnerini marlunni uninngatinneqarpat taava piffissaq angajoqqaatut sulinngiffiususaaq sapaatit akunnerinik 2-nik sivitsorneqassaaq.

Piffissaq sulinngiffeqarfiusoq aalajangersagaq manna malilkugu sapaatit akunnerinit 13-init sivisunerusunik sivitsorneqarsinnaanngilaq.

§ 22-mut

Imm. 1-imut

Aalajangersakkami aalajangersarneqarpoq sulingiffeqarneq kipitinneqarpat, sulingiffeqarnissap sinnera atorunnaassaaq. Taamaalilluni sulinniffeqartoq sulilersinnaangilaq ilinnialerluniluunniit sulingiffeqarfissallu sinneri kingusinnerusumut toqqorlugit.

Tamanna § 13 malillugu sivitsukkamik angajoqqaatut sulingiffeqarnermut atuutinngilaq, taannami §§ 14 aamma 15 malillugit eqaatsumik aaqqissuunneqarsinnaammat.

Imm. 2-mut

Aalajangersakkami aalajangersarneqarpoq sulingiffeqarneq kipitinneqartutut isigineqassa-soq, sulineq ilinniarnelunniit aallarteqqinneqarpat aallartinneqarluniluunniit, angajoqqaajusullu aappaa tamatumunnga atatiinnarlugu sulingiffeqarnermik aallartitsinani.

§ 23-mut

Imm. 1-imut

Arnap akissarsiaqarluni sulisartup naartunini erniffissatut naatsorsuutigineqartoq kingusinnerpaamik sapaatit akunnerinik 13-inik sioqqullugu sulisitsisuminut ilisimatitsissutigissagaa aalajangersakkakut aalajangersarneqarpoq. Akissarsiaqarluni sulisartuq peqatigitillugu pisussaaffeqarpoq sulingiffeqarnini qaqugu aallartissallugu naatsorsuutiginerini sulisitsisuminut ilisimatitsissutigissallugu.

Imm. 2-mut

Arnap akissarsiaqarluni sulisartup erninermi kingornatigut kingusinnerpaamik sapaatit akuner-risa 12-it kingornatigut, qaqugu sulileqqinnissani naatsorsuutiginerini sulisitsisuminut ilimatitsissutigissagaa aalajangersakkami aalajangersarneqarpoq.

§ 24-mut

Imm. 1-imut

Aalajangersakkami aalajangersarneqarpoq ataataasup inatsimmi matumani malittarisassat malillugit sulingiffeqarnissani kissaatigiguniuk pisussaasoq sulisitsisuni tamatuminnga ilisimatissallugu, sulingiffeqarfiup aallartiffissaatut naatsorsuutigineqartoq sapaatit akunnerinik sisamanik sioqqullugu, taamaattorli imm. 2 takujuk.

Aalajangersakkakut aamma arnat § 18 naapertorlugi ataataasup sulingiffeqarsinnaatitaaneraniq tigusisut taamatut pisussaaffilerneqarput.

Imm. 2-mut

Meeraq napparsimmavimmi nalinginnaasumik uninnganermi saniatigut napparsimmavimmut unitsinneqarpat uninngatiinnarneqarpalluunniit meeqqap ataataata piffissaq sulinnigiffeqarfiusussatut imm. 1 malillugu nalunaarutigisani allangortissinnaagaa aalajangersakkami aalajangersarneqarpoq.

Assersuutigalugu tamanna pisinnaavoq anaanaasoq najugaqarfimmi avataani ernissappat, ataataasullu anaanaasup angerlarnissaanut § 7 malillugu sulinnigiffeqarnissani utaqqisinniarpagu. Kingunerluutit pissutigalugit erninerup kinguninngua anaanaasoq angerlarsinnaanngippat, taava ataataasup aalajangersagaq malillugu § 7 malillugu sulinnigiffeqarfissami qaqugu aallartinnissaa allangortissinnaavaa.

Napparsimmavimmut unitsitsineq imaluunniit napparsimmavimmi uninnganerup sivitsorneqarnissaa ilisimalerniariarlugu tamanna sulinnigiffeqartup sulisitsisuminut ilisimatitsissutigissavaa.

§ 25-mut

Akissarsiaqarluni sulisartup sulinnigiffeqarnera § 21 naapertorlugu meeqqap napparsimmavimmut unitsinneqarneranik pissuteqartumik sivitsorneqarpat, napparsimmavimmi uninnganerup sivitsorneqarnissaa ilisimalerniariarlugu tamanna akissarsiaqarluni sulisartup sulisitsisuminut ilisimatitsissutigissagaa aalajangersakkami aalajangersarneqarpoq. Meeqqap angerlartinneqarnera kiisalu piffissaq sulinnigiffeqarnerup sivitsorneqarnera akissarsiaqarluni sulisartup sulisitsisuminut taamatuttaaq ilisimatitsissutigissavaa.

§ 26-mut

Akissarsiaqarluni sulisartoq angajoqqaajusup aappaata §§ 17 aamma 18 naapertorlugit sulinnigiffeqarsinnaatitaanerani tigusippat, akissarsiaqarluni sulisartup tigusinini kiisalu sulinnigiffeqarnerup sivisussusissaa sulisitsisuminut ilisimatitsissutigissagaa aalajangersakkami aalajangersarneqarpoq. Ilisimatitsineq piffissap sulinnigiffeqarfiusussap aallartinnissaa sapaatit akunnerinik arfineq-pingasunik sioqqullugu pissaaq. Pisuni tassanngaannartuni ilisimatitsineq pi-aarnerpaamik pissaaq. Pingaarnertut malittarisassatut ilisimatitsineq piffissap sulinnigiffeqarfiusup aallartinnissaa sapaatit akunnerinik arfineq-pingasunik sioqqullugu pisassaaq.

§ 27-mut

Imm. 1-imut

Akissarsiaqarlutik sulisartut sulinnigiffeqarnerminni akissarsiaqarsinnaatitaasut aalajangersakkami aalajangersarneqarpoq.

Akissarsiaqarluni sulisartup akissarsiat naatsorsorneqassapput nalunaaquttap akunneri sapaatip akunneranut nalunaaquttap akunneri 40-t tikillugit akissarsiaqarluni sulisartup suliffigisai aallaavigalugit.

Akissarsiaqarluni sulisartoq sapaatip akunneranut nalunaaquttap akunneri 10-t tikillugit sulisartoq, sulinngiffeqarnermini sapaatip akunneranut nalunaaquttap akunnerinut 10-t akissarsiaqarsinnaatitaassaaq.

Akissarsiaqarluni sulisartoq sapaatip akunneranut nalunaaquttap akunnerini 45-ni sulisartoq, sulinngiffeqarnermini sapaatip akunneranut nalunaaquttap akunnerinut 40-nut akissarsiaqarsinnaatitaassaaq, nalunaaquttap akunneri sapaatip akunneranut nalunaaquttap akunnerinit 40-nit amerlanerusinnaanngimmata.

Inatsisartunut Naalackersuisunullu ilaasortat naartunermi, erninermi meeravissartaarnermilu sulinngiffeqarnermi aningaasarsiaqarsinnaatitaapput Inatsisartunut Naalackersuisunullu il.il. ilaasortat aningaasarsiaqartitaanerat il.il. pillugit Inatsisartut inatsisaanni Inatsisartullu Suleriaasianni malittarisassat malillugit. Taamaattumik taakku § 27-imut ilaatinneqanngillat.

Kommunalbestyrelsinut ilaasortat Kommunit aqunneqarnerat pillugu Inatsisartut inatsisaanni § 15, imm. 2 naapertorlugu naartunermi, erninermi meeravissartaarnermilu aningaasarsiaqarlutik sulinngiffeqarsinnaatitaanngillat. Taamaattumik inatsisissatut siunnersuut manna malillugu pineqartoq allatigut sulinngiffeqarnermini akissarsiaqartinneqarsinnaasutut ullormusiaqarsinnaatitaasutulluunniit isigineqartariaqarnersoq pisumiit pisumut naliliinermik tunngaveqartassaaq.

Nunaqarfinni aqutsisunut ilaasortat Kommunit aqunneqarnerat pillugu Inatsisartut inatsisaanni § 46, imm. 3 naapertorlugu naartunermi, erninermi meeravissartaarnermilu sulinngiffeqartarnek ullormusiaqartarnerlu pillugit inatsisiliornerit malillugit naartunermi, erninermi meeravissartaarnermilu aningaasarsiatik annaanagit sulinngiffeqarsinnaatitaapput.

Imm. 2-mut

Akissarsiaqarlutik sulisartut sulinngiffeqarnissaq sioqqullugu sapaatip akunneranut nalunaaquttap akunnerinik aalajangersimasunik suliffeqarsimanngitsut eqqarsaatigalugit, nalunaaquttap akunneri sulinngiffeqarfissaq sioqqullugu sapaatit akunnerini 13-ini kingullerni agguaqatigiissitsinikkut suliffigisimasai aallaavigalugit akissarsiat naatsorsorneqassasut aalajangersarneqarpoq.

Sapaatit akunnerinut nalunaaquttap akunnerinut 40-nit amerlanerusunik sulinngiffeqarnermi akissarsiaqartitsissalluni sulisitsisoq pisussaaffeqanngilaq, apeqqutaatinnagu agguaqatigiissillugu nalunaaquttap akunnerini qassini akissarsiaqarluni sulisartoq sulinngiffeqarnissaq sioqqullugu sapaatit akunnerini kingullerni sulisarsimanersoq.

Aalajangersakkami ilanngullugu aalajangersarneqarpoq napparsimaneq, inatsisartut inatsisaat manna malillugu sulinnginneq, sila, tunisassiassaaleqineq il.il. pissutigalugit akissarsiaqarani angerlartinneqarneq pissutigalugu suliaqannginneq naatsorsuineri tunngaviusunut ilaatinne-

qassanngitsut. Taamatuttaaq feria akissarsiaqaranilu piginnaasaqarnerulerniarluni pikkorissarnerit akissarsiaqarluni sulisartup suliffeqarnermi inissisimaneranik nukittorsaasinnaasut naatsorsuinnermut ilaatinneqassanngillat.

Assersuutigalugu akissarsiaqarlutik sulisartut piffissami tunisassiassaaleqiffiusuni angerlartinnarneqartut aalajangersakkamut ilaatinneqarput.

§ 28-mut

Sulisitsisut namminersortut aalajangersagaq malillugu minnerpaamik akissarsiaqartitsissapput piffissami akissarsiaqarluni sulisartup sulinngiffeqanngikkaluaruni akissarsiassaraluisa 80 pct.-iini. Tamatuma aamma pineqarput atorfeqarnermi qanoq siviutigisumik sulisimaneq malitsigalugu akissarsianut qaffaataajunnartut, tassami piffissaq sulinngiffiusoq Angutit arnallu naligiissitaanissaat pillugu Inatsisartut inatsisaanni § 11, imm 2 malillugu qanoq siviutigisumik sulisimanerup naatsorsorneranut ilanngullugu naatsorsuunneqassamat.

Sulisitsisorli pisussaaffeqanngilaq nalunaaquttap akunneranut akissarsiaqartitsissalluni utertinneqarsinnaasut amerlanerpaaffigisinnaasaannit amerlanerusunik, isumaqatigiissutitigut allatut aalajangersaasoqarsimangippat.

Akissarsiat erninnermut atatillugu ullormusiat aningaasartaannit qaqugukkulluunniit atuuttunit ikinnerusinnaanngillaat, naak aamma taakku akissarsiaqarluni sulisartup nalinginnaasumik akissarsiaasa 80 pct.-iinit amerlanerugaluartut.

Aalajangersakkami pineqanngillat assersuutigalugu suliffeqarnermi illuatungeriit akornanni sulinngiffeqarnermi tamakkiisumik akissarsiaqarnissamik isumaqatigiissuteqarnikkut isumaqatigiissutit, akissarsiaqarlutik sulisartut isumaqatigiissutikkut Inatsisartut inatsisaannit pitsaanerusunik atugassaqaartinneqarpata.

Imm. 2-mut

Sulisitsisoq sulinngiffeqarnermi inatsisitigut pisussaaffiusumik akissarsiassanik tunniussingippat erninnermut aningaasaateqarfiup akissarsiaqarlutik sulisartunut akissarsianik tunniussisarnera pillugu malittarisassanik sukumiinerusumik aalajangersaanissamut Naalackersuisut aalajangersakkakkut piginnaatinneqarput.

Naalackersuisut ilanngullugu piginnaatinneqarput erninnermut aningaasaateqarfiup sulisitsisumit utertitsinissamut piumasaqaateqarsinnaanera erninnermullu aningaasaateqarfiusup pisinnaatitaanini tamanna qanoq atussaneraa pillugit malittarisassanik sukumiinerusunik aalajangersaasinnaanermut.

§ 29-mut

Imm. 1-imut

Sulisitsisunut namminersortunut erninermut aningaasaateqarfik pillugu inatsisartut inatsisaata kapitaliata 3-p atuuffia aalajangersakkami aalajangersarneqarpoq.

Nr. 1-imut

Sulisitsisutut namminersortutut paasineqassapput inuit imaluunniit inatsisitigut inuttut isigineqarsinnaasut, akissarsiaqarlutik sulisartumik 1-imik amerlanernilluunniit atorfinitsitsisut akilerlugit suliaqartinniarlugit.

Aalajangersakkami pineqarput sulisitsisut Sulisoqarnermut akitsuut pillugu Inatsisartut inatsisaat malillugu akissarsianit sulisuminnut tunniuttakkaminnit sulisoqarnermut akitsuummik akiliisussaataasut.

Pisortani sulisitsisut, Namminersorlutik Oqartussat kommunillu ilanngullugit, aalajangersakkamut ilaatinneqanngillat. Taakku kapitali 4-mi malittarisassanut ilaatinneqarput.

Danskit naalagaaffiata ataani sulisitsisut ilaatinneqanngillat.

Nr. 2-mut

2) Inummut namminersortumi sulisumut kimulluunniit, sulisoqarnermut akitsuut pillugu inatsisartut inatsisaanni aalajangersakkat malillugit sulisoqarnermut akitsuummik akiliiffiusimasunik akissarsiaqartumut.

Kapitali 3 atuuppoq akissarsiaqarluni sulisartunut namminersortuni atorfeqartunut, isertitaqartatunullu sulinermut akitsuut inatsisartut inatsisaat malillugu suliffeqarnermut akiitsummut akiliuteqarfiusimasunik.

Aalajangersakkami taamaalilluni ilaatinneqanngillat inuit pisortani sulisitsisut danskilluunniit naalagaaffiata ataanni atorfeqartut, imaluunniit inuit pisortanit ikiorsiissutinik, ilinniagaqarneriutinik, pisortanit siusinaartumik utoqqalinermiluunniit soraarnerusutisianik assigisaannilluunniit taamaallaat isertitaqartatut.

Ilinniartoq sulisitsisumi namminersortumi ilinniarnermi saniatigut piffissap ilaannaani suliartoq piffissap ilaani sulisarnertik tamanna pissutigalugu kapitali 3-mut ilaatinneqassapput. Taamaalillutik piffissamut piffissap ilaa suliffigisimasaminnut akissarsiaqarlutik sulinngiffeqarsinnaatitaassapput, peqatigitillugu kapitali 5 malillugu erninermut atatillugu ullormusi-aqarsinnaatitaassallutik.

Inuk pisortanit siusinaartumik soraarnerussutisiaqartoq, taamatutaaq sulisitsisumi nammisortumi suliartoq, sulineq tamanna pissutigalugu kapitali 3-mut ilaatinneqassaaq. Pineqartoq

piffissamut suliffigisimasaminnut akissarsiaqarlutik suliffeqarsinnaatitaassapput, peqatigitil-lugu § 59 naapertorlugu sulinngiffeqarnerminni maannamutut pisortanit siusinaartumik sor-aarnerussutisianik pisartagaqaannarluni.

Imm. 2-mut

Namminersorlutik inuussutissarsiuteqartut, namminersorlutik inuussutissarsiuteqartunut aap-paasut inooqataasulluunniit ikiuuttartut ilanngullugit, aallaavittut kapitali 3-mut ilaatineqan-ngillat, kisiannili erninermut atatillugu ullormusiaqarsinnaatitaassallutik, sulinngiffeqarner-minni inuussutissarsiornikkut ingerlatartik unitsikkunikku imaluunniit apparisamik inooqati-gisamilluunniit inuussutissarsiornikkut ingerlataani § 58 naapertorlugu ikiuutaanngikkunik.

Naalackersuisut piginnaatinneqarput kapitali 3-mi erninermut aningaasaateqarfik pillugu ma-littarisassat namminersorlutik inuussutissarsiuteqartunut taakkulu apparisaannut inooqataan-nulluunniit ikiortaasunut atuunnissaat pillugu malittarisassiornissamut.

§ 30-mut

Imm. 1-imut

Inatsit manna malillugu akissarsiaqarluni sulisartumut sulinngiffeqartumut sulisitsisup akis-sarsiarititaavisa ilaannut sulisitsisoq qinnuteqareerluni utertitsivigineqarnissaminik qinnute-qarsinnaasoq aalajangersarneqarpoq.

Imm. 2-mut

Apeqqutaatinnagu sulisitsisoq akissarsiaqarluni sulisartumut sulinngiffeqartumut qanoq an-nerutigisumik akissarsiaqartitsisimanersoq nalunaaquttap akunneranut koruuninngorlugit qummut killigitap (utertinneqarsinnaasut amerlanerpaaffigisinnaasaata) 80 pct.-iinit amerla-nerusumik sulisitsisoq utertitsiffigineqarsinnaanngilaq. Uterinneqarsinnaasullu amerlanerpaa-ffigisinnaasaannit qaffasinnerusumik akissarsiaqartitsinissamut sulisitsisoq pisussaaffeqan-ngimmat, sulisitsisut qularnaarniartuartaavaat akissarsianut aningaasartuutit 80 pct.-iinik utertitsivigineqarnissartik, erninermut atatillugu sulinngiffeqarnermi tamakkiisumik ilaanna-kortumilluunniit akissarsiaqarnissaq isumaqatigiissutitigut isumaqatigiissutigineqarsiman-ngippat.

Nalunaaquttap akunnerannut koruuninngorlugu qummut killigitap, imaluunniit utertinneqar-sinnaasut amerlanerpaaffigisinnaasaata, malitsigaa, sulisitsisut akissarsiaqarlutik sulisartunut nalunaaquttap akunneranut ataatsimut utertitsivigineqarsinnaatitaasut qummut killinga sinner-lugu akissarsiaqartitsisut, nalunaaquttamut akissarsiap ilaanut killigitamik qaangiisunut 80 pct.-imik utertitsivigineqassanngimmata.

Aningaasanik erninermut atatillugu ullormusiaritinneqartunut aningaasartaritinneqartunut qaqugukkulluunniit atuuttumut naapertuuttunik ikinnerpaamik utertitsivigineqarnissaminik sulisitsisoq piumasaqarsinnaavoq.

Sulisitsisoq ullormusiat tunniunneqartussat amerlaqataannik akissarsiaqartitsisoq taamaalilluni akissarsianut aningaasartuutitut tamakkiisumik utertitsivigineqartassaaq.

Imm. 3-mut

Nalunaaquttap akunneranut ataatsimut akissarsiat utertinneqarsinnaasut amerlanerpaaffigisinnaasaannik (utertinneqarsinnaasut amerlanerpaaffigisinnaasannik) aalajangersaasoqassaaq. Nalunaaquttap akunneranut ataatsimut akissarsiat 80 %-imik utertinneqarsinnaasut amerlanerpaaffigisinnaasaat ukiut tamaasa Aningaasaanut inatsimmi aalajangersarneqartassasoq aalajangersakkami aalajangersarneqarpoq.

Imm. 4-mut

Akissarsianut aningaasartuutit suut utertinneqarsinnaatitaanersut pillugit sukumiinerusunik malittarisassiorsinnaanermut Naalakkersuisut piginnaatinneqarput.

§ 31-mut

Imm. 1-imut

Utertitsivigineqarnissamik qinnuteqaammik nassiussinissamut killissarititaq tassaavoq ukiup sisamararterutaata utertitsivigineqarnissamut tunngasup naanerata kingorna qaammatit 5-it qaangiutsinnagit.

Assersuutigalugu utertitsivigineqarnissaq ukiup sisamararterutaasa aappaannut, tassa piffissamut aprilimiit junimut, tunngappat, taava utertitsivigineqarnissamik qinnuteqaarnissamut killissarititaq novembarip ulluisa 30-ianni naassaaq. Killissarititaq novembarip ulluisa 30-ianni naassaaq ukiup sisamararterutaasa aappaanni piffissamut sumut utertitsivigineqarnissaq tunnganersoq apeqqutaatinnagu.

Imm. 2-mut

Piffissarititap imm. 1-imi taaneqartup iluani qinnuteqaat sulisitsisup nassiutinngippagu, ukiup sisamararterutaanut pineqartumut sulinngiffeqarnermi akissarsianut aningaasartuutinik sulisitsisup utertitsivigineqarsinnaanera atorunnaassaaq.

Assersuutigalugu sulisitsisoq ukiup sisamararterutaasa aappaannut ukioq taanna novembarip ulluisa 30-iat tikitsinnagu utertitsivigineqarnissaminik qinnuteqaanngippat, taava ukiup sisamararterutaasa aappaannut sulisitsisup utertitsivigineqarsinnaanera atorunnaassaaq. Taamaattorli sulisitsisup ukiup sisamararterutaasa pingajuannut sulinngiffeqarnermi akissarsiaritinneqartunut utertitsisinnaatitaanini attatiinnassavaa, ukiup sisamararterutaasa pingajuannut qinnuteqaat piffissaliussap imm. 1-imi taaneqartup iluani nassiukkuniuk. Taamaalilluni ukiup sisamararterutaasa pingajuannut qinnuteqaat nassiunneqareersimassaaq ukiup tulliani februaarip naannginnerani.

Imm. 3-mut

Piffissarititap imm. 1-imi taaneqartup iluani utertitsivigineqarnissamik inaarutaasumik piumasaaqaatit naatsorsorneqarsinnaanngippata, sulisitsisoq aningaasanik utertitassanik missinngiil-luni aalajangersaassasoq aalajangersakkami aalajangersarneqarpoq. Taamaaliortoqanngippat utertitsivigineqarsinnaaneq annaaneqassaaq.

Naatsorsuutigineqartariaqarpoq ukiup sisamararterutaanut aalajangersimasumut inaarutaasu-mik piumasaaqaatit naatsorsorneqarsinnaannginnerat qaqutigunnaq pisaarumaartoq. Tamatu-munnga pissutaapput utertitassat akissarsiavinnut sulisitsisup sulinngiffeqartumut akilersima-saanut sanilliullugit kingumut akilerneqartarmata, taamatullu aamma qinnuteqarnissamut kil-lissarititaq aatsaat qaangiuttarmat ukiup sisamararterutaata utertitsinissamut tunngasup naane-rata kingorna qaammatit tallimat qaangiunneranni.

Tamatuma saniatigut aalajangersarneqarpoq utertitsivigineqarnissamik siusinnerusukkut qin-nuteqaatit iluarsineqarnissaannik piumasaaqaatit ukiup sisamararterutaata utertitsivigineqarnis-samut tunngasup naanerata kingorna qaammatit 14-it qaangiutsinnagit nalunaarutigineqassa-sut.

Piffissaliussap iluani iluarsisoqarnissaannik piumasaaqarnerminik sulisitsisoq nalunaaruteqan-ngippat sulisitsisup utertitsivigineqarnerunissaminik piumasaaqarsinnaanini annaassavaa.

Akerlianik sulisitsisoq utertitassanik amerlavallaanik nalunaaruteqarsimappat piffissaliunne-qartup iluani iluarsisuteqarneq nalunaarutiginaq, taava sulisitsisup § 66, imm. 1 naapertor-lugu paasissutissiisussaataitanini unioqutippaa.

Imm. 4-mut

Utertitsivigineqarnissamik qinnuteqarnermi ilusissanut piumasaaqaatit sunik sulisitsisut naam-massinissimanissaat, tamatumunnga ilanngullugu uppersaataatit suut sulisitsisut nassiutissa-neraat, pillugu malittarisassanik sukumiinerusunik aalajangersaanissaminnut Naalakkersuisut piginnaatinneqarput. Tamatumani pineqarsinnaapput assersuutigalugu qinnuteqarnermi im-mersuivissat immersorneqartussat pillugit malittarisassat imaluunniit sulinngiffeqarnerup aal-lartinnginnerani akissarsiaqarluni sulisartut sapaatip akunneranut nalunaaquttap akunnerinut suliffiusimasunut uppersaataatit pillugit malittarisassat.

§ 32-mut

Aalajangersagaq atuutissaaq akissarsiaqarluni sulisartooq piffissaq sulinngiffeqarfiusussaq si-oqqullugu sapaatit akunnerisa 13-it kingulliit iluanni allamik sulisitsisoqarsimappat. Akissar-siaqarlutik sulisartut taamaalillutik pisussaapput siusinnerusukkut sulisitsisorisimasaminnit akissarsianut tunniunneqarsimasunut erninermut aningaasaateqarfimmut uppersaatainik nassiussinissaminnut.

§ 33-mut

Imm. 1-imut

Sulisitsisunut namminersortunut erninermut aningaasaateqarfiup allaffissornikkut aqunneqarnera ingerlanneqarneralu siulersuisunit isumagineqassasoq aalajangersarneqarpoq.

§ 37 malillugu ulluinnarni allaffissornikkut aqutsinerup isumagineqarnissaanut siulersuisullu siunnersorneqartarnissaanut allatseqarfimmik siulersuisut pilersitsisinnaapput.

Imm. 2-mut

Siulersuisut 5-inik ilaasortaqaassapput, tamarmik Naalackersuisunit toqqarneqartunik.

Ilaasortanit 2-t suliniaqatigiiffiit akissarsiaqarlutik sulisartunik sullissisut inassuteqarnerisigut toqqarneqassapput, ilaasortanillu 2-t suliniaqatigiiffiit sulisitsisunik sullissisut inassuteqarnerisigut toqqarneqassallutik.

Imm. 3-mut

Siulersuisunut ilaasortat akornanni siulersuisut siulittaasussaannik Naalackersuisut toqqassasut, siulersuisullu namminneq qinikkaminnik siulittaasup tullilerlutik inissitertassasut aalajangersarneqarpoq.

Imm. 4-mut

Siulersuisunut ilaasortat, siulittaasoq ilanngullugu, piffissamut ukiunut 4-nut toqqarneqartassasut toqqarneqaqqissinnaassasullu aalajangersarneqarpoq.

§ 34-imut

Nr. 1-3-mi piunasaqaat ataaseq arlallilluunniit naammassineqarsimappata ukiunut sisamanut toqqagaaffiup iluani siulersuisunut ilaasortamik, aamma siulersuisut siulittaasuannik siulittaasullu tullianik, Naalackersuisut soraarsitsisinnaasut aalajangersakkami aalajangersarneqarpoq.

Piunasaqaatit taakkartorneqartut tamakkiisuunngillat.

Nr. 1-imut

Kukkunertigut assigiaartutigut arlalitsigut imaluunniit ataasiarluni annertuumik kukkunikkut ilaasortap siulersuinut ilaasortatut inissisimanerminik isumaginninnissaminut piukkunnanginnera uppersarneqarsimappat, tamanna ilaasortap suliassaminik ingerlatsinermini annertuumik sumiginnaaneratut paasineqassaaq.

Aatsaat ilaasortaq aalajangersimasumik tunngavilersorneqarsinnaasumik uppersarneqarsinnaasumillu annertuumik sumiginnaasimapput, tamanna ilaasortap soraarsinneqarneranik kinguneqarsinnaavoq. Peqatigitillugu kukkunerit assigiaartut imaluunniit ataasiarluni annertuu-

mik kukkuneq pineqartut tunngavissaqalersitsisariaqarput ilaasortap siunissami suliassaminik illersorneqarsinnaasumik ingerlatsisinnaannginnissaa naatsorsuutigissallugu.

Ilaasortaq arlaleriaqaluni pissutissaqaranilu siulersuisut ataatsimiinnerinut takkunneq ajorpat, aamma tamanna ilaasortap suliassaminik ingerlatsinerminik annertuumik sumiginnaaneratut paasineqarsinnaavoq.

Assersuutit taaneqartut tamakkiisuunngillat.

Nr. 2-mut

Ilaasortap suliassaminik toqqissisimanartumik ingerlatsisinnaanerani tatiginninnermik annertuumik ajoqusiisumik ilaasortap iliusiisut taaneqarsinnaapput assersuutigalugu ilaasortaq allat annaasaqartillugit peqquserluuteqarsimasutut eqqartuunneqarsimappat, imaluunniit ilaasortaq sulisitsisutut sulisumut taassuma sulinngiffeqarnerani akissarsiaqartitsisimanngippat.

Taamatuttaaq ilaasortaq aalakoorkuni siulersuisut ataatsimiinnerannut takkuppata tamanna aamma ilaasortap suliassaminik toqqissisimanartumik ingerlatsisinnaanerani tatiginninnermik annertuumik ajoqusiisutut isigineqassaaq.

Siulersuisunut ilaasortatut atuuffimmik isumaginninnermut akerliusutut isigineqartumik ilaasortap pissusilersorsimanera taamatuttaaq tamatumani pineqarsinnaavoq.

Assersuutit taaneqartut tamakkiisuunngillat.

Nr. 3-mut

Ilaasortanik soraarsitsinissamik inassuteqaatit allakkatigut tunniunneqartassapput tunngavilersugaassallutillu.

Siulersuisunut ilaasortanit ikinnerpaamik pingasunit inassuteqaat ilalernerqarsimassaaq. Ilaasortat tamarmik, siulittaasoq aamma ilanngullugu, inassuteqaammut atsiornissaminnut periarfissaqarput.

Suliamut tunngatillugu pissutsinik Naalakkersuisut sukumiisumik misissuinissaanni, aalajangiisoqartinnagu suliameqarsissutissat attuumassutillit tamarmik pissarsiariniarnissaannut pi-sortani oqartussat pisussaaffeqarnerat malinneqartussaavoq, tamatumalu malitsigissallugu paasissutissat allakkatigut tunngavilersuummi inassuteqaammut ilanngunneqartumi saqqummiunneqartut iluoornerisut paasiniallugit nakkutilliilluni misissuisoqartariaqarnera. Nakkutilliilluni misissuinerup aalajangiisoqartinnagu sukumiinerusumik misissuisoqartariaqarnera malitsigippagu Naalakkersuisut taamaaliornissaminnut pisussaapput.

§ 35-mut

Siulittaasoq siulersuisunulluunniit ilaasortaq piffissap qinigaaffiup naannginnerani tunuarpat toquppalluunniit, toqqagaaffiup sinneranut taartaasussamik Naalakkersuisut toqqaassasut aalajangersarneqarpoq.

§ 36-mut

Siulersuisut suleriaasissartik nammineq aalajangersassagaat aalajangersakkami aalajangersarneqarpoq.

Suleriaasissaq assersuutigalugu ataatsimiittarnerit amerlassusissaannut tunngasunik ataatsimiittarnerillu qanoq nalunaarutigineqartarnissaannut aalajangersakkanik imaqarsinnaavoq. Siulersuisut nammineq siulittaasup tullissaanik qinersisinnaanerannut periarfissat eqqarsaatigalugit aalajangersakkanik imaqarsinnaavortaaq.

§ 37-mut

Imm. 1-imut

Siulersuisut nammineq allatseqarfimmik pilersitsissasut aalajangersakkami aalajangersarneqarpoq.

Imm. 2-mut

Allatseqarfiup erninermut aningaasaateqarfimmi ulluinnarni suliassat, tamatumunnga ilanngullugit utertitassat tunniunneqartarnerinut atatillugu suliassanik suliarinnineq, isumagissavai, kiisalu ukiumoortumik nalunaarutit ukiumoortumillu naatsorsuutit suliarineqartarnerannut peqataasassalluni.

Siulersuisut tamatumunnga ilanngullugu piffissami killilikkami suliassat aalajangersimasut isumagineqarnissaannut sulianut atatillugu immikkut ilisimasalinnik atorfinitsitsinissamut.

Imm. 3-mut

Siulersuisut piginnaatinneqarput qassinik kikkunnillu allatseqarfimmi sulisussanik atornitsissanerlutik, taamaaqataanillu soraarsitsisoqassanersoq, nammineq aalajangissallugu.

Sulisoqarnermut akissaajaatit siulersuisunut missingersuutinit akilerneqartassapput.

§ 38-mut

Imm. 1-imut

Siulersuisunut ilaasortatut atuunneq akissarsiaqaataassanngilaq.

Imm. 2-mut

Siulersuisunut ilaasortat siulersuisut ataatsimiinnerinut peqataajartorlutik najugaqarfimminnit aallartariaqartut Inatsisartunut Naalakkersuisunullu il.il. ilaasortat aningaasarsiaqartitaanerit il.il. pillugit Inatsisartut inatsisissaanni malittarisassat malillugit ullormusiaqartinneqarlutillu angalanermi aningaasartuutunik utertitsivigineqarsinnaatitaasut aalajangersakkami aalajangersarneqarpoq.

Ullormusianut angalanernilu aningaasartuutininut matusissutissanut akissaajaatit erninermit aningaasaateqarfiup missingersuutaasa iluannit aningaasartuutigineqartassapput.

§ 39-mut

Naartunermut atatillugu naligiissaarisarnermut aaqqissuussinerup allaffissornikkut aqunneqarneranut piumasaqaataammat ilaatigut akileeqataassutissat utertitassallu annertussusissaasa naatsorsorneqartarnerat, piffissap utertitsiviusinnaasup sivisussusissaata aalajangersarneqarnera, akileeqataassutininik akiligassiisarneq kiisalu utertitassanik tunniussisarnerit pillugit sulisitsisunit pisortanilu oqartussanik paasissutissanik pissarsiniartoqartarnissaa, aalajangersarneqarpoq erninermit atatillugu aningaasaateqarfik paasissutissanik attuumassutilinnik sulisitsisunit, kommuninit, akilertaarnermik ingerlatsivinnit pisortallu nalunaarsuiviinit allanit pissarsiniarsinnaasoq. Paasissutissat taaneqartut tunniunneqarnissaat pisussaaffiuvoq.

Allaffissornikkut aqutsinerup sinneranut atatillugu, ilaatigut erninermit atatillugu aningaasaateqarfimmik nakkutilliineq eqqarsaatigalugu, ilaatigut pisariaqarsinnaavoq inuit qitiusumik nalunaarsorsimaffiannit akileraartarnermillu ingerlatsivimmit paasissutissanik pissarsiniarnissaq. Paasissutissat taakku erninermit atatillugu naligiissaarisarnermut aaqqissuussinermit akiliu-taasartut tassangaanniillu tunniunneqartartut nakkutigineqarnerannut atatillugu pingaaruteqartussaapput.

§ 40-mut

Imm. 1-imut

Sulisitsisunut namminersortunut erninermit aningaasaateqarfiup siulersuisui, ukiup aningaasanut inatsiseqarfiusup tullianut § 61 naapertorlugu akileeqataassutip annertussusissaanut ukiut tamaasa Naalakkersuisunut siunnersuuteqartassasut aalajangersakkami aalajangersarneqarpoq.

Akileeqataassutissat aalajangersarneqartassapput ilaatigut erninerit amerlassusiinik naatsorsuinerit siumullu eqqoriaanerit aamma erninermit atatillugu aningaasaateqarfiup imminut aningaasalersornissaa aallaavigalugit. Ukiumut aningaasanut inatsiseqarfiusumut tullermut akileeqataassutissap annertussusissaanik siulersuisut siunnersuuteqassapput.

Ukiumi aggersuni erninermut aningaasaateqarfiup isertitassatut aningaasartuutissatullu naatsorsuutigisaanut missingersuutinik siunnersuut imaqassaaq. Ukiuumut missingersuusiorfiusumut tullermut akileeqataassutissap annertussusissaanut siulersuisut siunnersuutaata malinnissaanut Naalackersuisut pisussaaffeqanngillat, tassami § 61, imm. 2 naapertorlugu akileeqataassut aningaasanut inatsimmi Inatsisartunit aalajangersarneqartarmat.

Imm. 2-mut

Siunnersuutit kingusinnerpaamik tunniunneqartarnissaannut piffissaliinissamut Naalackersuisut piginnaatinneqarput. Ukiuumut aningaasanut inatsiseqarfiusumut tullermut akileeqataassutissanut missingersuutinullu siulersuisut siunnersuuteqartarnissaannut, ukiuumut aningaasanut inatsiseqarfiusumut tullermut aningaasanut inatsisissatut siunnersuutip suliaqarneranut nalimmassakkamik, piffissaliisoqarnissaa naatsorsuutigineqarpoq.

§ 41-mut

Imm. 1-imut

Siulersuisut erninermut aningaasaateqarfik pillugu ukiumoortumik nalunaarusiortassasut aalajangersarneqarpoq. Ukiumoortumik nalunaarut erninermut aningaasaateqarfiup naatsorsuutaanik imaqassaaq.

Ukiumoortumik naatsorsuusiortarnermut malittarisassat atuuttut naapertorlugit naatsorsuutit suliarineqarlutillu tunniunneqartassapput.

Aalajangersakkakut siulersuisut pisussaaffilerneqarput erseqqissumik paasiuminartumillu ukiumoortumik naatsorsuusiortarnissamut, ukiumi naatsorsuuteqarfiusumi aningaasaateqarfiup isertitai aningaasartuutaalu pillugit paasisutissanik, kiisalu ukiumoortumik angusat taak-kulu qanoq atorneqarsimanerannik, allaffissornermut akissaajaatit illikartitallu pillugit paasisutissanik, imalimmik.

Imm. 2-mut

Sulisitsisunut namminersortunut erninermut aningaasaateqarfiup naatsorsuutai, kukknersiuisumit nunatta karsiata naatsorsuutaanik kukknersiuisartumit kukknersiorneqartassasut aalajangersarneqarpoq. Ilanngullugu aalajangersarneqarpoq kukknersiuiineq pisassasoq Namminersorlutik Oqartussat naatsorsuutaat pillugit inatsisiliornerni qaqugukkulluunniit atuuttuni malittarisassat malillugit. Taamaaliornikkut namminersortunut aamma pisortanut erninermut aningaasaateqarfinit ukiumoortumik nalunaarutit eqqarsaatigalugit taakku assigiissuunissaat qularnaarneqassaaq, taamalu periarfissiisoqassalluni pisortani sulisitsisuni taamatullu aamma sulisitsisuni namminersortuni erninermut atatillugu naligiissarisarnermut aaqqissuussinerit sanilliunneqarsinnaanissaannut nalilersoqqissaarneqarsinnaanissaannullu.

Imm. 3-mut

Aalajangersakkakut siulersuisut pisussaaffilerneqarput ukiup naatsorsuuteqarfiup naanerani qaammatit sisamat qaangiutsinnagit naatsorsuutit atsiorneqarnissaannut. Ukiumoortumik naatsorsuutit atsiorneqarsimangitsut imaluunniit ukiumoortumik naatsorsuutit siulersuisunut ilaasortanit tamarmiusunit atsiorneqarsimangitsut eqqortumik saqqummiunneqartutut isigineqanngilaq.

§ 42-mut

Imm. 1-imut

Aalajangersakkakut siulersuisuut pisussaaffilerneqarput tunniussisarnerit pillugit kisitsisitigut, tassunga ilanngullugit inuussutissarsiutinut, suaassutsinut, naartunermi, erninermi meervissartaarnermilu sulinngiffeqarnernut kiisalu angajoqqaatut sulinngiffeqarnernut agguataarlugit sapaatit akunnerinut qassinut tunniussisoqartarneranik, paasissutissartalimmik ukiut tamaasa Naalackersuisunut nalunaaruteqartarnissamut.

Imm. 2-mut

Imm. 1 naapertorlugu nalunaarummut tunniussisarnerit pillugit kisitsisitigut paasissutissartalimmut piumasaaqatinik sukumiinerusunik malittarisassiorsinnaanermut Naalackersuisut piginnaatinneqarput.

§ 43-mut

Imm. 1-imut

Erninermit aningaasaateqarfik Naalackersuisunit nakkutigineqassasoq aalajangersakkami aalajangersarneqarpoq.

Nakkutilliinermi aallaavittut pineqassapput paasissutissat erninermit aningaasaateqarfimmut akiliteqarnermut tassanngaanniillu tunniussaqaarnermut tunngaviusimasut.

Imm. 2-mut

Paasissutissanik nakkutilliinerup ingerlanneqarnissaanut pisariaqartunik Naalackersuisut pisarsisinnaatitaapput.

Imm. 3-mut

Erninermit aningaasaateqarfimmik nakkutilliinerup piareersarneqarnera imarisassaalu pillugit, ilaatigut akiliutaasartut tunniunneqartartullu nakkutigineqarnerat pillugu, malittarisassanik aalajangersaasinnaanissamut Naalackersuisut piginnaatinneqarput.

Assersuutigalugu kikkut nakkutilliinermik isumaginninnissaat nakkutilliinerlu qanoq siumut nalunaarutigineqartassanersoq ulluinnarnilu qanoq ingerlanneqartarnissaa pillugit malittarisassanik aalajangersakkat imaqaarsinnaapput.

Assersuutit tamakkiisuunngillat.

§ 44-mut

Imm. 1-imut

Naalackersuisut pisortani sulisitsisunut pisortat erninermut atatillugu naligiissaarinermut aaq-qissuussinerannik pilersitsissapput. Akissarsiaqarlutik sulisartunut kapitali 1 malillugu sulinngiffeqartunut akissarsianut aningaasartuutunik pisortani sulisitsisut tamakkiisumik ilaanna-kortumilluunniit utertitsivigineqartarnissaat aaqqissuussinikkut qularnaarneqassaaq.

Imm. 2-mut

Naalackersuisut piginnaatinneqarput allaffissornikkut aqutsinerup ingerlatsinerullu aqunneqarneranut sukumiinerusunik, malittarisassiorsinnaanissamut, tamatumunnga ilanngullugu allaffissornikkut aqutsiviup katitigaanera inissisimanageralu pillugit malittarisassanik kiisalu sultanik suliarinnittarneq pillugit malittarisassanik erseqqinnerusunik. Nalunaarsuineq tamakkiisuunngilaq.

Imm. 3-mut

Naalackersuisut piginnaatinneqarput pisortat erninermut atatillugu sulinngiffeqarnermut naligiissarisarnermut aaqqissuussinerannut killiliisunik malittarisassanik sukumiinerusunik aalajangersaanissaminut.

Pisortani sulisut sulinngiffeqarnermi akissarsiaqarsinnaatitaanerat, tassunga ilanngullugu pisortani sulisitsisut qanoq annertutigisumik sulinngiffeqarnermi akissarsiaqartitsinissamut pissaaffeqassanersut, pillugu malittarisassanik sukumiinerusunik aalajangersaanissaminut Naalackersuisut piginnaatinneqarput. Tamatumunnga atatillugu Naalackersuisut piginnaatinneqarputtaaq pisortani sulisitsisut utertitsivigineqarsinnaanerat pillugu sukumiinerusunik malittarisassiornissamut, tassunga ilanngullugit sulisitsisut qanoq annertutigisumik utertitsivigineqarsinnaanerinut utertitsissutillu qanoq tunniunneqartarnissaannik malittarisassanik.

Assersuutit tamakkiisuunngillat.

Naalackersuisut taamatuttaaq pisortat erninermut atatillugu naligiissarisarnermut aaqqissuussinerata aalajangiineri pillugit naammagittaalliutit allaffissornikkut oqartussanut allanut naammagittaalliutigineqarsinnaannginneri pillugu sukumiinerusunik malittarisassiorsinnaapput.

§ 45-mut

Naartunermut atatillugu naligiissarisarnermut aaqqissuussinerup allaffissornikkut aqunneqarneranut piumasaqaataammat ilaatigut akileeqataassutissat utertitassallu annertussusissaasa naatsorsorneqartarnerat, piffissap utertitsiviusinnaasup sivisussusissaata aalajangersarneqar-

nera, akileeqataassutininik akiligassiisarneq kiisalu utertitassanik tunniussisarnerit pillugit sulisitsisunit pisortanilu oqartussanit paasissutissanik pissarsiniartoqartarnissaa, aalajangersarneqarpoq erninermut atatillugu aningaasaateqarfik paasissutissanik attuumassutilinnik sulisitsisunit, kommuninit, akilertaarnermik ingerlatsivinnit pisortallu nalunaarsuiviinit allanit pissarsiniarsinnaasoq. Paasissutissat taaneqartut tunniunneqarnissaat pisussaaffiuvoq.

Allaffissornikkut aqutsinerup sinneranut atatillugu, ilaatigut erninermut atatillugu aningaasaateqarfimmik nakkutilliineq eqqarsaatigalugu, ilaatigut pisariaqarsinnaavoq inuit qitiusumik nalunaarsorsimaffiannit akileraartarnermillu ingerlatsivimmit paasissutissanik piniarnissaaq. Paasissutissat taakku erninermut atatillugu naligiissarisarnermut aaqqissuussinermut akiliutaasartut tassanngaanniillu tunniunneqartartut nakkutigineqarnerannut atatillugu pingaaruteqartussaapput.

§ 46-mut

Imm. 1-imut

Inuit piffissami sulinngiffeqarfiusumi erninermut atatillugu ullormusiaqarsinnaatitaasut aalajangersakkami erseqqissarneqarput.

Nr. 1-imut

Inuk sulinngiffeqarsinnaatitaanermut ilaatinneqassaaq erninermut atatillugu ullormusiaqarsinnaatitaassaguni. Tamanna ilaatigut isumaqarpoq pineqartup inunnut § 1-imi pineqartunut ilaannissaa.

Pineqartoq taamatuttaaq sulinngiffeqassaaq piumasagaatit kapitali 1-imi aalajangersarneqartut tunngavigalugit, soorlu aamma taamaallaat erninermut atatillugu ullormusianik tunniussisoqarsinnaassasoq piffissamut kapitali 1-imi aalajangersarneqartumut.

Naartusoq ernivissatut naatsorsuutigineqartoq sapaatit akunnerinik 4-nik sioqqullugu tamanna ilinniarnep immikkoortuata naammassineranut naapertuummat ilinniarneminit sulinngiffeqartoq, taamaalilluni aallaavittut erninermut atatillugu ullormusiaqarsinnaatitaalsaaq § 3 naapertorlugu erninissamut naatsorsuutigineqartumut sapaatit akunnerisa 2-ningorneriniit, imm. 3-mi ilaatinneqanngitsunut ilaatinneqanngikkuni.

Taamatuttaaq angajoqqaat meeqqani najornagu sulinngiffeqartoq piffissami sulinngiffeqarfisamini erninermut atatillugu ullormusiaqarsinnaatitaassanngilaq, angajoqqaat § 19-imi imaluunniit § 20, imm. 2-mi ilaatinneqanngitsunut ilaatinneqanngippata.

Assersuutit tamakkiisunngillat.

Nr. 2-mut

Piffissap sulingiffeqarfiusussap atuutilnginnera sioqqullugu sapaatit akunnerini kingullerni 13-ini pineqartoq suliffeqarnermut attuumassuteqarsimassasoq, namminersorluni inuussutisarsiteqarsimassasoq imaluunniit ilinniagaqarsimassasoq piumasaqaataavoq.

Pineqartup sapaatit akunnerini kingullerni 13-ini akissarsiaqarluni sulisimanissaa suliffeqarnermut attuumassuteqarnermi pineqarpoq. Pingaaruteqanngilaq pineqartup nalunaaquttap akunnerini qassini suliffeqarsimanissaa, taakkuli § 48 naapertorlugu pineqartup tigusassaasa naatsorsorneqarnerinut ilaassapput.

Namminersorlutik inuussutissarsiteqartut taamatuttaaq ilaatinneqarput. Namminersorlutik inuussutissarsiteqartut eqqarsaatigalugit malittarisassat erseqqinnerusut §§ 54-55-mi aalajangersarneqarput.

Inuit piffissaq sulingiffeqarfiusussaq sioqqullugu ilinniagaqarsimasut taamatuttaaq ilaatinneqarput. Tamatumani pineqarput inuit ilinniakkaminnit sulingiffeqartut, imaluunniit inuit sulingiffeqalinninnerminni sapaatit akunnerisa kingullit 13-it iluanni ilinniakkamik naammassinnissimasut.

”Piffissaq sulingiffeqarfiusup atuutilernera”-ni pineqarpoq piffissaq sulingiffeqarfiusoq tamarmiusoq pineqartup sulingiffeqarfisaa.

Anaanaasoq ernivissamisut naatsorsuutigineqartoq sapaatit akunnerinik 2-nik sioqqullugu sulingiffeqalernermini erninermut atatillugu ullormusiaqarsinnaanermut piumasaqaatit naammassinnittoq, taamaalilluni aamma erninermut atatillugu ullormusiaqarsinnaatitaassaaq, § 3 malillugu sulingiffeqarnermut nangissutit § 12 malillugu angajoqqaatut sulingiffeqarneq aallartikkuniuk.

Ataataq § 7 malillugu sulingiffeqalersoq tamatumalu kingorna kipitinneqanngitsumik § 12 malillugu angajoqqaatut sulingiffeqalersoq taamatuttaaq erninermut atatillugu ullormusiaqarsinnaatitaassaaq, ullormi § 7 malillugu sulingiffeqalerfimmimi piumasaqaatit naammassimagunigit. § 7 aamma § 12 malillugit sulingiffeqarneri ataqatigiissumik ingerlanneqanngippata, taava ullormi § 7 malillugu sulingiffeqalernermini kiisalu ullormi § 12 malillugu sulingiffeqalernermini piumasaqaatit naammassisimassavai.

Nr. 3-mut

Inuk piffissami erninermut atatillugu sulingiffeqarfiusumi akissarsiaqartoq allanilluunniit assigisaanik pisartagaqartoq nalunaaquttap akunneri taakku aamma eqqarsaatigalugit erninermut atatillugu ullormusiaqarsinnaatitaassanngilaq.

Aalajangersakkami pineqarput pissutsit akissarsiaqarsinnaatitaaneq pisartagaqarsinnaatitaanerluunniit isertitanut erninermut atatillugu ullormusianit matussuserneqarsinnaagaluartunut tunngagaangata.

Akissarsiaqarluni sulisartoq sapaatip akunneranut nalunaaquttap akunnerini 40-ni sulisartoq taamaalilluni nalunaaquttap akunneri 40-t taakku akissarsiaqarfigiitigalugit erninermut atatillugu ullormusiaqarsinnaatitaanngilaq.

Inuk ilinniagaqartoq peqatigitillugulu saniatigut piffissap ilaa sulisartoq, taamaattoq piffissami sulinngiffeqarfiusumi ilinniagaqarnersiutinut taarsiullugu erninermut atatillugu ullormusiaqarsinnaassaq, peqatigitillugu piffissap ilaanut suliffigisartakkaminut sulinngiffeqarnermini akissarsiaqaatigaluni.

Tamaaqataanik inuk namminersorluni inuussutissarsiuteqaatigaluni akissarsiaqarluni sulisartuusoq, erninermut atatillugu ullormusiaqarsinnaatitaassaaq namminersorluni inuussutissarsiuteqarnermut tunngatillugu isertitanut matusissutissanik, saniatigullu akissarsiaqarluni.

Inuit piffissap sulinngiffeqarfiusup ilaanut akissarsiaqarsinnaatitaasut imm. 2-mut ilaatinneqarput.

Imm. 2-mut

Aalajangersakkakut inuit piffissap sulinngiffeqarfiusup ilaannaanut akissarsiaqarsinnaatitaasut piffissap sinneranut erninermut atatillugu ullormusiaqarsinnaatitaapput imm. 1-imi pi-umasaqaatit naammassisimagunikkit.

Aalajangersagaq § 69 malillugu piffissami ikaarsaariarfiusumi immikkut pingaaruteqarpoq inunnut atorfeqarnerminni atugassarititaasut malillugit piffissap sulinngiffeqarfiusup ilaanut akissarsiaqarsinnaatitaasunut. Taakku taamaalillutik aamma erninermut atatillugu ullormusiaqarsinnaatitaassapput piffissap akissarsiaqarlutik sulinngiffeqarfigisinnaasamik naanerata kingorna.

Aalajangersakkami aamma pineqarput inuit piffissami sulinngiffeqarfigisaminni suliffeertut, assersuutigalugu suliffimmik matunera imaluunniit piffissamut killilikkamut piffissami sulinngiffeqarfiusumi naasumi isumaqatigiissuteqarlutik sulisimanertik pissutigalugu.

Imm. 3-mut

Angajoqqaat § 4 naapertorlugu najugaqarfimmik avataani erniartornissartik pissutigalugu sulinngikkallartut imaluunniit §§ 5 aamma 6 malillugit naartunertik imaluunniit § 20, imm. 2 naapertorlugu meeqqamik annasaqarnertik pissutigalugu sulinngikkallartut aalajangersakkami pineqarput.

Angajoqqaat taakku sulinnikkallarnerminni erninermut atatillugu ullormusiaqarsinnaatitaasinnaapput, atorfeqarnerminni atugassarititaasut naapertorlugit piffissami sulinnikkallarnerminni akissarsiaqarsinnaatitaanngikkunik.

Arnaq § 6, imm. 3 malillugu annikillisitamik sulisartuq piffissamut suliffiusumut annikillisitamut erninermut atatillugu ullormusiaqarsinnaatitaasinnaavoq. Assersuutigalugu sapaatip akunneranut nalunaaquttap akunnerini 40-ni sulisartussatut atorfinitsinneqarsimaguni, taamaatorli § 6, imm. 3 malillugu nalunaaquttap akunnerini 10-ni sulinnigittarani, taava sapaatip akunneranut nalunaaquttap akunnerinut qulinut erninermut atatillugu ullormusiaqarsinnaatitaassaaq, sulinniginnermini akissarsiaqartitsiviusinnaasumik isumaqatigiissummut ilaatinneqanngikkuni.

§ 47-mut

Imm. 1-imut

Erninermut atatillugu ullormusiat nalunaaquttap akunneri sulinnigiffeqarfissaq sioqqullugu sapaatit akunnerini 13-ini kingullerni agguaqatigiissitsinikkut erninermut atatillugu ullormusianik tigusissap suliffigisimasai aallaavigalugit naatsorsorneqassasut aalajangersakkami aalajangersarneqarpoq.

Aningaasanik qanoq amerlatigisunik inuup pisinnaatitaaneranut taamaalilluni apeqqutaassaaq pineqartoq piffissaq sulinnigiffeqarfiusoq sioqqullugu sapaatit akunnerini kingullerni 13-ini nalunaaquttap akunnerini qassini sapaatip akunneranut agguaqatigiissillugu sulisimanersoq.

Assersuutigalugu inuk sulinnigiffeqarneq sioqqullugu sapaatit akunnerisa kingulliit 13-it iluanni nalunaaquttap akunnerini 260-ini sulisimasoq, sapaatip akunneranut agguaqatigiissillugu nalunaaquttap akunnerini 20-ini sulisimassaaq, taamalu ullormusiaqartinneqassalluni § 48 malillugu nalunaaquttamut ataatsimut ullormusiaritinneqartup 20-eriaataanut naapertuuttumik.

Imm. 2-imut

Piffissat suut piffissamik naatsorsuineranut imm. 1 malillugu naatsorsuineranut tunngaviususamut ilaatinneqassannginnersut aalajangersakkami aalajangersarneqarput.

Assersuutigalugu inuk pineqartoq sapaatit akunnerisa kingullit 13-it ingerlaneranni sapaatip akunnera ataaseq feriarsimappat, taava piffissamik nalunaarsuinermini sapaatit akunnerini aqqaneq-marlunni feriarfiunngitsuni piffissaq suliffiusoq tunngavigineqassaaq.

Inuup pineqartuni sapaatit akunnerisa kingulliit 13-it iluanni suliffeqarsimanissaa suli piusaqaataavoq. Taamaalilluni inuk napparsimanini pissutigalugu sapaatit akunnerini 13-ini tamani suliffeqarsimanngitsoq erninermut atatillugu ullormusiaqarsinnaatitaanermut ilaatinneqassanngilaq.

Nr. 1

Piffissat pineqartup napparsimanini pissutigalugu suliffigisinnaasimaffiginngisai naatsorsuinnermut ilaatinneqassanngillat. Tamatumani pineqarput piffissat pineqartup napparsimanini pissutigalugu suliffigisimanngisai, taamatullu aamma piffissat pineqartup napparsimanini pissutigalugu suliffeqarfigisimanngisai.

Nr. 2

Inatsisartut inatsisaat manna malillugu sulinnginnerit pissutigalugit piffissat pineqartup suliffigisimanngisai piffissamik nalunaarsuinnermut ilaatinneqassanngillat. Tamatumani pineqarput piffissat inuup pineqartup sulinngiffeqarsimanini pissutigalugu suliffigisimanngisai, kiisalu §§ 4-6 malillugit naartusut sulinnginneri.

Naartusooq § 6, imm. 3 malillugu piffissami ikilisinneqarsimasumi sulisimappat, taava piffissamik naatsorsuineq suliarineqassaaq nalinginnaasumik akunnerit suliffigisarsimasai aallaavigalugit.

Nr. 3

Tamatuma saniatigut tunisassiassaaleqineq silallu qanoq innera pissutigalugit piffissap ilaani suliffissaaleqinerit naatsorsuinnermut ilaatinneqassanngillat.

Nr. 4.

Feriarnert naatsorsuinnermut ilaatinneqassanngillat, akissarsiaqarluni akissarsiaqaraniluunniit feriarneq apequtaatinnagu.

Nr. 5.

Akissarsiaqarani pikkorissarnerit qaffasinnerusunilluunniit ilinniagaqarnerit suliffeqaannarsinnaanermut pingaarutillit naatsorsuinnermut aamma ilaatinneqassanngillat.

Imm. 3-mut

Inuk katillugit nalunaaquttap akunnerinut amerlanerpaamik 40-nut akissarsiaqarlunilu erninnermut atatillugu ullormusiaqarsinnaatitaavoq.

Namminersorluni inuussutissarsiutilik assersuutigalugu sapaatip akunneranut nalunaaquttap akunnerini 30-ini akissarsiaqarluni sulisimasooq nalunaaquttallu akunnerini 15-ini namminersortutut sulilluni taamaallaat nalunaaquttap akunnerinut quliut erninnermut atatillugu ullormusiaqartinneqassaaq.

§ 48-mut

Imm. 1-imut

Erninermut atatillugu ullormusiat Sulinermik Inuussutissarsiuteqartut Kattuffiata (SIK) pisor-tallu sulisitsisuisa suliamik ilinniagaqanngitsut 18-inik ukioqalereersimasut pillugit isumaqati-giissutaat qaqugukkulluunniit atuuttoq tunngavigalugu akissarsiat ikinnerpaaffissaannut naa-pertuuttumik nalunaaquttap akunneranut aalajangersimasumik amerlassusilikkatut tunniun-neqartassasut aalajangersakkami aalajangersarneqarpoq.

Imm. 2-mut

Erninermut atatillugu ullormusiap annertussusia isumaginninnermi ikiorsiissutit tunniunne-qartartut pillugit kaajallaasitami Isumaginninnermut Naalakkersuisoqarfimmit ikinnerpaamik ukiumut ataasiarluni saqqummersinneqartartumi takuneqarsinnaassasut aalajangersakkami aalajangersarneqarpoq. Kaajallaasitaq Naalakkersuisut nittartagaanni tamanut saqqummiun-neqartassaaq.

Imm. 3-mut

Erninermut atatillugu ullormusiat feriarnersiuteqaatigineqarsinnaanngitsut aalajangersakkami aalajangersarneqarpoq.

§ 49-mut

Imm. 1-imut

Inatsimmi matumani kapitali 5 tunngavigalugu erninermut atatillugu ullormusiat tunniunne-qarnissaannik qinnuteqaat sulinngiffeqartup aalajangersimasumik najugaqarfigisaani inuillu nalunaarsorsimaffiannut nalunaarsorneqarfigisaani kommunalbestyrelsimut tunniunneqassa-soq aalajangersakkami aalajangersarneqarpoq.

Imm. 2-mut

Sulinngiffeqartoq sumiiffimmi nunatta kommuneqarfinnut aggorneqarnerata avataanii aalaja-ngersimasumik najugaqarpat, qinnuteqaat Isumaginninnermut Naalakkersuisoqarfimmut su-liap suliarineqarneranik isumaginnittussamut tunniunneqassasoq aalajangersakkami aalaja-ngersarneqarpoq.

Kalaallit Nunaata nunap immikkoortuinut kommuneqarfinnullu aggorneqarnera pillugu Inat-sisartut inatsisaanni nr. 34-mi, 23. november 2017-imeersumi § 5 malillugu sumiiffiit uku kommuneqarfinnut aggorneqarnerup avataatigut ingerlanneqarput:

- 1) Kalaallit Nunaata illersornissaa pillugu Angerfigeqatigiissut 27. april 1951-imeersaq malil-lugu danskit Amerikamiullu sakkutooqarfii (Pituffik).
- 2) Tunup Avannaani Nuna Allanngutsaaliugaq.

Imm. 3-mut

Erninermut atatillugu ullormusiaqarumalluni qinnuteqaat ullormusiaqarsinnaatitaanerup atuutilerneranit qaammatit tallimat qaangiunneranni tunniunneqanngippat ullormusiaqarsinnaatitaaneq atorunnaassasoq aalajangersakkami aalajangersarneqarpoq.

Ullormusiaqarsinnaatitaaneq atuutilertarpoq ullormit siullermit, pineqartup erninermut atatillugu ullormusiaqarfigisinnaaligaanit.

Tamanna nalinginnaasumik tassaassaaq sulinnigiffeqarnermi sulinniginnermiluunniit ulloq siulleq.

Inuit piffissap sulinnigiffeqarfiusup ilaanut akissarsiaqartut eqqarsaatigalugit, ullormusiaqarsinnaatitaaneq atuutilissaaq ullormit siullermit pineqartup akissarsiaqarunnaarfianiit.

§ 50-imut

Imm. 1-imut

Tunniussineq sapaatit akunneri 2-kkaarlugit piffissamulluunniit sivikinnerusumut pisarsinnaasoq kommunalbestyrelsip aalajangersinnaagaa aalajangersakkami aalajangersarneqarpoq.

Erninermut atatillugu ullormusiat aallaavittut sapaatit akunnerini 2-kkaarlugit tunniunneqartassapput. Aalajangersagarli periarfissiivoq pisortanit ikiorsiissutinik tunniussisarnermut najoqqutassat malillugit piffissamut sapaatit akunnerinit marlunnit sivikinnerusumut kommunalbestyrelsip tunniussisarsinnaanissaannut.

Imm. 2-mut

Pissutsit immikkut ittut tamanna tunngavissaqartippassuk erninermut atatillugu ullormusiat tamakkiisumik ilaannakortumilluunniit nioqqutissanik pisissutissanngorlugit tunniunneqartassat kommunalbestyrelsip aalajangersinnaagaa aalajangersakkami aalajangersarneqarpoq. Pisuni immikkut ittuni kommunalbestyrelsip aalajangersinnaavaattaq erninermut atatillugu ullormusiat kommunalbestyrelsimit tamakkiisumik ilaannakortumilluunniit aquunneqassasut.

Annilaanngatigineqarsinnaapput sulinnigiffeqartup erninermut atatillugu ullormusiani tamaasa ullut ikittunnguit ingerlanerinnaanni atugassai, nerisassanut, atisanut pisariaqartinneqarsinnaasunullu allanut akissaarulluni, taava erninermut atatillugu ullormusiat nioqqutissanik pisissutissanngorlugit tunniunneqarsinnaapput. Tamanna aamma pisortanut ikiorsiissutinik tunniussisarnermut najoqqutassat malitsigaat.

§ 51-imut

Imm. 1-imut

Inatsit manna malillugu erninermut atatillugu ullormusiaqartoq pissutsit nammineq meeqqalluunniip atugaasa allannguutaat tamaasa ullormusiaqarsinnaatitaanerup annikillisinneqarneranik atorunnaarneranilluunniit nassataqarsinnaasut oqartussaasumut ullormusianik tunniussisartuusumut nalunaarutigissallugit pisussaaffeqartoq aalajangersakkami aalajangersarneqarpoq.

Sulinngiffeqartoq erninermut atatillugu ullormusiaqartoq pissutsit sugaluartulluunniit sulinngiffeqartup suli erninermut atatillugu ullormusiaqarsinnaatitaaneranut pingaarutillit pillugit kommunalbestyrelsimut nalunaarutiginnittussaataavoq. Nalunaarutiginnittussaataanerumut taamaallaat ilaapput paasissutissat paasissutissanut kommunalbestyrelsip pigeriigaanut sanilliullugit allannguuteqarsimasut.

Nalunaarutigineqartussaataasunut ilaatigut ilaapput sulinngiffeqartup sulinngiffeqarnerminik kipititsinera, kiisalu sulinngiffeqartup sulinngiffeqarnermini aningaasanik tunniuttakkanik pissarsiarisimasai, taakkununga ilanngullugit, taakkunungaannarli killilernagit, sulinermit isertitassaraluanut annaasanut taarsiissutit tunniuttakkalluunniit assingusut allat, piffissamut sulinngiffeqartup erninermut atatillugu ullormusiaqarfigisimasaanut tunngasut.

Sulinngiffeqartup § 15 malillugu ilaannakortumik sulilernera taamatuttaaq nalunaarutiginnittussaataanerumut ilaavoq.

Imm. 2-mut

Pissutsit imm. 1-imi taaneqartut allannguutaat pillugit paasissutissiilluni nalunaarutiginninnginneq pissutigalugu erninermut atatillugu ullormusiat eqqunngitsumik tiguneqarpata imaluunniit qinnuteqartoq paasissutissanik eqqunngitsunik suliap suliarineqarnerani atugassanik tunniussippat aningaasat eqqunngitsumik tiguneqartut utertillugit akilerneqassasut aalajangersakkami aalajangersarneqarpoq.

§ 52-imut

Imm. 1-imut

Piffissani sulinngiffeqartup sulinngiffeqarnermini feriarnersiutisiaqarfigisaani ullormusiaqarsinnaatitaasoqassanngitsoq aalajangersakkami erseqqissarneqarpoq.

Feriarneq pillugu inatsisiliornerit malillugit feriarnersiutisiassat tunniunneqarnissaannut akissarsiaqarluni sulisup feriarnissaa piumasaqaataavoq. Taamaalilluni feriarnersiutisiassat tunniunneqartarput nalunaaquttap akunneri akissarsiaqarluni sulisartup feriarfigisai tunngavigalugit, qaammammusialinnullu feriarnersiutit feriareernerup kinguninngua tunniunneqartarlutik, peqatigitillugulu akissarsiat ilanngarneqartarlutik piffissamut periarfiusimasumut naapertuutumik.

Feriarneq pillugu inatsisiliornerit malillugit immikkut ittumik feriarnersiutisiat aalajangersakkamut ilaatinneqangillat, naatsorsuutigineqarmat sulinnigiffeqartoq feriarnermi akissarsiaqartinneqassasoq feriarnersiuteqartinneqarani.

Imm. 2-mut

Sulinnigiffeqartoq piffissami erninermut atatillugu ullormusiaqarfigisimasamini sulineri isertitassaagaluanut annaasanut taarsiissutisippat taakkuluunniit assigisaannik pissarsippat, piffissamut pineqartumut erninermut atatillugu ullormusiaritinneqarsimasut tamakkiisumik ilaannakortumilluunniit utertillugit akilerneqarnissaat piumasaqaatigineqarsinnaasoq aalajangersakkami aalajangersarneqarpoq.

Sulinnigiffeqartoq sulinnigiffeqarnermini suliffimminit soraarsitaasoq peersitaasorluunniit inatsisip matuma malitsigisaanik erninermut atatillugu ullormusiaqarsinnaatitaavoq, tassami sulinnigiffeqartoq § 46, imm.1, nr. 2 naapertorlugu piffissap sulinnigiffeqarfiusussap aallartinnissaata tunnganut suliffeqarnermut attuumassuteqarsimammat. Sulinnigiffeqartoq sulinnigiffeqarnermini suliffimminit soraarsitaasoq peersitaasorluunniit, kingusinnerusukkut isumaqatiigiissuteqarnikkut eqqartuussissutikkulluunniit eqqunngitsumik soraarsinneqarsimanerminut ajunngitsorsiassanik taartisisinnaavoq imaluunniit taarsiivigineqarsinnaalluni soraarsinneqarnissamik nalunaarfigineqarnermi kingorna piffissamut soraarfigisassami tungaanut naapertuuttunik. Taartisiat taarsiillutilluunniit sulinnigiffeqarnermi sulinikkut isertitassaagaluanut annaasanut taartaappata, taava kommunalbestyrelsip erninermut atatillugu ullormusiat tamakkiisumik ilaannakortumilluunniit utertillugit akileqqusinnaavai.

§ 53-imut

Qinnuteqartoq piffissami tassani erninermut atatillugu ullormusiaqarfiusumi pineqartup tamakkiisumik ilaannakortumilluunniit pilersorneqarneranut matusissutissatut taarsiissutinik assigisaannilluunniit tigusaqarsimappat, oqartussaasup erninermut atatillugu ullormusianik tunniussisup, taakku utertillugit akilerneqarnissaat piumasaqaatigisinnaagaa aalajangersakkami aalajangersarneqarpoq.

Tassani pineqarput aningaasat akissarsianut assigisaannulluunniit taarsiullugit tunniunneqartut piffissamilu sulinnigiffeqarfiusumi imminut pilersornissamut naatsorsuussat. Aningaasat pineqartut erninermut atatillugu ullormusiaritinneqartartunit ikinneruppata, ilassutitut erninermut atatillugu ullormusiaqartitsisoqassaaq.

§ 54-imut

Imm. 1-imut

Namminersortut kapitali 1 malillugu sulinnigiffeqarniarlutik inuussutissarsiornikkut ingerlataminnik unitsitsisut aalajangersakkami pineqarput.

Erninermut atatillugu ullormusiaqarsinnaatitaassagaanni piumasaqaataavoq namminersortup piffissami sulingiffeqarfiusumi inuussutissarsiummik ingerlatsinerminik unitsitsisimanissaa allanulluunniit tunniussisimanissaa, taamalu piffissami pineqartuni sulinanilu isertitaqarsimanginnissaa.

Imm. 2-mut

Aalajangersagaq malillugu namminersorlutik inuussutissarsiutillit aapparisaat inooqatigisaalluunniit ikiortaasartut piffissami sulingiffeqarfiusumi erninermut atatillugu ullormusiaqarsinnaatitaapput, pineqartoq piffissami pineqartumi aapparisaat inooqatigisaalluunniit inuussutissarsiormik ingerlatsinerani ikiuutissanngippat.

Aapparisaq ikiortaasoq erninermut atatillugu ullormusiaqarsinnaatitaassaguni nalinginnaasumik sulisutuulli suliffimminit sulingiffeqassaaq.

§ 55-imut

Imm. 1-imut

Namminersorlutik inuussutissarsiutilinnut aamma namminersorlutik inuussutissarsiutillit aapparisaannut inooqatigisaannulluunniit ikiortaasartunut piffissap sulingiffeqarfiusussap atuu-tilinnginnerani sapaatit akunnerini kingullerni 13-imi akissarsiaqarlutik sulisimanngitsunut, piffissami sulingiffeqarfiusumi isertitatigut annaasassat ullormusiaritinneqartunit annertuumik nikingassuteqarnissaat sulingiffeqartussap uppersarsinnaanngippagu sapaatit akunneranut nalunaaquttap akunneri ullormusiaqaataasinnaasut nalunaaquttap akunnerinut 14-inut aalajangersarneqassasut aalajangersakkami aalajangersarneqarpoq.

Imm. 2-mut

Pineqartup sapaatit akunnerisa kingulliit 13-it iluanni piffissamut sapaatit akunnerinut 13-inut naatsorsorlugi SIK-p isumaqatigiissutai malillugit akissarsiat ikinnerpaaffissaat malillugu akissarsiaqaataasumik sapaatit akunneranut nalunaaquttap akunnerini 14-imi sulinermut naapertuuttumit amerlanerusunik isertitaqarsimaneranik uppersarsaatit takutitsinikkut pineqartup isertitatigut annaasaqarsimanini uppersarsinnaassagaa aalajangersakkami aalajangersarneqarpoq.

Imm. 3-mut

SIK-p isumaqatigiissutai malillugit akissarsiat ikinnerpaaffissaannik akissarsiaqarluni nalunaaquttap akunnerinut 14-imut naapertuuttumit annertunerusumik isertitatigut appariaateqarneq pineqartoq sulingiffeqartup uppersarsarpagu, piffissaq sulingiffiusoq sioqqullugu sapaatit akunnerini kingullerni isertitaviit aallaavigalugit naatsorsuisoqassasoq aalajangersakkami aalajangersarneqarpoq.

Sapaatit akunnerini 13-imi isertitaviit SIK-p isumaqatigiissutai malillugit nalunaaquttap akunneranut akissarsiat minnerpaaffiannik agguarneqassapput, taamaaliornikkullu piffissamut na-

lunaaquttaq akunneri tamarmiusut pissarsiarineqassallutik. Kisitsit taanna 13-imik agguarneqassaaq sapaatip akunneranut nalunaaquttap akunneri ullormusiassat naatsorsorneqarnissaanut atugassat pissarsiariniarlugit.

Imm. 4-mut

Sapaatit akunnerini kingullerni 13-*ini* isertitat nalinginnaasutut isigineqarsinnaangippata ukiumut isertitat kingulliit atorineqassasut aalajangersakkami aalajangersarneqarpoq.

§ 56-imut

Ilinniartut ilinniarnermi sulinnigiffeqartut piffissami sulinnigiffeqarfigisaminni ilinniagaqarnersiuteqarsinnaatitaangitsut, sungiusarlutik sulinerminni tapiissutisisinnaatitaangitsut imaluunniit sungiusaammik sulinerminni akissarsiaqarsinnaatitaangitsut, ilinniagaqarnersiu-tinut, sungiusarluni sulinerminni tapiissutisianut imaluunniit sungiusaammik sulinerminni akissarsianut naapertuuttunik erninermut atatillugu ullormusiaqarsinnaatitaassasut, meeqqanut pilersuisussaataaffigisanut tapit ilanngullugit, aalajangersakkami aalajangersarneqarpoq. Tapit taakku meeqqanut akilersuutit pillugit inatsisiliornerit qaqugukkulluunniit atuuttut malillugit meeqqanut akilersuutit nalinginnaasut qaqugukkulluunniit atuuttut amerlaqatigaat.

Meeqqanut tapiissutit nalinginnaasumilluunniit akilersuutit aningaasartaat Isumaginninnermi ikiorsiissutit tunniunneqartartut pillugu kaajallaasitami Isumaginninnermut Naalakkersuisoqarfimmit ukiumut ikinnerpaamik ataasiarluni saqqummersinneqartartumi takuneqarsinnaapput.

§ 57-imut

Imm. 1-imut

Suliffissarsiortut pisortanit ikiorsiissutit pillugit Inatsisartut inatsisiliorneri naapertorlugit ikiorsiissutisartut piffissarlu ernivissatut naatsorsuutigineqartoq sioqqullugu sapaatit akunnerini 13-*ini* kingullerni suliffeqarnermut attuumassuteqarsimangitsut sulinnigiffeqarsinnaatitaassut erninermulli atatillugu ullormusiaqarsinnaatitaanatik, aalajangersakkami aalajangersarneqarpoq.

Imm. 2-mut

Imm. 1 naapertorlugit suliffissarsiortut, tamatumunnga piumasaqaatinik suli eqqortitsigunik, piffissami sulinnigiffeqarfigisaminni pisortanit ikiorsiissutinik suli pisinnaatitaassasut aalajangersakkami aalajangersarneqarpoq. Inuit pisortanit ikiorsiissutisartut taamaalillutik pisortanit ikiorsiissutit pillugit inatsisiliornerit malillugit ilaatigut pisortanit ikiorsiissutisarisartakkamik annertussusaat nutaamik nalilerneqartissinnaavaat pineqartup ernereernerup kingorna pilersuisussaataanerata allannguuteqarsimanera aallavigalugu.

§ 58-imut

Inuit siusinaartumik pensionisiallit sulinngiffeqarnerminni siusinaartumik pensionisiaqaan-narsinnaatitaasut aalajangersakkami aalajangersarneqarpoq.

Inatsisartut inatsisaanni aalajangersakkat allat malillugit pineqartoq sulinngiffeqarnermini akissarsiaqarsinnaatitaasinnaassaaq imaluunniit erninermut atatillugu ullormusiaqarsinnaati-taasinnaalluni, pineqartoq siusinaartumik pensionit saniatigut suliffeqarsimappat.

§ 59-imut

Aalajangersagaq malillugu akissarsiat tunniunneqartut imaluunniit erninermut atatillugu ullormusiat tunniunneqartut ima ikitsigippata akissarsiaqarluni sulisartup taassumalu ilaqutaasa pilersorneqarnerinut tunngavissatut naammagatik, sulinngiffeqartoq pisortanit ikiorsiissutit pillugit inatsisartut peqqussutaat malillugu tapiliussanik qinnuteqarsinnaavoq.

Sapaatit akunnerini kingullerni 13-ini piffissap sulinngiffeqartup agguaqatigiissillugu suliffi-gisimasaata malitsigippagu pineqartoq pisortanit ikiorsiissutit pissarsiarisinnaasaminit ikin-nerusunik pissarsissasoq, taava sulinngiffeqartoq erninermut atatillugu ullormusiat pisortanit ikiorsiissutinik taperneqarnissaannik qinnuteqarsinnaassaaq.

Pineqartoq piffissamut akissarsiaqarlunilu erninermut atatillugu ullormusiaqarsimapput, tigu-neqarsimasut tamarmiusut naatsorsuineri tunngavigneqassapput.

§ 60-imut

Namminersortunut erninermut aningaasaateqarfik, ilaatigut sulisitsisunit namminersortunit kapitali 3-mut ilaatinneqartunut akileeqataassutinit, ilaatigullu aningaasaliissutinit ukiut tamaasa aningaasanut inatsimmi aalajangersarneqartunit, aningaasalersorneqassasoq aalajanger-sakkami aningaasalersorneqarpoq.

Akileeqataassut § 61-imi sukumiinerusumik allaaserineqarpoq.

§ 61-imut

Imm. 1-imut

Sulisitsisoq namminersortoq kinaluunniit kapitali 3-mut ilaatinneqartoq namminersortunut erninermut atatillugu aningaasaateqarfimmut akileeqataassutinik akiliinissaminut pisussaaffeqartoq aalajangersakkami aalajangersarneqarpoq.

Imm. 2-mut

Akileeqataassutissap annertussusia ukiut tamaasa Inatsisartunit aningaasanut inatsimmi aalajangersarneqartassasoq aalajangersakkami aalajangersarneqarpoq. Akileeqataassutissap anner-tussusissaa, siunnersuummik namminersortunut erninermut aningaasaateqarfiup siulersuisuisa

§ 40, imm. 1, tassungalu nassuiaatit naapertorlugit ukiut tamaasa saqqummiuttagassaannik tunngaveqassaaq. Taamaattorli Inatsisartut pisussaaffeqanngillat siunnersuut taanna malissallugu.

Akileeqataassutip annertussusianut atatillugu utertinneqarsinnaasut amerlanerpaaffigisinnaasaannik Inatsisartut aalajangersaassapput. Utertinneqarsinnaasut amerlanerpaaffigisinnaasaat tassaavoq nalunaaquttap akunneranut akissarsiat utertitsinissamut tunngaviusinnaasut qummut killingat. Tamatumunnga tunngatillugu § 30, imm. 3 tassungalu nassuiaatit innersuussutigineqarput.

Utertinneqarsinnaasut amerlanerpaaffigisinnaasaat siunnersuummik § 40 tassungalu nassuiaatit naapertorlugit namminersortunut erninermut aningaasaateqarfimmut siulersuisunit ukiu- moortumik saqqummiuttagaannik tunngaveqassapput.

Akileeqataassutinit aningaasaateqarfiup aningaasartuutivii matussuserneqartassapput, imm. 4 naapertorlugu aaqquissuussinermi katersaqartoqaqqunagu.

Imm. 3-mut

Sulisoqarnermut akitsuut pillugu Inatsisartut inatsisaat naapertorlugu sulisoqarnermut akitsuutip akilersinneqartarneranut malittarisassat tunngavissallu qaqugukkulluunniit atuuttut assigalugit akileeqataassutit akilersinniarneqartassasut aalajangersakkami aalajangersarneqarpoq.

Imm. 4-mut

Aaqquissuussinermi aningaasanik katersaqarnissaq siunertaanngilaq. Akiliisinnaassuseqarnisarli eqqarsaatigalugu aalajangersimasumik annertussusilimmik aningaasatigut periarfissaqartoqartariaqarpoq. Ukiumi aningaasanut inatsiseqarfiusumi utertitsilluni akiliuteqartarnermut aningaasartuutinit amerlanerujussuarnik akileeqataassutinik akiliisitsisoqarsimappat, taamalu aningaasaateqarfimmi annertuumik sinneqartooruteqartoqalersimalluni, taava tamanna ukiup aningaasanut inatsiseqarfiusup tullianut akileeqataassutissap aalajangersarneqarnerani ersersinneqassaaq.

§ 62-imut

Pisortat erninermut atatillugu naligiissarisarnermut aaqquissuussinerannut pisortani sulisitsisut akileeqataassutaat aningaasanut inatsimmi nalinginnaasumik aningaasaliissuteqarnikkut aningaasalersorneqassapput. Namminersorlutik Oqartussat kommunillu ataanni pisortat ingerlatsinerannut ilaasut tamarmik pisortani sulisitsisutut isigineqarput.

§ 63-imut

Kapitali 5 malillugu erninermut atatillugu ullormusianut aningaasartuutit Nunatta Karsianit akilerneqartarnissaat aalajangersarneqarpoq.

§ 64-imut

Siulersuisut imaluunniit kapitali 4 malillugu allaffissornikkut aqutsisup aalajangiineri allaffissornikkut oqartussanut allanut naammagittaalliuutigineqarsinnaanngitsut aalajangersakkami aalajangersarneqarpoq.

§ 65-imut

Aalajangersakkami aalajangersarneqarpoq inatsimmi matumani kapitali 1 aamma 5 naapertorlugit kommunalbestyrelsip aalajangiineri isumaginnittoqarfiup aqunneqarnera aaqqissuusaaaneralu pillugit inatsisiliornerit qaqugukkulluunniit atuuttut naapertorlugit Isumaginninnermi Naammagittaalliuuteqartarfimmut naammagittaalliuutigineqarsinnaasut.

Tamanna taamatutaaq atuuppoq Inatsisartut inatsisaanni matumani kapitali 1 aamma 5 tunngavigalugit aalajangersakkat malillugit kommunalbestyrelsit aalajangiinerinut.

§ 66-imut

Imm. 1-imut

Sulisitsisoq eqqunngitsunik paatsiveerussaataasunilluunniit paasissutissiisimappat imaluunniit akiliutit utertinneqartussat tunniunneqarnissaannut pingaarutilinnik paasissutissanik nalunaaruteqarsimangippat, taava utertinneqartussat tamakkiisumik ilaannakortumilluunniit atorunnaassasut utertitassallu pisassarinagit tiguneqarsimasut utertillugit akilerneqassasut aalajangersarneqarpoq.

Imm. 2-mut

Erninermut aningaasaateqarfimmut sulisitsisut inatsisitigut pisussaaffiusumik akileeqataassutaasa utertitsissutigineqarsimasut tamakkiisumik ilaannakortumilluunniit utertinneqarnissanik piunasaqaatit qularnaveeqqutitut arsaarinnissutigineqarsinnaanerat aalajangerneqarpoq.

Qularnaveeqqutitut arsaarinnissuteqarneq pinngitsaaliissummik naammassinninneruvoq, tassuuna erninermut aningaasaateqarfimmut inatsisitigut pisussaaffiusumik akileeqataassutinut utertitsissutillu utertinnissaannut piunasaqaatit pisortanit pissarsiariniarneqartarlutk. Inuit akornanni aaqqiagiinngissuteqartoqartillugu pinngitsaaliissummik arsaarinnissuteqarneq, eqqartuussissut, isumaqatigiissuteqarneq akiitsoqarnermilluunniit nassuerutiginninneq tunngavigalugit pisartooq, assiginagu, pisortat suliniuteqarnerat tunngavigiinnarlugu qularnaveeqqutitut arsaarinnissuteqarneq ingerlanneqarsinnaavoq. Qularnaveeqqutitut arsaarinnissuteqarnermi sulisitsisup pigisaanit nalilinnit arsaarinnissuteqartoqassaaq.

Qularnaveeqqutitut arsaarinnissuteqarneq akiliisitsiniartartumit isumagineqassaaq. Qularnaveeqqutitut arsaarinnissuteqarneq sulisitsisumit isumaqatigineqanngippat, taava akiliisitsiniartartooq pisussaavoq apeqqut najukkami akiliisitsisarnermut eqqartuussivimmut saqqummiutis-

sallugu, taamalu qularnaveeqqutitut arsaarinnissuteqarneq eqqartuussisussaataasunit nakku-tigineqassalluni. Suliamik akiliisitsisarnermut eqqartuussivimmut tunniussineq taamaattoq akiliisitsiartartup aalajangiinerinik kinguartitsissutaasumik sunniuteqarsinnaanngilaq.

Imm. 3-mut

Sulisitsisup akileeqataassutissat piffissaagallartillugu akilinngippagit, akileeqataassutissat er-nialersorneqassappat, Sulisoqarnermut akitsuut pillugu Inatsisartut inatsisaat naapertorlugu sulisitsisut akiliutaasa akilersinniarneqartarnerannut malittarisassat assingi malillugit.

§ 67-imut

Imm. 1-imut

Eqqunngitsunik paatsiveerussaataasunilluunniit paasissutissanik tunniussinermut imaluunniit akileeqataassutit akilerneqarnissaannut aamma imaluunniit utertitassat tunniunneqarnissaan-nut paasissutissanik pingaarutilinnik tunniussinnginnermut Kalaallit Nunaanni pinerluttuleri-nermi inatsimmi malittarisassat malillugit akiliisussanngortitsisoqarsinnaasoq aalajangersak-kami aalajangersarneqarpoq.

Imm. 2-mut

Inatsisartut inatsisaata matuma malitsigisaanik aalajangersakkani Kalaallit Nunaanni pinerlut-tulerinermi inatsimmi malittarisassat malillugit akiliisussanngortitsisoqarsinnaassasoq aalaja-ngersarneqarpoq.

Imm. 3-mut

Inatsisitigut inuttut isigineqarsinnaasut, taakkununnga ilanngullugit aktiaateqarluni piginne-qataassuteqarluniluunniit ingerlatseqatigiiffik, piginneqatigiilluni ingerlatseqatigiiffik inger-latseqatigiiffiilluunniit assingusut, unioqqutitsisimatillugit, taava ingerlatseqatigiiffik akilii-sussanngortinneqarsinnaavoq. Suliassani taamaattuni Kalaallit Nunaanni pinerluttulernermi inatsimmi malittarisassat malinneqassapput.

Imm. 4-imut

Aalajangersagaq malillugu Inatsisartut inatsisaat manna imaluunniit Inatsisartut inatsisaat tun-ngavigalugu aalajangersakkat malillugit akiliisitsissutit Nunatta Karsianut nakkartassapput.

§ 68-imut

Imm. 1-imut

Aalajangersakkami inatsisip qaqugu atuutilernissaa aalajangersarneqarpoq.

Inatsisartut inatsisaat 2020-mi januaarip ulluisa aallaqqaataanni atuutilissaaq. Taamaattorli § 69 naapertorlugu Inatsisartut inatsisaata ilaa aatsaat septembarip ulluisa aallaqqaataanni atuuti-lissaaq.

Tamanna isumaqarpoq angajoqqaat januaarip ulluisa aallaqqaataata kingorna sulinngiffeqartut sulinngiffeqarsinnaatitaaneq pillugu kapitali 1-imi malittarisassanut, kiisalu erninermut atatil-lugu ullormusiaqarsinnaatitaaneq pillugu kapitali 5-imi malittarisassanut aamma isumaginnin-nikkut tunniuttakkat pillugit kapitali 6-imi malittarisassanut, ilaatinneqassasut.

Akissarsiaqarlutik sulisartut piffissami januaarip ulluisa aallaqqaataannit aggustip ulluisa 31-iannut sulinngiffeqarnerminni akissarsiaqarsinnaatitaassapput, isumaqatigiissutertik malillugu imaluunniit atorfeqartitaanerminni atugassarititaasut ilaattut sulinngiffeqarnerminni akissarsi-aqarsinnaatitaagunik. Tamatuma saniatigut kapitalimi 5-imi malittarisassat malillugit sulin-ngiffeqarnerminni ullormusiaqarsinnaatitaasinnaallutik imaluunniit kapitali 6-imi isumagin-nikkut tunniuttakkanik allanik pissartagaqarsinnaatitaasinnaallutik.

Imm. 2-mut

Inatsisartut inatsisaata matuma atuutilerneranut peqatigitillugu Naartunermi, erninermi meera-vissartaarnermilu sulinngiffeqartarneq ullormusiaqartarnerlu pillugit Inatsisartut inatsisaat nr. 14, 7. december 2009-meersoq atuukkunnaassasoq aalajangersakkami aalajangersarneqarpoq.

§ 69-imut

Aalajangersakkami aalajangersarneqarpoq §§ 27-45, § 64, § 66 kiisalu § 67, imm. 1 aamma 2, 2020-mi septembarip ulluisa aallaqqaataanni atuutilissasut. Taamaalippat inatsisartut inatsi-saat manna tamakkiisumik atuutilissaaq.

Tamatuma malitsigaa namminersortunut erninermut aningaasaateqarfiup kiisalu pisortat erni-nermut atatil-lugu naligiissarisarnermut aaqqissuussinerata septembarip ulluisa aallaqqa-aanni atuutilernissaat.

Tamanna isumaqarpoq akissarsiaqarlutik sulisartut sulinngiffeqarnerminni akissarsiaqarsin-naatitaalissasut.

Ulloq atuutilerfissaq sulisitsisunut namminersortunut ima malitseqassaaq, namminersortunut erninermut atatil-lugu aningaasaateqarfimmut akileeqataassuteqartarnissamut septembarip ul-luisa aallaqqaataanniit pisussaaffeqalissagamik.

Peqatigitillugu septembarip ulluisa aallaqqaataata kingorna namminersortuni sulisunut aamma pisortani sulisunut sulisitsisut erninermut atatil-lugu sulinngiffeqarnermi akissarsianut ani-ngaasartuutininut utertitsivigineqarsinnaalissapput.

§ 70-imut

Aalajangersagaq malillugu Naartunermi, erninermi meeravissiartaarnermilu sulinngiffeqartar-neq ullormusiaqartarnerlu pillugit Inatsisartut inatsisaat nr. 14, 7. december 2009-meersoq tunngavigalugu allaffissornikkut aalajangersakkat atuutiinnassapput allanngortinneqarnissamik atuukkunnarsinneqarnissamilluunniit tungaanut.

Taakkununga ilaavoq Meeqqamik paarisassamik inissiinermi sulinngiffeqartar-neq pillugu Namminersorlutik Oqartussat nalunaarutaat nr. 3, 26. februar 2010-meersoq.

§ 71-imut

Inatsisartut inatsisaat manna sulinngiffeqartunut inatsisip atuutilernerani kingusinnerusukku-luunniit sulinngiffeqartunut atuutissaaq.

Akissarsiaqarluni sulisartoq septembarip ulluisa aallaqqaataat sioqqullugu kingoqqullugulu sulinngiffeqartoq taamaalilluni piffissap sulinngiffeqarfiup ilaanut septembarip ulluisa aal-laqqaataata kingorna inissisimasumut sulinngiffeqarnermini akissarsiaqarsinnaatitaassaaq.